



樊山詩集



廣益書局刊行



版權所屬  
印刷必究



中華民國二十五年九月出版

樊山詩集

洋裝二冊——實價二角四分

〔外埠酌加郵費〕

原 著 者

樊 增 祥

校 勘 者

朱 太 忙

發 行 者

廣 益 書 局

總 發 行 所

廣 益 書 局  
上海河南路

分 發 行 所

南京 廣州 漢口 北平

廣 益 書 局  
萬縣 重慶 成都



新式  
標點  
樊山詩集 卷下

北堂集

己亥二月初八日召對儀鸞殿奉旨開缺以道府存記次日入謝兩宮垂詢時政甚悉紀恩述事敬賦二詩

長樂門邊候曉鐘，延和仙仗簇春風。蓬萊宮闕原天上，堯舜勳華出女中。佩玉低垂花發綠，絲綸新捧朶雲紅。廿年靴版風塵裏，多愧朝廷念弱翁。

明光一再被溫綸，無補朝家望治殷。爲問蒼生徵賈誼，許開東閣待朱雲。（有詔交榮相差遣）軍謀乍可參龍武，廷對何煩析豹文。牧令箴僭朋黨論，獻廷亦是野人片。

彩雲曲有序

傅彩雲者，蘇州名妓也。年十三，依姊居滬上，豔名噪一時。某學士銜恤歸，一見悅之，以重金置爲篋室，待年於外。祥琴始調，金屋斯啓，攜至都下，寵以專房。會學士持節使英，萬里鯨天，鴛鴦並載。既至英，六珈象服，儼然敵體。英故女主，年垂八十，雄長歐洲，尊無與並。彩出入椒風，獨與抗禮，嘗偕英皇並坐，照象時論奇之。學士代歸，從居京邸，與小奴阿福姦生一女。學士逐福留彩，寢與疏隔。俄而文園消渴，竟天天年。彩故與他僕私，至是遂爲夫婦。居無何，私蓄略盡，所歡亦殞，仍返滬爲賣笑計，改名曰賽金花。蘇人公檄逐之，轉至津門，雖年逾三十，而豔名不減疇昔。己亥長夏，與客談此事，因記以詩。先是學士未第時，爲人司書記，居煙臺，與妓愛珠有嚙臂盟。比再至，已魁天下，遽與珠絕。珠冤痛累月，竟不知所終。今學士已矣，若放鬼飯，燕子樓空，唱金縷者，出節

度之家，過市門者，指狀元之第，得非霍小玉，冥報李十郎乎？余爲此曲，亦如元相所云：「甚願知之者不爲，而爲之者不惑耳。」

姑蘇男子多美人，姑蘇女子如瓊英。水上桃花知性格，湖中秋藕比聰明。自從西子湖船住，女貞盡化垂楊樹。可憐宰相尚吳縣，何論紅紅兼素素。山塘女伴訪春申，名字偷來五色雲。樓上玉人吹玉管，渡頭桃葉倚桃根。約略鶻鬢十三四，未遣金刀破瓜字。歌舞常先箭部頭，釵梳早入妝樓記。北門學士素衣人，整踏毬場訪玉真。直爲麗華輕故劍，况兼蘇小是鄉親。海棠聘後寒梅喜，待年居外明詩禮。兩見瀧岡墓草青，鴛鴦絃上春風起。畫鷁東乘海上潮，鳳凰城裏並吹簫。安排銀鹿娛遲暮，打疊金貂護早朝。深宮欲得皇華使，才地容齋最清異。夢入天驕帳殿遊，閔氏含笑聽和議。博望仙槎萬里通，霓旌難得彩鸞同。詞賦環球知繡虎，釵鈿橫海照驚鴻。女君維亞喬松壽，夫人城闕花如繡。河上蛟龍盡外孫，房中鸚鵡稱天后。使節西來婁奉存，錦車馮嫫亦傾城。冕旒七毳瞻繁露，槃敦雙龍贈寶星。雙成雅得西王意，出入椒庭整環佩。妃主青禽時往來，初三下九同遊戲。妝束潛隨夷俗更，語言總愛吳娃媚。侍食偏能壓海鮮，報書亦解繙英字。鳳紙宣來鏡殿寒，玻璃取影御牀寬。誰知坤媪山河貌，祇與楊枝一例看。三年海外雙飛俊，還朝未幾相如病。香息常教韓壽聞，花頭每與秦宮並。春光漏洩柳條青，郎主空噴梁玉清。祇許大夫驅使了，不教琴客別宜城。從此羅帷怨離索，雲藍小袖知誰託。紅閨何日放金雞，玉貌一春鎖銅雀。雲雨巫山枉見猜，楚襄無意近陽臺。擁衾總怨金龜塔，連臂猶歌赤鳳來。玉棺畫下新宮啓，轉座王郎長已矣。春風肯墜綠珠樓，香徑還思苧蘿水。一點奴星照玉臺，樵青婉孌漁僮美。繡帷尙掛鬱金堂，飛去玳梁雙燕子。那知薄命不猶人，御叔子南後先死。蓬巷難栽北里花，明珠忍換長安米。身是輕雲再出山，瓊枝又落平康里。綺羅叢裏脫青衣，翡翠巢邊夢朱邸。章臺依舊柳毵毵，琴操禪心未許參。杏子衫痕學宮樣，枇杷門榜換冰銜。吁嗟乎！情天從古多緣業，舊事煙臺那可說。微時嘗蒯得恩憐，貴後萱芳成棄擲。怨曲爭傳紫玉釵，春遊未遇黃衫客。君既負人人負君，散灰扃戶知何益。

歌曲休歌金縷衣，買花休買馬騰枝，彩雲易散琉璃脆，此是香山悟道詩。

庚子元旦宮詞

昨夜前星照紫宸，鳳皇銜詔出端門，歲朝寧壽宮中宴，龍卷稱觴有太孫。  
紫極將開萬壽筵，十洲欣喜戴堯天，三旬天子開恩榜，已御黃圖廿六年。  
芙蓉闕下集華簪，雉扇遙開法從臨，喜字荷囊金豆滿，拜恩一一繫當心。

兩處催班御正衙，一時慈孝仰天家，聖人扶輦還西內，當殿剛開正午花。（是日辰正慈聖御皇極殿已初皇上御乾清宮俱受賀訖午前還海）

新歲病目戲書

病目南窗下，支頤看夕陽，淡交稀過從，閒事儘思量。風栗剝時軟，霜橙揉後香，果誇福州產，花媚喜神方。女綴鳳皇蠟，兒爭獅子糖，畫圖嬌仕女，采選競侯王。歲酒虛華飲，郵書闕報章，詩慳纔半格，字細怯雙行。月好能無負，風雄不可當，草休燈下起，花任霧中狂。欲倩金鑿手，還余巖電光，辛溫屏春韭，洗淪費冬桑。昨捧明光詔，將稱玉殿觴，儲星選丞弼，奎宿主科場。好竭時文力，重瞻聖學昌，皇天留老眼，與世掃秕糠。

五雜組詩

五雜組，原上草；往復還，枝上鳥；不獲已，風塵老。  
五雜組，章臺柳；往復還，騎馬走；不獲已，米五斗。  
五雜組，一束帛；往復還，金門客；不獲已，頭將白。  
五雜組，春明樹；往復還，春明路；不獲已，春明住。  
五雜組，東阿王；往復還，劉真長；不獲已，張君房。

五雜組機中線；往復還，堂前燕；不獲已，弦上箭。  
五雜組，繫臂紗；往復還，風中霞；不獲已，老樹花。  
五雜組，美人賦；往復還，周郎顧；不獲已，商人婦。  
五雜組，繡襦裙；往復還，雙飛蝶；不獲已，黃門妾。  
五雜組，錦繡段；往復還，回心院；不獲已，秋風扇。  
五雜組，紅羅襪；往復還，明月珠；不獲已，妾當墮。  
五雜組，陌上花；往復還，金犢車；不獲已，女還家。  
五雜組，腰間綬；往復還，吠堯狗；不獲已，飲醇酒。  
五雜組，回文詩；往復還，對手棋；不獲已，食蛤蜊。  
五雜組，素與丹；往復還，暑與寒；不獲已，食馬肝。  
五雜組，纒繫革；往復還，門前轍；不獲已，食雞肋。  
五雜組，槐花雨；往復還，復社侶；不獲已，應科舉。  
五雜組，懷中書；往復還，水上鳧；不獲已，浮五湖。  
五雜組，補衲針；往復還，戲沙禽；不獲已，河洛瘖。  
五雜組，花如繡；往復還，春波皺；不獲已，雲出岫。  
五雜組，袖中帕；往復還，兩相罵；不獲已，老女嫁。  
五雜組，澤中荷；往復還，機上梭；不獲已，烏在羅。  
五雜組，流蘇牀；往復還，明月光；不獲已，思故鄉。

五雜組，芙蓉幕；往復還，隔日瘧，不獲已，此間樂。

問繡漪病

病中辛苦女，文園久不來。過待月軒，銀燭照人虛夜繡。紅房多睡困春寒，藥杯漱灑顰眉飲。書葉逡巡撮口翻，幸是閏年花較晚，海棠相待倚欄杆。

芸子官檢討余誤書編修書來辨正似以三甲爲憾戲賦

編檢同階侍玉除，乙鴻偶混漫軒渠。宏詞陽羨猶堪數，五甲新安總未如。侯相也稱同進士，（謂曾文正）家風休學悶尙書。試將史傳參金石，仕履從來多鉅鍤。

石甫南歸與傅彩雲同乘有詩見寄戲次其韻

秦郎何意耦朝華，吹氣渾疑館應霞。寫入丹青小楊柳，合爲緋白二桃花。（君贈爽翁詩有緋白二桃花之句）妾心宛轉悲山木，鳥語分明懊澤家。油壁車中並肩坐，軒渠應潑繡襟茶。

颿輪固轉似迴腸，載得瑤臺郭密香。枕底鴛鴦紆左顧，髻邊茉莉是南強。都非年少如垂柳，直以言多畏折桑。願得青禽與方便，長銜錦字到君傍。

庚子五月都門紀事

紅狼青犢自成羣，依託王門諫帝闈。民命纍纍輕似草，神言往往降于莘。誇張古冶屠龍手，斷送眞州放雁人。不患鯨吞患魚爛，可憐京闕白煙塵。

彼己兵形兩不知，妖書僞識太無稽。眞成霸上羣兒戲，坐使崆峒七聖迷。今日蘇門誰抉眼，後來郿塢恐然臍。人間健者寧惟汝，長揖橫刀吾欲西。

阿奴下策火初然，島客乘墉守益堅。白帝向來欺赤帝，蒼天未死立黃天。梯衝飛舞窺樓上，矢石荒唐滿御前。十

國衣冠同一炬，可無頗牧衛幽燕？

年少驕王對紫宸，衆中銳意戮鯨鯢，掖庭自結十常侍，七鬯難安一至尊；夜半駕歸仁壽殿，日中火及正陽門，百思不解州吁意，不戢兵端且自燔。

擎拳豎腳盡禱兵，礮火弓刀日夜驚，欲去徘徊端正樹，憂來吟諷董逃行，大言處伯輕羣子，往讖巴顏促五庚，吾愛大夫名五殺，屢屢一曲向秦京。

三朝聖后媿媧皇，豈意流言煽左璫，妖讖髻花殊白柰，閨秋空樹包黃楊，欲綿唐祚思靈武，爲報秦仇棄督亢，黃閣有人兼將相，忠言不入怨天亡，（府主病起人對極言拳匪妖妄慈聖曰吾亦不信而吾左右皆惑之奈何）

都市蕭條儼被兵，繁華非復舊神京，不虞建業金甌缺，更比漚淵瓦注輕，鼉禁月明聞鬼哭，鳳城白日斷人行，宮奴不念家山破，猶道如今是太平。

崇仇棄好復何言，十國揚兵日月昏，白雁飛來寧有宋，黃河挑動恐亡元，好從蜀國謀西幸，愁見燕人祭北門，天柱地維三百載，不圖蜂蟻毀乾坤。

大同

桑乾水繞大同城，日落嚴關鼓角驚，地迴北通龍口戍，時危西調雁門兵，連村赤幘聞風起，萬瓦紅燈照夜明，愁殺循良二千石，黑河日夜怒濤生。（謂李子丹前輩）

重有感

燕郊千里草青青，銅馬南來慶得朋，花項健兒規作帝，果頭勅盜託於僧，（涑水匪首是一桑門）槩弧實兆寢周亂，籌火虛言大楚興，不分明亡三百祀，朱家兒尙有傳燈。

五月廿五日夜董軍攻德法意美四使館克之



四夷賓旅倚同盟，彈雨槍雲苦見侵。火烈岷山寧辨玉兵來，隴上慣摸（平）金。虎行白晝人人慄，鬼哭青天往往陰。摩壘爭然香象燧，望援久斷紙鳶音。魚因游釜還思水，鳥爲焚巢悔入林。血戰寒創當鬼箭，凱歌踞轉鼓洋琴。沈淵競試探珠手，入穴眞償得子心。妖鳥羅平成底事，董昌遺孽到如今。

是夕端邸率師攻西什庫不克洋兵僅三十餘人

夷獠卅六盡乘墉，龍虎諸軍在下風。兩矢拒門誰敢入，十樓卓地不能攻。卿眞作賊劉盆子，人笑騎豬武懿宗。七日偏陽終不下，虜王猶策虎神功。

初五日過侯馬訪電局邵思亭少尉始知六月十七日析津失守狀再疊前韻

電學休論乾與濕，截綫成寸竿成尺。鄧侯祈請徧台司，馬上飛書淚光赤。停驂訪君日未歇，曲房洞牖明頗瓌。呼奴具飯起迎客，暑中顛倒黃蕉衣。鹽車困悴一何久，道逢良樂長鳴嘶。連城義勇盡財虎，驕王兄弟猶麟兒。大沽戰馬不解薦，細鎧明光橫組練。海中鐵艦已如雲，天上絲綸屢反汗。將軍饗士酌銀觴，礮來洞胸骨亦香。析津遼落鯨鯢手，進據周家臥榻旁。最防敖倉失紅粟，漸恐帝里無樓桑。憂從中來不可說，且復西行越太行。吁嗟乎師壯於直老於曲，誰使神州竟沈陸。彼明之亡由流寇，彼元之亡由色目。

研菘述平陽餅事戲誌吳中王笠雲牧絳州以菘豆沙製月餅極美其戚官臨汾典史傳其法罷官占籍平陽賣餅自給

笠雲花饌稱殘牙，細灑金盆菜豆沙。供養純狐堪一笑，臨汾少尉餅師家。

感懷

避地瓜門盍小休，垂門碧柳亦風流。貧來奴僕隨新主，住久兒童識故侯。開鏡花枝當玉案，捲簾山翠入高樓。邇來惟覺吟情減，鬢社何人與唱酬。

效唐人西宮怨

月轉宮簾盛玉波，桐飄金井夜如何？玉階秋怨年年有，不似今年白露多。

□秋夕示內

移巢舊燕似臣羈，倦馬東華夢醒遲，離亂避人逢寒雁，病愁憐汝畫山眉；詞人舊怨秋蘭減，月榭新涼玉笛吹，池照影娥青鬢薄，菱容鏡北水楊垂。

垂楊水北鏡容衰，薄鬢青娥影照池，吹笛夜涼新榭月，減蘭秋怨舊人詞；眉山畫汝憐愁病，雁寒逢人避亂離，遲醒夢華東馬倦，羈臣似燕舊巢移。

□都下伶人小叫天或言兵解或言在汴感賦一首

叫天歌續崑崙子，流落兵間亦可嗟，此曲忽忘黃米飯，誰家飄墮白楊花；野狐無復隨行在，舞馬何時媚正衙；南府本家俱寂寞，金梁橋畔泣琵琶。

□聞都門消息

上林秋雁忽西翔，凝碧池頭孰舉觴？市有醉人稱異瑞，巢無完卵亦奇殃；犬銜朱邸焚餘骨，烏啄黃鸞戰後旂；滿目蓬蒿人跡少，向來多是管絃場。

京師赫赫陷鯨牙，十國縱橫萬戶嗟，舊宅不歸王謝燕，新亭分守楚梁瓜；（諸國各有疆界）蛾眉身世惟青塚，貂珥門庭但落花，龍武諸軍誰宿衛，孤兒一一委蟲沙。

百年喬木委秋風，三月銅街火尚紅，崇愷珊瑚兵子手，宋元書畫冷攤中；金華學士羈僧寺，玉雪兒郎雜酒傭，聞得圓明雙鶴語，庚申庚子再相逢。

島人列檄罪諸王，玉牒瑤潢絕可傷；待取血管觴福鹿，誰將眼箸謎貪狼；伯霜仲雪俱危苦，（謂端邸及濂溪貝勒）宋劬殷辛僭比方，（敦邸服中生子即端邸也）公法每寬親貴議，可須兩首越重洋？

繁華非復鳳城春，玉輅於今隔隴秦。金雀觚稜虛御仗，銅駝荆棘泣孤臣。朱門白屋多新鬼，卜肆僧寮幾故人。莫問北池舊煙月，雨零鈴夜一沾巾。

上定興夫子

尚書曳履躡星辰，獨荷宣仁手詔溫。綸閣中間金鼎重，帝車前面玉衡尊。烏黃並入岐農樂，青綠爭歸薛卞門。往事靖康今未遠，可無伯紀拄乾坤？

詔書哀痛擬興元，當筆親臣勝陸宣。大爲中興生李晟，帝從行在擢崔圓。動搖邲鄴三朝鼎，補救媯皇五色天。聞道鯨鯢俱就款，亟通書幣定幽燕。

朝廷盱食望燕雲，周召同心陝不分。（兼謂長白相公）西帥舊持金虎節，（公撫陝者再）北援新募水犀軍。聲筌諧叶房兼杜，薪膽艱難范與文。句踐畏天吳且沼，好廝壺粥建殊勳。

廿年門館荷恩私，慚愧麻鞋杜拾遺。三賦開元曾進奉，七歌同谷更流離。蛾眉晚畫春將老，猿臂閒居力已衰。長記唐宗西辛日，最堪憐是望雲騅。

庚子十一月二十四日蒙恩簡授皖北道次日入謝奉命暫留行在恭紀二首

除書朝下殿東頭，獬豸榮途晚歲收。聖澤深於淮泗水，前明曾是帝王州。留臺長史疲張裔，逆旅新豐擢馬周。千古鳳陽歌舞地，好教風俗化刀牛。

雙懸日月照華林，陳說艱難淚滿襟。一任淮陽思汲黯，可能幕府少陳琳。絲綸陸贄參金管，問答胡銓記玉音。文字役人三十載，老來纔結主知深。

實甫以三百金助賑得孔雀翎戲贈

欲答檀施意，修翎孔雀豐。露臺二倍值，煙閣一般功。頭腦鸞鸞好，身材燕燕同。莫嘲刁短尾，翻羨羽重瞳。翠奪眉

稜月金飄耳後風，鳳毛通體豔，鶴頂十分紅。披拂雙肩上，徘徊五里中。顧瞻驕左右，飛翥向南東。岸幘高於嶂，多文毒異嵩。花簪蓬島客，玉琢管城公。紫綫輕垂綫，黃綾窄製筒。輝生懸肘印，夢繞射屏弓。貂珥雙蕤拱，鵬圖六翮雄。文章原錦段，官職亦離籠。芍藥韓祥並，蘭苕杜句工。每煩纖手卸，釵索挂瓊瓏。

臘八日慈聖賜府主粥轉以見貽敬賦誌謝

浴佛佳辰壽膳多，行宮熬粥似雍和。金甌政事堂前賜，玉食宮人手裏過。重見梅羹調傅說，不忘麥飯進滹沱。思門十載沾膏馥，一寸心涵太液波。

去年臘八日王文敏公亦以雍和宮粥見惠感今追昔疊韻誌哀

內製眠粥損惠多，今如南宋想宣和。天廚蘭橘尋常贈，老屋蓬蒿早晚過。君每入值必過余門，糙米沙鍋餘喫咽。碧梧金井一滂沱，易名董趙慚風節，剩有劉郎感尺波。

辛丑元旦早朝

西京行殿鬱崔嵬，冉冉香煙雉扇開。玉女排雲動環珮，黃人捧日照蓬萊。南山紫翠浮霞蓋，北面金貂拜露臺。臣有傳家忠孝帶，憶曾瞻對顯皇來。（忠孝帶爲先子舊物咸豐八年入覲卽佩此）

寄晦若侍御都門

君留京闕我秦川，說著黃巾膽尚寒。庾信江關傷別易，留侯帷幕借籌難。鳳城何者爲春色，烏府於今有諫官。記否正陽門縱火，北臺同帶淚痕看。（記去年五月二十日事）

再寄晦若

海天風引下三神，成就邦衡壁立身。御史中推真御史，仙人外有謫仙人。今知敵國尊黃鶴，早陟明廷對白麟。君在孔門似端木，亂齊存魯見經綸。

玉河書見

玉河橋上玉驄鳴，行到樓前更不行。定自不關垂柳事，遠山眉黛不勝情。

雨過

風簾生微濶，秋篔墮新粉。玉簪葉上詩，溜雨成春蚓。  
清朝嬌女至，問我有詩無。今日煎茶水，青荷葉上珠。

奉和伯熙涑水雨夜見寄元韻

客舍幽州五月寒，對牀無分與追攀。雲沈鐵雁關前月，雨暗紅螺寺外山。華省羣公虛待漏，蘭陵一老獨居閒。梧桐東府還蕭瑟，明鏡明朝數鬢斑。

又和伯熙病足一首

軟脚江南酒，陶然盡一卮。獨行遲愈好，多病老方知。漫市千金馬，猶當一足夔。憐余猿臂軟，亦減射雕時。（余嘗患臂痛）

五月十四日曉起登平臺看雨用前韻簡伯熙

臥聞滄玉曉，游滌登平臺。虛且試攀，兩鴨拍浮丁字水。一螺蒼潤米家山。黑頭鏡裏三公去，黃頰山中斗酒閒。爲報意園掃塵榻，結趺同印篔簹斑。

雨中

梅子黃時雨最佳，簷風吹冷舊紋紗。吾廬倚樹兼臨水，午聽新蟬暮聽蛙。  
北台高矗晚涼多，玉水平添一寸波。欲得謝家兒女意，雨中張蓋有新荷。  
風入西窗羅日疏，隔牆跳盡綠荷珠。宮壺三換蓮花箭，猶攝深衣據槁梧。

燭淚堆盤冷不收，會稽師友斷風流。（謂羔師子珍）老夫那不頭成雪，丹鳳城南夜夜秋。

浴罷

浴罷新更白葛衣，晚晴庭院嫩涼時。花香納入通中枕，茗戰催成歇後詩。梧竹有風捐扇早，樓臺得月上燈遲。飄輪（謂火車）入市能多少，賸許都人食荔枝。（時府主惠鮮荔）

立秋日過意園

寶墨堂深竹柏交，科頭箕踞信消搖。捲簾淡月初三夜，落葉清秋第一朝。細細荷香薰飯具，微微珠雨溼燈綃。歸時打點黃紬夢，已有雞人喚早朝。

閒居

纔曳桃枝上北台，旋循花徑試棕鞋。貪看山色晴尤好，愛聽荷聲雨亦佳。茶臼安於常住室，蘭盆移入小眠齋。肉生髀裏妨何事，莫爲功名損老懷。

薄午涼堂暑氣清，籬波不動篔簹平。茶甌淺帶煙嵐色，琴柱微鳴玉佩聲。看竹人來逢睡起，催花雨過報詩成。教兒誦罷蕭樓賦，閒聽風蟬繞樹行。

偶閱南宋人集卽效其體

久輟承明供奉班，幅巾藜杖稱閒官。出城看客還騎馬，過寺尋僧不著冠。菱角水枯秋稅減，（北池水全涸矣）桂花風細夾衣寒。紫泉缸裏新砂土，自課園丁養建蘭。

絕句

秋潮八月漲丁沽，紫蟹紅薑入饌初。更檢崇文門歷看，桂花香裏進銀魚。

漫興

乞得東華自在身，閒攜書卷坐苔茵。紅樵瑣碎金生粟，霜餅蕭鬆玉起鱗。剩與檳榔爲舉主，極知香茗是佳人。定  
昆池水無多子，（時方苦旱）留浸中秋玉一輪。

○中秋日與內兄內子攜兩家兒女奉外姑北台賞月卽席有作

凌風呼酒最高層，拾級欣隨鶴鬢登。座客中郎封羯末，主人荆婦子孫曾。雲中金鏡當心出，水上朱欄四面憑。得  
傍蓬萊宮闕住，舉家都浸玉壺冰。

一顆明珠出海初，涓涓涼露濕衣裾。風烟俱淨青天朗，人月雙圓玉漏徐。歌管沸雲真帝所，樓台近月卽仙居。昇  
平不禁金吾夜，贏得千門啓鑰魚。

○盆桂盛開同繡漪賦之

摛隱淮南意未忘，手按紅蕊豔秋光。早登紫府科名籍，老愛仙家服食方。井菊黃猶慚晚達，露棠紅欲借天香。（  
時秋海棠亦盛）好將金粟如來果，證入吾家九桂堂。

○嘉定徐大司馬屬題錢南園所畫瘠馬圖寓物抒情敬成長句

先皇策士歲壬戌，二聖垂簾求鼎寶。嘉定尙書第一人，正衙獨秉凌雲筆。酒醕瓊林催上馬，中使執鞭赤墀下。當  
頭騎出正陽門，知是來從西極者。供奉南齋三十年，承恩紫禁賜連乾。頓轡每於宮柳畔，挽繮橫過御樓前。中間兩  
奉輜軒使，珠璣燦煌照天地。洪都新府簡驂騑，白嶽名山育龍驥。還朝玉節有光輝，珂雪鮮明一品衣。叔寶自憐忽  
雷駁，微之長詠望雲騅。世人爭羨沙隄騁，豈識金門容大隱。爲放小事任模糊，石慶家風自恭謹。買得南園瘠馬圖，  
愛之不啻千金駒。屢曾對御誇神駿，誰解當官問牧芻。慈聖眼明過伯樂，周廷八駿無凡弱。第一種收第一人，狀元  
忠孝焚香祝紫樞。黃閣倚天開，終待尙書曳履來。不少渥洼千里足，一齊翹首望金台。

○再過淇然精舍

竹柏輕陰掃不開，金屏終日鎖蒼苔。朱顏未老風情在，時許雙荷問字來。  
六扇文窗上夕暉，晚風捎竹動書帷。枯荷不送秋池雨，更自看雲憶翠微。  
白石平瑩整作池，猶餘樊鶴舊筵。飯香魚熟久相待，背立池南尋小詩。  
秋露垂垂滴玉餘，橫安果几面交疏。山僮磨墨香盈斗，搖髮雲藍作大書。

北臺九日簡伯熙

九日登臺例有詩，霜風如虎畫婁迷。稍欣晚圃花香早，未覺高簷帽樣低。  
數笏遠山秋柳外，一行新雁苑牆西。銀魚紫蟹仍風味，試與王孫覓舊題。

寫懷

銅墨拋來亦未閒，清朝看鏡損朱顏。置身總在弓弦上，歛足聊騎戶限間。  
半格小詩酬白菊，一甌新茗對西山。五湖多少玻璃水，欲掉扁舟載鶴還。

酬蓮溪同年見贈

青瑣窗中起草臣，明明玉局是前身。不隨吉甫談新法，重見宣仁用舊人。  
白葛賜衣仙露裊，紅梨同甲鬢霜新。三洪二宋皆才俊，誰及君房掌帝綸。

排悶

潼川家世羽林雄，馬上能開兩石弓。猿臂蹉跎今老矣，玉堂花縣幾春風。  
與人無忤世無爭，平等相看盡有情。棠里奚奴亦人子，東山女妓亦蒼生。  
令狐書記謝朝簪，錦瑟琴瑟迷託意深。百寶流蘇隨處挂，幾人真識玉溪心。  
官廚休戀麩牙米，鄉味終思雉尾尊。招隱豈關蛛網事，楚庭別有會心人。



戒葷止酒減茶漿，乞取王孫藥一囊；苦口由來人畏忌，杏仁蜜是好單方。（伯希治病用杏仁蜜）  
文章有用始稱工，虛牝黃金那得同；若爲騷除閒字句，選樓油素一時空。  
平章風雅長騷壇，飲食由來知味難；豔體西崑三十六，豈惟三舍避寒山？

□憶東溪

生長東溪側，甘爲黃綺儔；披裘人似鶴，臨水屋如舟；果下乘雖馬，桑陰飯每牛；無田歸亦得，終勝上京遊。

□題何京兆聽泉圖

南高峯下萬松杉，身到清都故不凡；便與東坡作交代，冷泉亭長是頭銜。  
曉踏蘇隄露未晞，抱琴終日坐苔磯；斜陽黃到呼猿洞，纔趁松陰緩緩歸。  
到耳清於風過簫，觀茶評水叩僧寮；茅家埠口拏船女，熟識腰間綠玉瓢。  
理安寺裏一蘭閣，但到西湖似到家；誰識南朝何水部，此來不是爲梅花。

□伯熙病中索詩因贈

意園小極索詩筒，休信箕牛坐命宮；脾土尙虛宜藥健，頭風欲愈佇文雄；家居金椀平安裏，身在紗籠隱現中；我  
是梁園舊賓客，曾傳七發過江東。

繡綫添長綺日溫，擁貂欲出且逡巡；聞鐘半夜參心佛，酌水清朝祀腦神；天地荒寒修柏健，陰陽開闔小梅春；世  
間大有堅牢物，百鍊精金百病身。

玉堂輩行十科強，坐閱升沉到老蒼；對語每憐多足絃，加餐難盡萬頭羊；琴書無恙宜長壽，身世多憂付健忘；小  
雪園林佳客至，（謂東甫鳳笙）莫將人事惱年光。

自編文業寫蘭縑，著述新來一尺添；婚宦已消情慾半，文章常與病愁兼；治聾休割東坡耳，（君患耳鳴）投鐮

逾豐柱下髯，猶有十年台閣事。瓚公語在難侯籤。

次韻和爽翁賜題新拓小閣子一首

閣外西山翠欲流，小詩貽我極鐫鏤。雖添杞菊周三面，台視松篁出一頭。酒趁卯時傾鑿落，歌翻子夜付空侯。陽元水碓猶堪守，懶與將軍典射籌。

再酬爽翁詠小閣子

玉水輕冰寸許添，安排暖閣待清談。雨花不到維摩室，開粥聊同彌勒菴。鍾傅帖曾書內舍，涪翁詩亦詠寅菴。與公歲晚同安樂，那識人間七不堪。

生日作

平津閣裏久回翔，旅食東華暑換霜。監稅徵還蘇右諫，參軍仍用謝中郎。綺羅筵上攜文度，書畫船中著孟光。司馬久應方外看，少時輕俠未全忘。

三蕉葉後已陶然，學佛無成且學仙。淡泊儒門深雪夜，飛騰暮景晚霞天。意肩氣色輸時輩，貂脚功名稱老年。爲款絳紗詩弟子，虛糜十日畫叉錢。

次爽翁韻

何限曠心飄瓦過，幾多好手善刀藏。靜中素女傳丹訣，老去瞳人借鏡光。硯水不冰依虎竈，瓶花如雪點茶牀。徧嘗百草無靈藥，祇許當歸入祕方。

呈竹翁

去來遼海千年鶴，成敗長安幾局棋。縱有臥龍天下士，其如殺馬道旁兒。後生每有才多患，前事能無痛定思。舉世滔滔人意懶，蜜梅花底倒深卮。

疊韻呈爽翁

公是中朝范履霜，高名那得酒中藏。欲知道力觀生勝，（公有生勝論白成一子）偶畧僧名學飲光。爲念天寒呼藥粥，頗疑地暖有砂牀。毛生已笑蘇公陋，漫把鷓鴣擬雪堂。

再呈竹簣少宰爽秋太常

曉枕時聞長樂鐘，乞居散地得從容。都言唐肆堪求馬，久已天池罷象龍。身病倘尋前蓄艾，歲寒誰識後凋松。蓬門長得高軒過，尙爲攬仙一曳筇。

爽翁贈于諫議詩自言效樊山體亦繼作吳體一篇殊不似漸西也

陶侃近作廣州督，鄒生舊爲桐府賓。久依劉表非本志，（用杜夔事）不負衡青惟此人。廿五日中伏豹值，九重天上批龍鱗。望衡祇隔白楊巷，何必娜如山結鄰。

齋居

鵝鵲樓前雪未消，鮒銜遲日照無聊。酒名雅愛梨花白，硯質深憐熨斗焦。石筍高低三座塔，瓶笙早晚兩回潮。詩人晚達猶非分，且與冬膏證後凋。

三疊韻呈爽翁

五十頭鬢薄薄霜，閉門人海且深藏。食江陵橘留金絡，烹建溪茶玩綠光。擁鼻謝公耽洛詠，曬頭王大去胡床。（公家法最嚴子弟都無習氣）向來六鶴歸何處，朱邸今爲問字堂。

比與廉生談多憂生歎老之意強爲併體以自壯腹聯廉生當之無愧色也

對酒當花笑口開，楚人呵壁謂何哉。倘逢原憲卿真富，若較錢鏗我尙孩。天子私人登玉署，神仙夫壻在瑤台。揚雲西漢文章手，慣作離騷反面來。

□ 小除日簡廉翁爽翁

小除風日漸清妍，已有春光到柳邊，鎖印直過烟九節，（正月十九開印）看花喜遇月雙年，（明年閏八月古以閏月兼本月爲月雙）試斟案上長恩酒，懶積牀頭撲滿錢，吉語蟬嫣須料理，歲朝利市在紅箋。

□ 水仙

機羅冉冉波波出，佩玉微微隔浦聞，冰雪滿懷猶旖旎，人花一氣互氤氳，海紅簾幕來香雨，水墨屏風畫粉雲，一種甜和好芳澤，人間梁迭不如君。

□ 除夕疊翁韻二首

葦下光門說最妍，（古樂府光門最妍雅）冷官居近液池邊，酒浮春綠論千日，樹種冬青號萬年，（萬年枝卽冬青樹）綠綺婦嫺雙瑣調，紫荷兒貯五銖錢，雞占鏡卜紛來問，待與癡人作鄭箋。

座上珍袍絢赤霜，酒邊兒女賭鉤藏，書酬白璧連城價，（今年買書幾二千金）燈賽明珠照乘光，迷迭飄煙薰畫幃，流蘇垂地媚紅牀，舉家守歲梅花下，何減南湖玉照堂？

□ 朱觀察爲廉生臨黃筌杜鵑圖此圖先有顧祁二臨本朱又臨朝岡本也

高堂七尺珊瑚樹，臨本曾觀顧與祁，省識南宗傳鉢意，硃砂染出第三衣。  
不見朱郎十七年，公然妙筆繼熙筌，秦淮多少臙脂水，蘸上吳綾寫杜鵑。

□ 新春

軟紅塵裏一閒官，竹馬泥牛與未闌，元旦占年六壬課，春風款客五辛盤，老猶賭跳誇身健，狂欲呼盧忘手寒，見說銅街燈事好，鳳城今是五回看。

□ 余在渭南關東園以居近爽翁亦有東園賦詩奉粲

白蘇並以東坡號，洗竹澆蔬各自忙。湖在杭州如在穎，（穎亦有西湖）墩歸謝氏亦歸王；性情彼此親魚鳥，池館伊誰奪鳳皇？東馬卽今隱朝市，高風直接紫芝鄉。

□爽翁賜和前韻奉酬二首

洛中龍鶴真同調，暫脫當官簿領忙。州宅東西詫元白，（元在浙東白在浙西）詩名南北擬朱王。田廬各欲營陽羨，花木何勞侈贊皇？天假城南二頃地，儀秦卷舌競還鄉。

久慕南豐一瓣香，官閒翻爲和詩忙。崧衡故是千山長，江漢爭朝百谷王。齋日秉圭祀青帝，靜中調息養丹皇。清文朗抱俱冰雪，不信京華是熱鄉。

□春興

春風似帚掃閒庭，土潤無塵雨乍經。紅索金鈴花護法，雕梁文杏燕居停。消殘浦雪波微綠，落盡園梅子漸青。坐見西山開笑靨，一冬濃睡近來醒。

□三疊王字韻呈爽翁

白蘇以後抗顏行，除卻府酬有底忙？身世蹉跎老商婦，歌詩旖旎小秦王。洛人標榜花爲后，楚客猗嗟樹有皇。草木猶知重聲價，人生不合隱江鄉。

□四疊前韻寫懷

豔體西崑錢與楊，戲拈小令改閒忙。杯中綠茗呼森伯，臺畔紅梅媚定王。酒味參差分蜀洛，竹根連理效英皇。漆牀藻掇華胥界，擬學陶南老是鄉。

□贈京尹

京兆風流世所知，章臺拊扇意遲遲。花迎水部居東閣，月照山公過習池。晚出詩人衝馬首，早朝天子問蛾眉。香

山一拜河南尹，卽是平遷少傅時。

□題石甫詩集卽送之江左

不將鄴瓦爲君硯，那稱陳王繡虎才。三日耳聾龍箴篋，彌天雲起蜃樓台。一春芳草王孫去，六代青山幕府開。嶽嶽樓船滄海上，涼風能不望蓬萊。

□送壽平弟出守思恩

嶽嶽中朝獨角麟，一麾手把下丹宸。昌黎渤海原非貶，夢得連州况有親。卜宅蓬萊三島近，（時寄家都下）到官焦荔一時新。薰風萬里田州路，矻烏蠻花在處春。

滿眼風花悵別離，與君同氣復同枝。虛名已媿稱前輩，經術無勞說本師。數以高文求點定，盡將尺牘付裝池。夷吾大有勳名在，不是新亭灑淚時。

□四月廿二日胡公度給諫招集松筠菴卽席送高公前輩張次珊同年出都

諫草堂開酒膽粗，朝班何意失英儒。批鱗逢怒古來有，攜手言歸當世無。薊北漫騎高骨馬，江南飽食四腮鱸。東門帳飲今猶盛，別有賢哉二大夫。

□留別府主

渭濱久擬荷漁叢，豈意冥鴻赴禮羅。歷馬經年飽綠豆，池魚終日躍恩波。才難濟變行歸矣，心欲酬知奈老何。願洗甲兵終不用，盼公隻手挽銀河。

□前詩意有未盡再呈一首

昔捧鸞綸入帝畿，相公知遇古來稀。新恩特許居東閣，舊恨真能補北扉。直爲米珠髮坐困，非關蕪菜託先幾。也知難免親朋笑，又似當年落第歸。

感事

夕烽斗起照邊坡，塗炭衣冠可奈何？十國軍門操鎗鎗，五城無地不干戈。天真雨血污金甌，夜有飛頭飲玉河。收召黃巾歸宿衛，羽林從此健兒多。（一作祇今羣盜羽林多）

旅懷

盡室崎嶇繞北邊，圖書零落况釵鈿。兩重崧嶽肩頭擔，六月冰霜口外天。濁酒且從諸弟飲，敝裘分與女郎穿。回頭說似張儀婦，吾舌猶存莫惘然。

入雁門

雁門山色入雲斜，危磴盤紆一駐車。躡足百重皆鳥道，回頭千里盡龍沙。虬松尙是前朝樹，蒼粟新看內地花。滿目河山似唐季，赤心何處得朱耶？

雨後發徐溝贈胡研蓀太守

曉煙如水溼行衣，罷畫林巒見亦稀。桑葉油油分雨色，榴花醋醋弄晴暉。久騎棧馬還思騁，不聽橋鶻也念歸。等是上林春後雁，西來仍作一行飛。

太原感事和研蓀

烽火驚心去上都，晉陽依樣畫葫蘆。仙山附會童男女，歧路流離士大夫。（京朝官奔晉者數十家）蕭斧盡膏黃口血，背嵬俱是綠林徒。問君十萬橫磨劍，當得西來鐵騎無？

平陽旅舍湫隘七月三日攜家人過大雲寺納涼晚歸遇雨有作寺中有大佛頭

清風挽不來，炎暑推不去。城中好蘭若，相距可百步。此亦避暑宮，攜挈挈茶具，入門導兩袖，盤紆得幽處。金浮圖五重，佛顛此焉貯。高若百尺幢，巨逾十石瓠。眼耳大光明，華鬘垂寶璐。其前爲廣廊，檻漆剝丹素。花甃如掌平，筵可

七重布，於茲敷坐席，兒女驩相聚。撒地有苦錢，拂雲有高樹。羅襟受涼風，恍與故人遇。譬如旱地苗，灑以楊枝露。安得依瞿曇，鉢單作常住。

秋夕書感 同文

南江落葉一輕舟，住處何人識旅愁。藍面恨人傷世亂，白頭憐我誤身謀。含花燭影雙枝玉，墜雨檐聲數點秋。堪笑一鷗閒似客，菴西出月度鐘樓。

樓鐘度月出西菴，客似閒鷗一笑堪。秋點數聲檐雨墜，玉枝雙影燭花含。謀身誤我憐頭白，亂世傷人恨面藍。愁旅識人何處住，舟輕一葉落江南。

知誰瘦減帶圍腰，起詠新寒夜燭高。悲老杜鵑聞北蜀，返仙丁鶴語東遼。啼鸚隴月秋吹笛過，雁胡天血洗刀思。夢有人懷北闕池，荒墜葉雨瀟瀟。

瀟瀟雨葉墮荒池，闕北懷人有夢思。刀洗雪天胡雁過，笛吹秋月隴鸚啼。遼東語鶴丁仙返，蜀北聞鵲杜老悲。高燭夜寒新詠起，腰圍帶減瘦誰知。

晉陽五首

晉陽西指玉衣寒，跋履真如蜀道難。蟲滿液池傷仆柳，馬嘶宮禁泣幽蘭。麻鞋閒道奔行在，豆粥無人勸御餐。猶有前朝豹房月，居庸夜出揭帷看。

大同宣府羽書頻，郡縣交迎玉輅塵。乍進翟榆輝蹕路，漸看豹尾備鉤陳。金戈鐵馬風雲慘，紫蓋黃旗日月新。不意今年秋社飯，百官齊念老來身。

宮車曉度雁門深，御宿逶迤白日陰。夜雨淋鈴雙眼淚，長星勸酒萬年心。蛟蟠一峽愁青玉，虎臥重關扼紫金。謂升吉甫方伯，誰識幽燕諸敗將，執戈爭擁翠華臨。



太原亦是龍興地，日角當年此啓都。南渡至今卑晉宋，中天眞欲返唐虞。（堯舜皆都晉）已頒北闕求言詔，盡免西巡所過租。好製清溪中興頌，雪香裊體莫悲吁。

回首金臺落照餘，奉先宮殿近何如。太妃兩膳開蟾鎖，（夷問官中有何人）蘇喇云有咸同王位。夷人令照常進膳，留守雙丸走蠟書。畿輔百城等僑置，朝官連日有新除。行宮夜見傷心月，爭怪常儀綠鬢疏。

□秋夜過彥孫 回文

詩人瘦似竹枝斜，好句題牆護碧紗。飢忍鶴田秋盼雨，影收鷹鏡晚明霞。詞家兩寫箋頭雁，樂部三催笛裏花。遲過月寮虛掩箔，宜斟淺淡越甌茶。

茶甌越淡淺斟宜，箔掩虛寮月過遲。花裏笛催三部樂，雁頭箋寫兩家詞。霞明晚鏡鸞收影，雨盼秋田鶴忍飢。紗碧護牆題句好，斜枝竹似瘦人詩。

□疊韻柬仲綱弟 回文

詩窗玉色一川斜，影動簾波月浸紗。飢雁憶鄉蘆漫雨，瘦螿宜酒菊爭霞。詞箋玉海人傳藝，畫鏡禪牀女散花。遲久願君過晚飯，宜相愛處淡湯茶。

茶湯淡處愛相宜，飯晚過君願久遲。花散女牀禪境畫，藝傳人海玉箋詞。霞爭菊酒宜螿瘦，雨漫蘆鄉憶雁飢。紗浸月波簾動影，斜川一色玉窗詩。

□午橋中丞出關迎駕旋拜使豫之命再疊前韻奉寄

詩中泚水一橋斜，曉驛霜風透帽紗。飢宦薄分金掌露，（扈從諸臣日有賜金）侍臣名耀玉關霞。詞人馬遞飛書檄，院女龍游近策花。遲謁上方西駐蹕，宜春小貢御團茶。

茶團御貢小春宜，蹕駐西方上謁遲。花輦近游龍女院，（傳聞駕幸玉泉）檄書飛遞馬人詞。（各國頻有書疏）

霞關玉耀名臣侍，露掌金分薄宦飢。紗帽透風霜驛曉，斜橋一水汴中詩。

繡綺極愛余迴文詩三四疊前韻 回文

詩錦織文迴綉枕，字珠真滿畫屏紗。飢人楚菊餐寒雨，靜女秦簫閣晚霞。詞和舊題雙管翠，髻梳新樣一釵花。遲來月色猩簾暖，纔蕊秋香送井茶。

茶井送香秋蕊細，暖簾猩色月來遲。花釵一樣新梳髻，翠管雙題舊和詞。霞晚閣簫秦女靜，雨寒餐菊楚人飢。紗屏畫滿真珠字，枕綉迴文織錦詩。

詩箋玉葉幾行斜，帖上蠻紅小格紗。飢鳳一餐香徑竹，斂蛾雙暈酒邊霞。詞填夜雨輕敲玉，錦曬秋畦滿種花。遲日綺雲香閣暖，宜看細筆畫山茶。

茶山畫筆細看宜，暖閣香雲綺日遲。花種滿畦秋曬錦，玉敲輕雨夜填詞。霞邊酒量雙蛾斂，竹徑香餐一鳳飢。紗格小紅蠻上貼，斜行幾葉玉箋詩。

遣懷 回文

燕遊倦後馬歸秦，貴甚儒林學道人。妍菊淡然顏欲老，小梅紅矣奈何春。天隨也樂尋瓢笠，月上（樊榭妾）虛言侍櫛巾。圓式玉釭添炷麝，烟紗碧送晚香新。

新香晚送碧紗煙，麝炷添釭玉式圓。巾櫛侍言虛上月，笠瓢尋樂也隨天。春何奈矣紅梅小，老欲顏然淡菊妍。人道學林儒甚貴，秦歸馬後倦遊燕。

竹延尤愛余迴文詩疊韻爲贈

燕如不築金臺峻，大國秦誇最有人。妍色女同書本善，老年人笑柳衣春。（竹延新製翠茸裘）天寒薄酒賒頭，夤夜坐枯棋對角巾。圓顆數珠經轉罷，煙籠淡月晚來新。

新來晚月淡籠煙，能轉經珠數顆圓，巾角對棋枯坐夜，鬢頭賒酒薄寒天。春衣柳笑人年老，善本書同女色妍。有最誇秦國大，峻臺金築不如燕。

遣懷詩韻聯亦作妍菊晚香無奈老滿梅寒意有何春繡漪以爲佳因足成之 同文

燕秦隔斷書空雁，柳畔池臺北望人，妍菊晚香無奈老，滿梅寒意有何春。天於遠道紆鸞錦，雨作啼痕漬麝巾。玉琢槽檀鳳紫，轉喉車子曲翻新。

新翻曲子車喉轉，紫鳳檀槽琢玉圓，巾麝漬痕啼作雨，錦鸞紆道遠於天。春何有意寒梅滿，老奈無香晚菊妍。人望北臺池畔柳，雁空書斷隔秦燕。

四疊韻示竹延 同文

燕薊別來西望秦，散花知否是天人，妍詞宋杏紅情綺，古畫唐梅粉朵春。天醉已回難止酒，月弦初上怕沾巾。甌白定香茸紫，翠滴簷花賞雨新。

新雨賞花簷滴翠，紫茸香定白甌圓，巾沾怕上初弦月，酒止難回已醉天。春朵粉梅唐畫古，綺情紅杏宋詞妍。人天是否知花散，秦望西來別薊燕。

次竹延遺懷韻 同文

新錄夢華京信遠，念誰花踏軟紅塵，眞傳鶴態梅姿豔，佩結珠雲楚女神。人贈好詩閒臥雨，病緣多酒罷遊春。茵如碧草香縈座，畫入春桃訪李因。（李今生女史名因工畫花卉）

因李訪桃春入畫，座縈香草碧如茵，春遊罷酒緣多病，雨臥閒詩好贈人。神女楚雲珠結佩，豔梅鶴態傳眞塵。紅軟踏花誰念遠，信京華夢錄新。

送晴谷同年南歸

挂冠投版思依依，畏壘庚桑忍竟違？一物不爲羊續取，諸生欲從馬融歸；九巖山色低愁黛，六馬陵前送落暉，百萬哀鴻集中澤，使君清淚濕行衣。

罷坐琴堂早晚衙，常參班裏有仙家，眉山長假因葍菜，彭澤卑官換菊花；矮燭秋窗吟夜雨，幅巾歸路訪棲霞，此行一飲中泠水，卽是人間自在茶。

先後關中角政聲，文章韓柳復齊名，裴碑已值三千緡，趙璧猶當十五城；大府亦呼前進士，新科多是小門生，杜陵一老瞻南斗，渭北江東無限情。

春水生時始戒塗，藍田別業暫閒居，紅梨賦就多新槩，黃驥馱歸有報書；海上鯨波今若此，山中鶴柴近何如，南徐北庾遙相望，莫遣星郵信息疏。

生日作

居士壺中別有天，早歸三輔避烽烟，髭髥髹漆無霜染，兒女青紅比月圓；下杜桑麻虛左契，東園芝草補衰年，箬牀茶竈梅花下，小小茅齋卽釣船。

及門諸子見和前韻賦答一首

天寶而還又奉天，此身一再見狼烟，漫希衰白扶靈壽，試數英雄煮脆圓；簾裏書聲沈驛士，花時歌曲李龜年，窻梅一樹垂垂發，好與嘉賓送酒船。

十二月二十二日招同午橋中丞潤夫副都實甫觀察笏卿比部彥孫仲錫兩太守小集身雲閣卽席有作

德星都傍草堂移，老去襟情謝竹絲，置酒東坡生日後，上燈南竺小紅時；今田昔海麻姑米，始戰終和謝傅棋，更莫羨溪芹消夜永，明年鎬洛費相思。

豐橋

豐水迴看瀾水遙，一般垂柳拂虹腰。東西各自銷魂處，祇在青紅線兩條。

和後村十老詩

老將

衛青奴僕坐專征，天子焉知李廣名。大小身經三百戰，存亡淚盡八千兵。匣中寶劍驚魍魎，臂上金創驗雨晴。今日朝廷急邊事，可無手詔問營平。

老儒

十科難得主文知，金榜無名淚暗垂。青史未諳唐宋事，墨程苦守正嘉時。高談封建師王者，閒伴童蒙點學而。三月幾曾知肉味，黃齏百甕最相宜。

老醫

曉起稀聞款戶聲，懸壺老矣未知名。徒誇三世傳鍼訣，懶教諸兒誦脈經。枕底丹方經驗少，袖中紅紙謝儀輕。肩輿偶視朱門病，歸去逢人詫藥靈。

老僕

少年也解愛樵青，今作花前病鶴形。絮纈羹湯朝卽醉，謹嚴門戶夜常醒。答兒老婦偷聲罵，勸學諸郎帶笑聽。贏得主人獎忠義，朱門三世仗奴星。

老妾

退爲房老幾何春，衰醜翻爲大婦親。手硬怕梳嬌女髻，分卑難議小男姻。蒸鹽料理還多事，巾櫛祇承別有人。三十年前團扇字，空箱檢得一沾巾。

老妓

粉薄鬢疏意態輕，人前掩抑尚風情，更無燕子樓堪住，擬嫁浮梁客未成。白下早凋秋柳色，黃州不記海棠名。斜陽錦樹林邊過，獨傷心是玉京。

老僧

少多災疾寄檀林，雪刺盈頭艾炷深，徧訪同參惟見塔，欲裝古佛恨無金。腹虛枉託求齋鉢，目眊難穿補衲針。十上普陀三入藏，早年行脚到如今。

老吏

工爲鬼蜮與人殊，抱牘堂前慎走趨，累世居倉成大鼠，有時分芋弄羣狙。印偷聖相知能返，錢盜乖崖不畏誅。包老來時翻得計，愈清嚴處愈糊塗。

老兵

名在燉煌戍卒中，封侯無命戰無功，能言大業開河事，身是新豐折臂翁。伙伴早埋雞寒骨，兒孫猶賴羽林弓。中興將帥都曾見，幾箇驕豪得令終。

老馬

伯樂前頭仰首鳴，飲冰傷骨記長城，行遲莫逞施鞭手，齒鈍稀聞齧草聲。伏櫪悲深王處仲，望歸開過李西平。多年官料支三品，豈意今爲隸圉輕。

廣後村十老詩

老臣

白首丹心佐上清，眼看子弟到公卿，諸王出閣恆爲傅，千叟擎觴盡讓兄。每笑師丹多忘事，肯同危素自稱名。洛

陽年少多才氣，知否君王重老成。

老友

總角論交白髮鬢，性情文字耐咀含，別來雲樹無重數，相見滄桑話再三；身貴不忘同應舉，詩來或詫晚生男，祇應借入蒼英會，圖畫風流傲劍南。

老令

百里栽花四十春，一生官職爲他人，等身黑牒朝朝判，過眼黃金歲歲貧；妻子豪奢拘檢少，台司風旨揣摩頻，怪來官轍平如砥，時有私書謁要津。

老幕

長揖諸侯七十翁，蓮花幕裏鬢霜濃，獄詞烏府教詳定，臆說龍莊有異同；萬事繁難求伯始，一生法律守文終，門牆高弟多於鯽，暮布星羅列郡中。

老役

阜帽低斜赤棒輕，押衙何意到稀齡？曾遭台憲三除卯，不記琴堂幾拔丁；幕內苞苴憑出入，民間牙角慣調停，少時看種甘棠樹，今見喬柯百尺青。

老農

老向田間課雨晴，了無機事桔槔輕，教尋巾屨迎田祖，爲辦飴鹽入縣城；問字有孫上冬學，扃門無吏擾春耕，綠楊陰裏茅柴酒，閒與鄰翁祝太平。

老漁

閱盡鱸香亭畔秋，一生笠釣伴閒鷗，江邊魚市依紅樹，洞口桃花笑白頭；宦海風波歸冷眼，晚霞身世倚扁舟，霜

清月白羊裘，暖爛醉狂歌且睡休。

老估

大腹蒼髯智數深，珠盤消盡一生心。得妻多是琵琶伎，報國虛量栲栳金。茶藥市中迎鳥客，金蘭簿裏數詞林。士流不及商材重，桑孔遺風復見今。

老嫗

五夜縫裳目力艱，青唇吹火晝無閒。竈前喜聽諸郎讀，花下噴梳小婢鬟。可有酒錢分閬苑，略能詩意解香山。髻花紅映鳩茶面，又與卮娘伴嫁還。

老伶

花落江南不算春，龜年淪落在風塵。能歌天寶當時曲，猶是何戡向上人。槃燭漸成師曠替，衣冠曾寫叔敖真。野狐休唱零鈴雨，南內萋迷月似銀。

入夜再賦

玉釭添火暖紅房，卍字簾櫳煖聚香。絳燭垂花人睡早，熏籠亂搭繡衣裳。

六月初二日除陝西臬使仍兼政務處提調恭紀

天書五色下明光，秉憲秦台肅對揚。一日長慚居柏府，三年前向宰桐鄉。故人明日無私謁，新政羣兒忍謗傷。獨酌新豐纔幾日，飛騰接武馬賓王。

一再行京謁冕旒，非常恩眷信無儔。三司條例中樞定，兩制絲綸外集收。近對天顏知有喜，感深恩地報無由。家傳湮背精忠字，敢復林泉說臥游。

壬寅元旦行宮早朝



千官委佩拜觚稜，閭闔風來曉色昇，日月雙懸天北極，山河重秀國中興；已知春草生燕壘，莫費天錢買浙鏡，豹尾鈎陳無恙在，好將玉座襲黃綾。

女堯行殿對南山，玉鎖葳蕤闕曉寒，篋裏貢香聚芸荔，壁間御畫捲松蘭；杏花從此宜宮體，鸚鵡猶知問聖安，當國夷吾須努力，不忘在宮古今難。

寄懷午橋中丞

鄂王城北擁旌旗，秦客時時問起居，金埒自肥沙苑馬，瑠盤稍厭武昌魚；手鈔政要唐貞觀，心薄虛名夏泰初，絕似前朝太平世，江南閒煞老尙書。

退衙山色寫燕支，（撫署枕燕支山）想像郊原攬轡時，安晚心情登塔見，稼軒筋力上樓知；（丁令來言公屢上鶴樓及寶通寺塔）興來東閣連呼酒，別後長安似弈棋，可得忘情桑梓地，願公深惜庶民脂。

用元日早朝韻寄沈學使即送之漢南校試

老來退筆少鋒稜，瘦沈何心畧彥昇？嬉笑文章蘇內翰，精嚴書法趙吳興；買書似貸飢人粟，講學如逢暗室鐙，別爲涇原開學舍，洞規一一寫吳綾。

四牡前驅紫柏山，鎖廳佳茗試春寒，誰爲柴枯誰爲虎？半采貧薑半采蘭；庾幕賓僚俱薜蘿，吳姬書字報平安；（君姬人在吳）歸時細檢門生籍，欲得明珠照乘難。

燈夕

紅蓮千朵接行宮，曾駐鑾輿信不同，璧月倒懸千里鏡，珠燈眩轉萬花筩；消磨燭淚春風裏，撿撥詩心綺幃中，百丈紅綃作帷幕，分明人影在紗籠。

久不得石甫消息以詩訊之

儉府紅蓮合付誰？匡山未免戀春暉，侍中羞向雞羣立，祕監知從雁後歸；雕武祇今仍玉貌，休文多分減腰圍，春風昨送金輿返，會召仙郎入粉闈。

□ 上元微雨

勝日休衙早，輕陰度幔遲，春風催粉箭，細雨濕燈枝；安鼎教生火，鈎簾看散絲，魚龍嬉水部，殊有舊京思。（都門燈事以工部爲勝）

□ 寄竹延

一載彭宣去絳帷，樊南水木減清暉，名題玉女蓮花頂，淚漬天吳紫鳳衣；七二鴛鴦紆左顧，一雙鸚鵡伴東歸，（君居陝一年得知縣以去）憑君爲作南園記，我亦新昌曾子飛。（山谷南園記爲其姑輩曾子飛作）

□ 自嘲

外台聚躐擁朱幡，日噉無多奈事繁，善馭且須留馬力，微吟時復代禽言；眼如霧裏看花狀，鬚抱人間不白冤，每日肩輿呵殿去，可能看竹辟疆園？

□ 戊辰北上見粵中女士題壁詩絕佳三十年來猶能記憶偶復和之

淚如春雨不曾晴，紫鳳葳蕤賦北征，莫上銷魂橋上望，西京亦是綠楊城。（原詩楊柳不知離緒惡東風吹綠許昌城）

容光減後羞臨水，筋力差來懶上樓；見說離愁轆轤似，眉頭纔下又心頭。

□ 八月六日入闈見新月

纖纖雲際月，掩抑在風檐，夜寂銜枚馬，霜明嚙鎖蟾；天香幾枝桂，畫燭一重簾，雙織登科記，姮娥事轉添。

□ 光緒壬寅秋補行庚子辛丑兩科鄉試秦晉合闈朱益齋段春巖兩編修典秦試曹再韓編修楊味春侍

御典管試余爲吉甫中丞奏派提調同日入闈奉呈四首

寰海澄清玉鏡光，西京鳴鳳叶歸昌。六千君子衿纓肅，（兩省合六千餘人）二七房行翰墨香。羸氏鹿含推食意，（鹿得食相呼故小雅以喻嘉賓）月中桂有借根方。從來秦晉如兄弟，四榜人才列雁行。

帝簡仙曹主粉闈，冰衡玉節有光輝。鸞鸞接翅銜丹詔，紫豸圖形上繡衣。苑洛英才金在冶，河汾學派水知歸。占星夜起看東井，的的文昌拱紫微。

帖括騷除且帖經，崑山出玉桂傳馨。策須左史陳堯禹，論要東坡議賞刑。凡骨難爲燕市馬，瑣聞無取豹文廳。盡知大九州中事，纔許褒衣對帝廷。

風起雲揚兩榜開，尙書臂指亟需才。虛慚二紀稱前輩，曾帶三司綜外台。（夙嘗提調政務）中國畫梨西學鼓，新科桃李舊人栽。橫渠老見城南獵，尙擬關弓躍馬來。

□ 牡丹八首併序

洪北江謂古今牡丹詩，罕作正面文字。趙甌北輒賦八首，及明年又作如前詩之數。北江稱譽至再。今讀其詩，適成爲甌北體耳。小園牡丹二叢，作花甚穠，以詩賞之，如趙之數。後人視樊山詩，殆如我之視甌北乎？辛丑三月朔日。

知是雲翹是玉卮，花陰正午睡靈狸。華鬢世界香如海，台閣文章妙入時。李白平章妃子貌，姚黃成就狀元詩。多因行在春風早，莫訝今年穀雨遲。（清明後小園牡丹已開）

紫絲步障玉紋茵，命婦莊嚴有告身。七寶樓台成片段，六朝金粉寫丰神。花中姊妹憐卿貴，世上王侯爲汝貧。回首可憐崇效寺，如今不算鳳城春。

爲后爲王在洛中，品花亦自有真龍。衣飄紫鳳天香醖，酒醱黃鵝御愛濃。芍藥教行丞相事，海棠合受貴妃封。（

誠齋詩海棠花貴妃，雕欄玉砌尋常甚，待起黃金屋數重。

天意陰晴曉未分，鈴聲幡影護香君，光風宛轉琉璃地，煥雨蒸騰樓閣雲，貴甚商周清廟器，富於唐宋大家文，爲卿別奏鈞天樂，郊島酸吟那得聞？

空谷幽蘭是假王，漢宮飛燕倚新妝，寶光七尺珊瑚樹，氣味三勻瑞腦香，眞富貴人賽貂錦，殺風景語譽蠶桑，金花箋上宜宮體，肯與村梅較短長？

二月園林尙淺寒，畫妃亭畔倚闌干，花酥好喫觀音素，豔體修成至寶丹，一品衣存儒雅態，百年樹與子孫看，人生合作鞦韆老，錦瑟傍邊夢亦安。

城東菴子萬花研，仿佛瑤台聚八仙，錦洞天爲長夜飲，銷金鍋擲買春錢，月中玉佩承清露，屋裏香鑪滷紫煙，莫對名花誇北勝，北都葵麥太蕭然。

樊川最與紫雲親，沈醉東風爲寫眞，女障子應圖舜舉，游仙詩欲擬堯賓，世間買貴臙脂價，鏡裏妝成金翠人，一捻殷紅天寶事，至今顏色尙如新。

再詠牡丹

宜稱羅虬九錫加，能行解語互矜誇，溫柔椒殿推宜主，端重蘭台有大家，自笑金荃姬妾草，（山谷詩香艸當姬妾）意輕紅杏狀元花，不須更泛金船酒，自有香光上臉霞。

移春檻畔見娉婷，蝶陣蜂圍已慣經，見日十重金鎖甲，障風九曲水精屏，芳名六一堂中譜，豔曲臨川夢裏亭，日夜朱門門絃管，安知露媚與煙惺？

傳聞賜紫自蓬萊，白玉堂前奉勅裁，紅粉妝擎一尺髻，眞珠雲起九層台，（牡丹有九蕊眞珠紅）仙裙特地教留住，青眼何人不看來，知道天心深愛惜，十分春足始教開。

萬花俯首奉君王，虎樣春風不敢狂。  
殿開丹青圖玉貌，衣裳朱紫染天香。  
並頭已賽金鸚鵡，入夢當爲綺鳳凰。  
碧玉小家望顏色，一齊宮樣學梳妝。

何限佳人妒汝佳，偷描小朵綉弓鞋。  
妝添猩猩暈雙唐格，（妝樓記婦女點注有猩猩暈雙唐格諸名）  
蕊颯鸞雛九子釵。  
金谷夜游宣酒令，玉樓春色入詞牌。  
太儀乞藥昭陽斬，第一花應植玉階。

風前歌扇倚紅鸞，標舉靈芬爲染翰。  
比似才人真綉虎，譬如嬌女亦金鑿。  
文章得氣兼春夏，風景宜人半暖寒。  
一品班中榮九命，紫泥封付豔妻看。

雕文臺座五雲中，香案前頭一朵紅。  
紫錦夜局羣玉府，銖衣曉出蕊珠宮。  
揚州金帶風斯下，秦氏朱樓日在東。  
繫馬花前纔一晌，歸來都似麝香驄。

平原十日酒行遲，綉汝真需五色絲。  
紅到中心無缺陷，綠須百葉與扶持。  
寵移唐苑三千女，香醉封家十八姨。  
猶有洛陽年少意，爲卿重賦玉台詩。

徐六攜一僧游南五台戲贈

五台飛翠入煙霄，四月山花笑紙袍。  
居士南游攜柳栗，上人偏袒吃櫻桃。  
丹房雨細瓶花落，絕頂風多帽屋高。  
終是山東豪傑士，龍湫洗眼瞰神泉。

春暮卽事用雙聲體索石甫諸君和

君家教借錦鞦韆，倒打顛當（蟲名）淡蕩天。  
書扇直稱詩史氏，兼金積欠酒家錢。  
欲圓月怨銀雲掩，好合花橫畫幌寒。  
轉燭照妝珠帳捲，簷陰玉雨夜搖煙。

拖藤停踏退廳苔，翠草參差錯綵纜。  
翳葉延鶯綠雨潤，呵毫畫蟹換花回。  
西軒醒憶仙鄉杏，滿幔眠迷妙墨梅。  
喚盃花壺何滑笏，另拈菱蕩嶺南來。

卽事二首用疊韻體

嗟嗟迤邐可摩挲，索烙波波（見茶村詩）佐叵羅，絡角蘿蘿何婀娜？和歌芍藥頗婆娑，呵鵝促坐坡陀左，捉鶴

俄過瑣閣阿，郭橐駝家多果蔗柯，峨角楚莫蹉跎。  
洞窗紅鳳狂東風，供奉離宮穴從同，中棟松樅從臙腫，重弓虹蜺恐朦朧，躬從東隴逢龐統，（用龐德公採桑事）  
衆捧空鐘諷孔融，寵寵紅紅總同夢，銅龍猛動送登冬。

和石甫感事元韻

民受夷吾賜到今，莫將左衽誤沈吟，郢人舉燭非初意，曾子泔魚無異心，元亮何傷瑕後璧，不疑直認盜來金，語  
言小過非臣罪，終荷明廷鑒賞深。

九月十八日公宴四星使於兩湖會館中丞以下與宴者三十餘人合樂行觴閱四十刻始罷賦詩紀事  
月卿星使駐幃帷，榜後從容薦玉卮，伯仲填隴今盛事，（是科兄弟同榜者十餘人）叔孫繇叢舊官儀，曲江紅  
杏蜚英早，老圃黃花入鬢遲，他日鳳凰池上憶，變龍遙寄唱酬詩。

伊州一曲奏鳴笳，紅燭暉爭定子霞，迤邐自彈金粟柱，蕃釐豔發錦裙花，衣冠前已趨行在，歌曲今猶唱本家，醉  
裏不知清漏永，萬年枝上月珪斜。

回頭庚子日斜時，豈意今宵舞柘枝，暈翟淒涼宣府月，鯨魚跋扈定昆池，轉旋天地由明聖，整頓科場仗主司，收  
合榷楠支大廈，酒杯全爲得賢持。

清華侍從盡同官，對酒當花續古歡，丹鳳九苞曾借樹，神羊一角互彈冠，歌辭楊柳聲情美，輩行梅花骨相寒，我  
亦當年潤域長，何堪在側賦詩難。

疊韻索諸公和

衙齋無改業，生帷車騎頻來共。酒卮黃絹詞工，推院體紫毫筆在。識臺儀，羹調白菊香何晚。燭引金蓮出每遲，（淇泉恆籠燈拜客）欲仿虹亭徵本事，樊川連日有新詩。

延秋門外動秋筵，無限詩情爲晚霞。寒翠不凋烏府樹，小紅猶訪鶴林花。程文傳寫門生手，尺牘珍藏好事家。爲聽伊涼徵菊部，依然胡舞白題斜。

采珠搜玉答明時，裊裊秋風動桂枝。翠琬新鐫雙起塔，（城南雁塔有二）紅綾舊地一臨池。（八仙菴卽興慶池故址，唐詩賜紅綾餅處）功名已擬歸先輩，文字安能諱有司。聽奏霓裳羽衣曲，鈞天清夢要扶持。

忘是真官是達官，水邊灘下足清歡。杖藜人寺休呵殿，道服延賓不著冠。鬢雪饒人依舊黑，頭冰到底一條寒。祇愁喚醒煎茶夢，明發青門折柳難。

■午橋中丞監臨湖北鄉試遠寄三場程式及戒諭士子條規再疊前韻奉寄

鳳味堂高啓絳帷，吏人請號駐金危。（紅號皆臨時編定，飲中請號駐金危，劉中山句也）夔龍開府榮旌節，鸞鷲分行肅羽儀。知舉果爲牛相許，（翻用李贊皇求知貢舉事）憐才不礙馬卿遲。（公三場均限亥刻齊卷）歐公夜聽蠶聲動，料得堯臣定有詩。

早暮江城競鼓笳，楚人才筆麗朝霞。芙蓉豔奪襄陽錦，蘭蕙生爲屈宋花。白虎向傳通德論，公羊漫詡說經家。（道咸以來自命通人者，動稱公羊家）欲知津逮儒林意，大道如弦不取斜。

崔盧兄弟際清時，秦楚平分建戟枝。（公爲吉帥內兄，是科俱爲監臨）兩處文移傳桂籍，（各省題名錄互相咨送）一般心動似蓮池。謝公自昔推劉尹，（謝爲劉妹婿）白傅於今替左司。（吉帥繼公撫轅）我愧二公並兄事，中郎手板要雙持。

王人多是翰林官，不御泮筵飲不歡。鸞鷲自諧鳴盛律，貂蟬雅稱進賢冠。詩從玉笛聲中和，月到瓊樓高處寒。纔

了三場持兩節，（時兼署督部）儒臣榮遇古今難。

■燕坐

燕坐清香凝（人）戟枝，委蛇退食自言遲，欲晴又雨天難料，少樂多憂世豈知？覽鏡朱顏生酒後，捲簾幽草勝花時，園林盡日啼黃鳥，伐木能無故舊思？

■效香山

堯夫隨地置行窩，小徑春陰罨女蘿，園柳不波風力軟，林花結子雨功多，飯香自喜脾家健，酒美能教骨節和，心似虛舟無觸性，底憂宦海有驚波？

不貪榮進爲時危，欲報君恩嘆力衰，官以早休爲上策，老惟獨宿得中醫，宦途用拙常勝（平）巧，廣座言公亦及私，晚悟釋家龍象力，感人心處是慈悲。

■次韻答亦元比部見寄

妙喻天龍一指伸，高談大睨復誰倫？異同頗費調停手，才氣真能籠罩人，朝盡爭名市爭利，人惟求舊器求新，最思老學菴中語，誤國當時豈一秦？

麟有祥徵鳳有威，湘中人物益輝輝，如公宜在三孤上，諸子休論十二非，天半朱霞生未晚，海濱黃鶴見來稀，朝廷有意庸東里，虎也猶當聽指揮。

■賦得螃蟹水仙

草泥擺脫覺香清，風味尊前伴橘橙，一水中央憐宛在，百花頭上讓橫行，黃中雅稱王言大，玉立能教虜鬼驚，客語時流漫輕薄，蛟妃螺女本傾城。

冰泉鬪斗是家鄉，佐我椒花獻歲觴，玉帔欲來先賜紫，檀心將吐更含黃，問身信可江湖老，豔質誰非金玉相，昨



向文君夢中見，幻爲翠羽與明璫。

兩盤八跪玉交枝，嬌煞春燈煮夢時。霜後冰盆隨處薦，風前羅帶倩誰持。玉杯酌我無空手，秀色撩人欲朵頤。寂寞百年稀賦詠，祇應創見趙家詩。（嘗見趙攜叔畫螃蟹水仙自題一詩，此外無題詠者）

梅兄三七解傾筐，紺殼承花得十囊。洛女中腸無可斷，畢郎右手有餘香。美人微步淩秋水，公子同歸換道裝。歲兆圖中添貌汝，上春佳日似重陽。

薄俗雌黃皎不污，從秋窠養歲云除。雙雙玉翦休輕擘，一一花名總不如。越豔忍將戈甲召，楚腰休與稻粱疏。小時乞汝蟲娘字，珍重冰綃薤葉書。

子以前輩以大司空入參機務奉賀一首

三十年前侍從臣，今登兩府秉樞鈞。蘭荃結聚三湘秀，桃李滋培四海春。度世神仙醫國手，救時宰相讀書人。從元祐庸司馬，頓覺朝家百度新。

次石甫韻奉慰一首

宵來噩夢怯檀蘿，縛繭難爲速化蛾。灩澦關頭三疊浪，筵筵引裏一條河。古人宣室承恩少，老輩湘鄉信運多。見說齊廷有神鳥，須知一目不爲羅。

題顧五編修詩稿

一昨封章結主知，洛陽年少冠當時。竊才古有陳同甫，高論今惟管異之。關輔徧徵秦漢事，中州重見李何詩。君師我友今安在，衣鉢桐江幸見遺。

聞石甫午日宴客並召歌者侑酒戲寄四絕句

今年端午客中過，坐聽哀箏可奈何。不遇當年趙承旨，誰歌驟雨打新荷。

昨歲踰端寄我遲，鶯花狼藉被兵時。山杉彬已膏蕭斧，猶和冬郎小豔詩。（去年五月十五日董福祥殺山杉彬而兵岬成矣十六日得石甫江南書詫與賽金花同乘余輒次韻報之）

煙月寒潭第幾家，夜闌無夢到京華。牡丹芍藥俱搖落，看到人間鼓子花。  
公孫弟子垂三千，吾見公孫尚小時。同谷歸來天寶後，不堪劍器舞瀏漓。

夏日卽事

舊巷烏衣王謝家，修修庭竹倚風斜。卯時酒暈花雕盞，午日衣香艾虎紗。肌汗更沾花露水，胃寒都怯紫陽茶。求書競買齊紈扇，醉墨新塗十數鴉。

調石甫

左顧文鴛倍有情，風懷全反竹垞生。幻爲童子疑雄杏，（見紀河間筆記）常作山妻亦牡荆。么鳳幾時集阿閣，前魚曾記浴華清。莫嫌居近公超市，霧裏看花尙眼明。

和亞蘧用荆公韻偶成二首時君小極初愈

賓主西都各有情，嚴徐爭扈六飛行。候湯解喝精茶事，多病尋方熟藥名。西極馬從天上下，北方城豈笑時傾。深宮側席思賢輔，不願君爲魯兩生。

北窗臥久醉還醒，赤日黃塵滿禁城。無用燈檠牆脚葉，有情芳草掌中生。科場其奈時文敝，新法難教俗吏行。今日三司更令甲，敢同介甫與人爭。

又和雨過一首用荆公韻

疏疏小雨過通寰，賀表朝來慰聖顏。南陌勸耕垂柳外，北池尋夢綠荷間。亭名玉局能無喜，酒令君房獨未閒。膚寸雲興滿天下，葱蔥佳氣在南山。

扇頭詩墨是丁丑乞假出都時越縵老人書贈把爾悵然大韻悼之

平生詩格師霞川，有味如蜜周中邊，扇頭灑墨三十載，至今青帶齊州煙。讀書志裏讀公武，典冊高文過繡虎，京洛門庭聚荀陸，會稽里社疏支許。我來寂寞叩玄關，授以金丹真大還，偶顧清歌集鶯燕，閒攜茗話湖山。同時二陶俱秀出，風義獨聞許樊澤，（公贈詩樊澤真風義歌詩百感來）一日常經萬言試，三冬已課五經畢。紫藤垂條風柳黃，仇池未是楊難當，花前巾烏並方雅，園林小景兼仇唐。勿言科場風氣薄，先後蜚英天祿閣，直聲公已震臺烏，異政吾慚致神雀。宣南渭北別離中，身非房杜師王通，重過州門墓草宿，藤陰井場啼秋蛩。日鈔百本朱絲格，大半飄零蠹蠹碧，元珠已失餘片鱗，十冊寶藏竟何益。（公日記百餘本在子培所亡十之一存九十餘本由王某轉付蔡某竟不可究詰余收得十本皆晚年之筆無復前之精駁矣）皎皎霜紈扇，篋開題襟猶憶在，燕台動搖寶月紅鸞影，太息秋風白燕才。西巡遠過驪山驛，從臣強半無顏色，翻幸公歸兜率天，神仙不與人家國。草堂靈在柯山隅，側身東望空踟躕，大招賦罷靈修遠，我亦當年宋大夫。

以渭桃分餉同人易五顧五有詩報謝戲答

佳實美於花笑春，新詩脆甚桃中人，渭南五月仙果熟，枝上纍垂墨紅玉。取實襲紙承以篋，昇致百里薰風香，摘時微韌到時軟，紅霞滿口雲英漿。沙苑甘瓜大如斗，南湖玉琢花香藕，並在先生食料中，六年等頰仙霞久。隱然敵國樹膠州，直以傭奴視豁口，（豁口桃亦有名）冷笑東方食玉桃，不歸金馬貽僚友。易五大篇崖蜜甜，顧五小詩青子鹽，大如一石蟠桃核，小如珀蠟櫻桃色。其光糾縵意瑤瓊，詩才都過孫濟寧，（濟寧作報雨早霞生賦律有其光多糾縵此意重瑤瓊之句人以爲笑石甫以爲佳）明年念與桃花聽。

顧五居南柳巷與夏編修鄰並夏典粵試去顧卽移居其宅戲贈

移花兼蝶過南牆，分取皇華使節光，迭坐溫輿非夢寐，得居夏屋亦徜徉。比鄰鷓鴣無煩惱，舊韻麝麝有和章，（

見田山叢移居詩）徙宅依然同巷陌，兩家門戶映垂楊。（余居東柳巷）

■雨中答顧五

屋漏痕深檢玉杯，南鄰季雅錦箋回，白楊巷接青楊巷，今雨來兼舊雨來，已讓那邊吟白苧，（用大作家在那邊語）極知當下熟黃梅，玉桃接引偷兒至，任達深憐子敬才。（君移居被竊）

■顧和詩用詩鐘體戲答

少年瀟灑愛持杯，便了傳箋往復回，爲想風前如玉立，不愁月盡有珠來，（是夕晦）碧雲暮合陶潛柳，綠雪宵吟王衍梅，（道光間會稽詩人王衍梅有綠雪堂集）見說粵園工屬對，隨宜遊戲亦仙才。

■疊前韻柬易顧兩君

渠渠夏屋安踟躕，誰是糟邱李萬回，美酒可三百杯盡，清吟得兩五郎來，地非白下還多柳，天似江南始入梅，聞道匡牀虛翠被，夜寒深念鄂君才。

■夜坐三疊韻遣興

均堂積水可流杯，玉溜聲中夜鶻回，竹裏煎茶期客過，雨中停燭等詩來，薄衾軟美休添絮，行路艱難抵食梅，（見古樂府）不聽荷聲一年久，北池誰念碧雞才。

■四疊韻調易五

悶對棋奩泥茗杯，常奴那解侍方回，橫河佳語偶然得，涼夜可人期不來，井水有情都姓柳，遠山長蹙不關梅，想思一寸爐灰熱，莫笑樊南枉費才。

■擬陳后山小放歌行二首

粉黛三千放出宮，長眉高髻各乘龍，才人不合吟團扇，一世祇承長信中。

峨眉謠詠豈能無衆忘雲鬢別樣梳，斂約琴心休放誕，人間難得是相如。

以關中之勝誇示同社

爲數關中景物賒，漢唐曾是帝王家，東湖灑灑聖人酒，（酒以鳳翔爲最，東湖水洶故也）西嶽亭亭君子花，（指蓮花峯）送客紅橋無限柳，封侯青上最宜瓜，雲如美女河如鏡，不爾安能駐翠華。

五疊韻答雲子

莫問叢祠竹琰杯，新塞蘭芷楚江回，萬言草草燈前寫，百感茫茫酒畔來，未削漢家千里草，誰遺列國一枝梅，班彪王命從頭論，的是人間未易才。

六疊韻問晦之病

誰乞相如露一杯，芙蓉闕下獻書回，言如藥苦斷斷上，吏甚醫庸衰衰來，會見液池興仆柳，似聞商鼎夢調梅，河魚小極妨何事，大用天教老此才。

石甫見和前韻次答二首卽送歸廬山

涕唾能爭日月光，坐看同輩盡飛揚，才堪大用逢文帝，士有真名只武鄉，鐘鑿萬鈞和籟猛，樹非再實免根傷，漢廷自愛凌雲氣，不用梁園謁孝王。

安排持節引朱旒，文采依然賈馬儔，吟徧鸛鵲誰是谷，驚回蛺蝶莫如收，家移廬阜聊堪隱，意在瀟湘不自由，二聖還都簡良弼，期君重作玉京游。

彥蓀見示新刻詩詞抒情敘別奉題四首卽送之江安禱道任

一樓湘綺與雲齊，麗甚餘波到蜀西，瑤瑟青峯一惆悵，玉笙春水兩萋迷，太虛不涉黃州派，夢得多同白傅題，此事未應妨兩廡，欲將絲竹寫宣尼。

髯短俱爲入幕賓，豈期家國誤黃山？幸逃白馬河中水，重認紅羊劫後身。此局全輸休渡海，吾謀不用卽歸秦。與君並陟煙霄路，回首恩門感最真。

早晚行宮預筮璣，玉音問答待重刊。金槃日鑿天廚果，寶扇風香御書蘭。京兆眉圖學宮樣，江南貢錦賜春寒。儒臣榮遇茲爲首，莫與江村一例看。

金陵亦是帝王都，籜節親持轉舳舻。夢裏曉鐘長樂苑，部中煙水莫愁湖。書題隴上梅花否？詩抵淮南米價無。倘憶關中庾開府，江雲渭樹未模糊。

與栗園夜話

簾旌不動月波涼，對語能消幾寸香。讀畫看碑皆眼福，作詩寫字見心光。舟航已歷新桑海，（君去夏歸自日本）燈火還如舊草堂。人事遷移真面在，依然脫粟布衣裳。

生日用去年韻

月吉行香欲曙天，退衙深竹起茶煙。籠鐘自笑裴中立，樂志依然蕭大圓。韓尉避賢甘俗吏，錢鏐視我尙童年。曾陪天子私人後，敢道呼來不上船。

疊前韻贈梅君時至自三原明日行矣

來訪城南尺五天，祇今三輔尙風煙。考亭集裏箋天問，大戴書中測地圓。洛社傳觴圖壽相，堯窩擊壤慶豐年。停雲館裏留三日，去住真如不繫船。

去年諸弟子都和圓字韻今皆不及門矣再賦

最憶程門立雪天，杯唇浮粟燭含煙。工夫鼎裏金丹轉，模範盂中玉水圓。兵火流離重底定，文章宦達趁華年。梁園今夜無多雪，（諸子多在汴梁）應憶蘇家藥玉船。

□與女弟子繡潛試茶疊前韻

紗帽煎茶薄暮天，虛廊鶴避竹爐烟。小團貢餅紅丁豔，本色宮窰白定圓。可記酒潮生昨夜，待烹雪水過今年。起居不似薇花廡，架隔疏寮似釣船。

□長至日赴行宮早朝

長至嘉辰媿履端，火城初起盛衣冠。飄飄翠鳳開仙仗，肅肅金貂護曉寒。日月光華還北極，蓬萊宮闕自長安。山來司隸威儀在，終古西都識漢官。

□十一月廿七日劉次房前輩齋中消寒小集

暖閣深明結古懽，呼燈行炙具銅柅。閒來茗酪平章易，亂後琴書檢校難。薑桂性情終是辣，梅花天地不知寒。關中好事傳圖畫，合當睢陽五老看。（是日會者五人）

罷談仙佛厭言兵，杯酒相看各有情。每讀文章思鳥爪，不勝感慨繫魚羹。故人宿草多前死，（謂京邸消寒會中人）老將垂楊更左生。（君病臂漸愈）今夕莫辭百分飲，六龍來日返瑤京。（聖駕以廿八日還京）

□彥清書來猶訊及阿咸揮淚答之

弱息曾將假父呼，九齡何意損童烏。讀書南郭聲先斷，投杖西河淚已枯。幸有小男勝元白，寧期老境似查朱。（初白竹垞皆有失子詩）惟君解道商無罪，忍復臨池寫豹奴。

□吉甫中丞歸自汴梁賦呈

龍馭東迴汴水清，中丞親扈六飛行。騅頭導引先諸將，虎爪文書署本兵。爲有韓琦西面重，恐無寇準北門輕。公歸漫賦鴻遵渚，夢逐金輿入舊京。

□封印日偶書

琴閣惜情鵲啼，銀符封裏道心清，官身蕭散年將換，天意蒼寒雪未成；虎節新迎大司馬，（近得玉虎節一事）文曰大司馬府第一）烏皮還隱老諸生，外臺一入詩情減，歲盡纔聞理詠聲。

吳客鬻珍珠蘭茶以雪水試之

祇覺芳蘭氣味親，誰持珠蕊媚茶神，采香細擷湘花碧，隔紙微烘建葉春；箬籠翠緘溪上雨，竹窗玉映雪中人，退衙領略江南意，驛使梅花無此新。

署齋遣興

舫齋又過蜜梅時，退食焚香且息機，每閱塘抄新事少，偶翻除目故人稀；松煤素久除膠性，丸藥藏多損蠟衣，膝六助余三日雪，不辭梅二以詩祈。

疊韻答淇泉學使上元日寶籙道中見寄

征塵不損玉圭棱，小別鷗波管道昇，集裏文章真北宋，畫中煙水似西興；（君新得石谷畫以攝木見語）碧雞飛翥詞臣筆，金雁參差古驛燈，行役從來是閒暇，儘將佳語寫繚綾。

星輅迤邐度千山，檢點衣裘愼暖寒，字取中鋒誰是柳，花含喜氣莫如蘭；豪情發塚思靈鞫，高論彌天想道安，見說漢南富文藻，使轡得見子雲難。

三疊韻寄淇泉

劍有光芒玉有棱，寒陵片石見溫昇，內供奉恰逢天寶，行祕書猶說永興；紫柏數峯諸葛壘，紅蓮一路上元燈，行台最憶江南樂，費盡歌筵幾匹綾。

衡才漢水復商山，裘屨恢恢士不寒，一采洋川雲母竹，再攀角里水晶蘭；（芝一名水晶蘭）籠收百藥材無棄，網有遺珠寢不安，甲乙差排官燭下，諸生欲識苦心難。



卽事四疊韻

風鳴窗紙響，棧棧映雨如煙淡。日昇蝶喜好教花，恨解鶯啼還待柳眠興。釀泥巷陌愁呵殿，過錦樓台未落燈。吏謁頻仍衣嬾換，祇將半臂襲吳綾。

散衙閒倚小屏山，酌酎差能敵晚寒。紅燭照顏猶旖旎，金蘭生耳自班蘭。春盤款客笙歌沸，夜雨攸人枕社安。等是新年燈與酒，風光得似舊京難。

贈別李馥庭方伯

西京開府帝稱賢，星象南移又入滇。旌節遠分三絳色，功名重勒五華巔。照人似鏡空空見，論事如棋著著先。世難方殷情不淺，青門送別古今憐。

新月

浥浥霞邊起，纖纖柳外矧。風情看鏡在，月意上樓多。度慢遲歸燕，臨妝淺畫蛾。早雲遮未得，佳雨竟如何？

用前韻寄研菴兼訊石甫

名士江東似爾稀，青山今復見元暉。官書東語繙妻鏡，鄉夢西還過姊歸。謝墅圍棋雙屐在，秦淮歌舫萬花圍。依劉更有登樓客，心逐開先瀑布飛。

疊前韻再寄研菴

南漕頻煩羽檄催，舊京日月喜雙暉。卽看淮粟連橋轉，莫憶臺瓜抱蔓歸。藏稿名山偷宛委，焚香小閣署摩圍。山谷開名一外台，歎歷君無讓，會見鋒車嚮北飛。

檢庚子出都後所作詩詞漫題一首

劫火灰中莫闕天，金台黯黯夕陽邊。起居安否隨鸚鵡，商略行藏到杜鵑。賈傅悲深庚子後，庾郎哀甚戊辰年。平

生文字幽憂少，此是瀛奎第幾編？（瀛奎律髓有忠憤一門）

病起作

乞靈瓜艾復何爲？氣海虛盈祇自知。摧折當爲松柏地，寂寥又過牡丹時。功名上意教遲貴，精力南人怯早衰。起看庭花生意滿，翻陪芍藥要新詩。

疊自嘲韻示客

青門春色堂堂去，密葉輕陰卽漸繁。算只紅芳知我意，欲持綠醪味卿言。疏彈蕉葉何妨？直獄折荷花自不冤。誰識凌雲詞賦客，一官長傍孝文園？

五月初八夜作

昨宵鬢髻映鏡枝，今見空廊月過遲。獨自思量無可說，亦如前在渭南時。斟酌瑤房點景難，越窯茶具綠花單。臨行盡返相如壁，纖手擎來不忍看。三日前頭數去程，金箱打疊越裝輕。書齋不合相鄰並，腸斷紅房捲畫聲。臨分無語對窗紗，小待門前金轎車。故傍竹籬候湯熱，替斟一盞女兒茶。翻翻書記女相如，筆法依稀大小蘇。愁絕端陽三日後，需頭押尾自家書。（昨日猶爲余畫到）

前年從我雁門跨，水驛山郵捧硯隨。幸不重經來日路，不然腸斷粉牆詩。

梔子榴花次第新，拈花人已隔重闌。也知不枉明珠淚，歲歲花開報答春。

童烏不預元文事，靈照深知居士悲。死別生離無限恨，夢中說與阿咸知。

明日過八仙菴送內兄行並慰繡漪

前年笠下起狼羆，新奉安輿出上都。今日延秋門外送，不堪白馬引流蘇。

嬌女愁深感翠峯，尊前淚滴石榴紅；待將柳絮吟成字，台省依然見謝公。

■ 研樵惠君山茶謝賦

五月松風意未舒，清人來慰渴相如；織籠幾費湘君竹，揀葉深緘柳毅書；一盞香泉梅雨嫩，數行新雁岳陽疎；故人茶串猶堪受，我亦當年陸敬輿。

日長吏冗費消磨，胸次猶涵七澤波；官餅香分兩園鳳，家山春瘦一青螺；宦情隴首秋雲淡，（君曾知隴州）風味瀟湘夜雨多，爲問舜祠老常住，銅瓶埽井近如何？

■ 老妓行

曩爲陸子思賦此題，定稿時刪去，偶檢得之，意有所觸，改而爲此。

白門柳色黯然秋，曾拗絲鞭繫紫駟；秋去春來一雙燕，柳昏花暝十三樓；樓中十五盈盈女，能歌吳歌舞楚舞，種出能行白牡丹，教成解語紅鸚鵡；一笑陽城下蔡傾，五陵年少儘逢迎，纏頭擲滿寧知數，狎客來多不記名；世開花月無常好，暮暮朝朝玉容槁，白髮空思宋道君，青娥暗泣唐天寶；墮策曾傾馬上郎，當壚今似魚羹嫂，浮梁茶客六十餘，欲折花枝厭衰老；秋花不比春花穠，手持團扇怨西風，薄有風情晚香玉，無多顏色雁來紅；春婆夢境人人有，何獨青樓悵衰朽，龍鍾宰相望三台，臂猿將軍傷左肘；徐娘雖老尙嫣然，傅粉施朱逐少年，已屈蓮花隨武媚，更聞冠玉伴湘蘭，吁嗟乎夏姬三少知名久，妍媸定有真評否；琵琶亭下退紅花，拂水莊前如是柳，沈吟金縷杜司勳，標榜玉京吳祭酒，君不見身騎駿馬瀟灑陽，出獵常牽柏直狗。

■ 以梔子晚香玉贈梅君前輩滕以小詩

冰雪虛堂六月寒，同心惟是許芝蘭；安排樂籠登秋實，莫當黃初庶子看；小朵瑤花出上京，露叢掩抑不勝情；怪他粉淚無乾處，長感先皇御賜名。

□ 味署東西二小山

白閣雲連紫閣雲，東西對起謝公墩；斜陽萬柳黃垂地，春雨雙螺綠到門。（一作兩螺青到門）  
賦筆淮南文苑在，真形米老畫獅蹲。（米襄陽有獅子圖賦）胸中五嶽崢嶸起，邱壑區區隘謝鯤。

□ 夏日園居

依舊東園燕與鶯，北池惟是負鷗盟；官情薄似梨花釀，詩味甜於苜蓿羹；苦地雨侵茶碾迹，荷塘風送扇槌聲；  
渠榭穢黃塵客，風物焉知爾許清？

□ 齋居遣興

高齋燕坐惜流光，官牒能消字幾行？虹雨驟蒸秦地溽，梅風暗滅楚衣香；五言詩格輕三謝，（余詩不效選體）  
團扇書名愧二王，見說農謠倖甘澤，最思宮柳溼連昌。

□ 寄石甫

一昨衣纓集雍都，披帷斯在與髯俱，（去年君與梁髯假榻署齋）同尋莊惠觀魚樂，合寫山王入竹圖，雜佩贈  
之有香草，清談而已罷樵蘇，祇今旅食金台側，能折疏麻寄我無。

□ 有感示仲錫太守

班表差排九等人，風塵勞拙日昏昏，年資五考應居上，教授三家別有村；不近人情真怪鳥，附庸理學膺河豚，知  
君心似秦時月，坐閱蜉蝣目笑存。

□ 重有感

敝帚千金忍自評？談經狗曲匪吾徒，互相輕者古常有，三不通人今則無人到九分，方是學賦成六合豈非愚？焚  
坑未是秦皇過，此輩安能廁八儒。

聞杜仲丹歿於校經堂年八十餘矣

早歲識君鸚鵡洲，桑榆暮景腐儒收。升堂弟子誰高等？諛幕文章取薄酬。冠樣小堪方子夏，才名大不若壬秋。老來纔擁書千卷，未讀書時已白頭。

再寄石甫並訊仲綱弟

瘦馬茸衫早去秦，宣南乞得自由身。寒生翠袖知何倚？詩得驪珠故不貧。（元微之詩家有驪珠不復貧）淮海女郎吟晚豔，瀟湘男子是春人。（君詩喜用春人字世稱易春人）高名易五偕陶五，驃騎何由步後塵？

慰石甫

閒看般源小品經，天寒無意在旗亭。王龍標壁誰同畫？李鶴年歌不忍聽。三復春紅憐早慧，（用三紅秀才事）一官晚達喻冬青。十聯佳句君無讓，且晚書名上玉屏。

石甫登高廟第一樓和余己亥題壁韻見寄次答一首

數盡江南第一流，溫郎失色看吳鉤。清談琴朶成三絕，美酒笙簫置兩頭。目極廬龍天下險，氣凌黃鶴楚中樓。當年崔顥題詩處，重見青蓮滿意游。

次懋翁卽事元韻

重結文場翰墨緣，矩規深懼失方圓。盡除蕭選詩騷賦，懶問疇人勾股弦。擲劍鄧侯捐故技，寄書賈傅換新編。科名事等探籛耳，吾道污隆且信天。

老眼全生萼蓉花，蓬蓬菲葦孰名家？陳言京叔嘲知雁，拙句香山愧斬蛇。絳縣老人猶矍鑠，青真童子莫矜誇。（秦晉諸生八十以上十五以下者各得數人）有誰聯步花輓去，過盡宮人手裏茶。

疊韻呈懋翁

歐蘇常有鎖廳緣，重試茶甌白定圓。幾輩丹成軒帝鼎，一生箭在本初弦。文教此子頭先出，懋翁每以才子目。余書接吾妻鏡後編，學堂書皆取諸東洋。九日銅街傳放榜，期公盡醉菊花天。

桂叢吟瘦雨中花，漫以詩歌詠作家。沈晦有心師木雁，飛行無迹感風蛇。文章未適朝廷用，科目徒爲鄉里誇。勝後門生投謁處，敬輿惟是受新茶。

三疊韻贈內簾諸君

蟹眼鑄邊果此緣，簪裾合與月同圓。門多各擬魚燒尾，性急休教豹佩弦。有發憤點閱致疾者，舊學枉窺東觀祕。新書猶待北門編，京師編書局以館職領之。諸生半是楊花命，假借東風送上天。

棗版房行十四家，姓名誰是榜中花。案頭佳墨投懷燕，俗謂投房如投母。簾內流光赴壑蛇，閉閣關中匏卽匝月。難得嗣宗青眼對，莫將殷夢解頭誇。官身暫出風塵外，且喫東坡自在茶。

四疊韻寫懷

周旋場屋亦因緣，十度風簷見月圓。余鄉會試七同考，二今復充提調。悵望雲霄諸葛羽，重調霹靂長孫弦。是科山西以諸葛亮陸贄范仲淹司馬光論命題，余有擬作。長江漫擬身金鑄，厭次虛言齒貝編。十七科前老鄉貢，霓裳猶記大羅天。

枉稱羅趙作書家，縑素縱橫雜蚓蛇。節候淮南生桂樹，文章關內掃檉花。常供罷進能言鴨，供給所日進魚鴨。費不貲余減之，敗卷真如無味茶。未免儒林標榜意，卷頭評泊太雄誇。諸公譽拙文太過。

自嘲

風味堂深散吏衙，閒繙巾卷側烏紗。絲欄被格通身草，爲人寫屏幅皆騎格大書。團扇無書兩面花，向不索人書扇。官似晉重羈旅日，余宣秦十九年。詩吟秦七女郎家，昨歸柏府渾無事，自寫新詞教小茶。唐人

呼小女曰茶。

同考索燒豬戲贈

片紙雲藍付大官，內簾官索進瑯玕。科名半是遼東白，火候真成鼎裏丹。說士古甘似肉，累人今有甚於肝。吾家故事誇生啖，佛印能無帶笑看。

內簾又索餽再賦

菜肝鼈癩理難齊，染鼎嘗餽古可稽。氏族附魚寧有種，儀形似蟹獨無臍。玉裙滋味涎僧口，金榜功名誤馬蹄。好與嫩冬瓜共煮，山公應是醉如泥。

卽事五疊韻酬懋翁

小結靈山香火緣，波箋落墨意珠圓。桂華蹴歎一中酒，娥月娟娟兩上弦。尺牘紫書僚友弄，千文紅號吏人編。高秋六合俱清朗，知是虛皇造勝天。

勸客多栽果子花，早收秋實報官家。虛聲休採明經蠟，陰德誰蘊宰相蛇。退筆丹青何所用，（是科罷謫對紅黃二筆遂廢）新詩元白互相誇。蘇門弟子紛來謁，誰啜雲龍一盞茶。

雨中寄菽軒方伯每點名輒見

浙瀝風簷瀉玉聲，關門時候一將迎。棘籬內外分持節，欄檻東西對唱名。坐理齏鹽姑婦事，（每日督供給官進米肉）臥聽松竹弟兄情。與君五煇南宮燭，恰悔當年未識荆。

入簾後同考諸君日索藥裏戲贈

屢從藥店訊飛龍，早暮茶煙艾炷中。生怕珠遺添髮雪，除非琳在愈頭風。菊甘薏苦難同味，晉疾秦醫輒有功。不信滋培桃李地，文林常與病坊通。

相憐同病復同寅，點墨濡藍氣韻親，莫與檳榔爲舉主，多收荅尤作門人。（用狄公藥籠事）三條燭引狂花眩，千佛名如本草新。（本章多載別名）倘不關防青鳥使，鏡台寧免翠眉顰？

再寄同考諸君

旁通醫理卽名師，陶鑄諸生補瀉宜，丹鼎煉砂求赤箭，白家炊粥入黃齋。（香山詩黃齋數匙粥）烏頭附子寧無用，遠志當歸各有思，從此樊山續蠶尾，集中添取藥名詩。

鎖院多閒借題消遣內，簾宣索游戲成章，比日同人自當供外都無所取，倘由拙詩所致，重吾過矣，校閱餘閒，正須雋味以佐名飲，因疊前韻自懺，並呈同考諸公。

梅二曾爲小試官，歐（永叔）韓（子華）席上簇牙盤，宋頤肯喫明真素（唐六典道士齋有七，其三曰明真）吐納方成內外丹，文字要如雞取臙，食單除爲馬留肝，菊羹魚膾皆時物，莫作人間禁樹看。

風人歌魯亦歌齊，方朔山來善滑稽，烏府詩多傳衆口，青州酒美入人臍，萬年縱不歸庖宰，雙鯉何妨寄赫蹄，我亦老饕難忍俊，朝朝玉糝擣成泥。

內簾常供而外偶有所需，皆出泉自糴，前詩累人一語，貪用閔仲叔事失之，誣矣，賦此解之，仍限肝字韻，以自罰。

能文豈是愛錢官，首宿風清日照盤，一任賞奇浮大白，幾曾舐鼎乞餘丹，談嘲何損邊韶腹，嬉笑寧無叔寶肝，省識頑仙戲三昧，杜陵詩史莫同看。

疊臍字韻謝吉生大令饋蟹

七月丁沽蟹市齊，入秦八跪一何稽，酒行左右無空手，詩換團尖得兩臍，正菊花天說風味，無鹽州處騁霜蹄，（作令以外縣爲尊吉生近調涇陽故云）文場那是橫行地，郭索居然出草泥。



三疊肝臍韻述事書懷呈懋翁

科場提點本粗官，牛耳何心主敦槃？漸說文章工刻翠，並非碑版亦書丹；燕籠盡日垂金額，烏府何人鑿鐵肝；一昨迎簾盛牌纛，關中傳作畫圖看。

一樓明遠與雲齊，戟衛清嚴效拱稽；（國語士卒百人皆擁鐸拱稽）朝對南山尋地絡，夜占北斗識天臍；連城白壁無龍輔，虛牝黃金惜裘蹄；（本科經費過三萬金）待到重陽開蕊榜，家家門戶望金泥。

壽懋翁

大觀門內慶弧懸，（門在至公堂後）謾謾金風放榜天；仙鹿馴於叢桂下，壽人生在菊花前；道心漫守庚申夜，堯歷曾窺丙子年；五度秦關逢覽揆，茶香莫惜再三煎。

九月五日再見新月疊前韻

依舊如弓月，流光入步蟾；夜情縈楚鵲，秋怨滅高蟾；（芙蓉生在秋江上不向東風怨未開高蟾句也）宮餅燒銀篆，官壺取瀑簾；蛾眉兩番畫，長黛爲誰添？

內簾吳鏡之張子馥林孕熙姚敬侯諸大令皆見和前韻六疊奉酬

未了人間棘屋緣，風簾茶夢一時圓；欣看藍筆題箋版，恍憶青鐙誦絃；枱合庚辛加倍寫，籤題甲乙再三編；（各房試卷皆覆閱數四）祇憐九日登高會，不到城南尺五天。

分栽桃李滿城花，衣鉢相承各一家；不日凌秋起鵬鷲，有誰蛻殼似蟬蛇；唾餘珠玉從人拾，網得珊瑚對客誇；朝夕飲冰知胃冷，風爐莫煮紫陽茶。（茶性寒）

秋閣積雨四疊肝臍韻紀之初八日雨浹旬乃止

魚龍跋扈襲門官，（士皆爭門而入）幾見青天轉玉盤；雨似滿河無定水，晴爲百穀大還丹；（秋稼頗傷）吏

皆躡履艱趨走，士願披雲吐肺肝，廣廈萬間漏痕滿，秋風茅屋可同看。

關門進點候班齊，欄幙中間有嬾稽，（士子誤點者多）妍雅光門泥沒髀，瀾漫清灑水平臍，士皆中道循龍尾，客欲東還滯蹠蹄，（晉人欲歸不得）待得秋晴勤補漏，洞窗紅錦不勝泥。

敬候和肝臍韻劇作五疊韻報之

典論論文妙五官，心珠圓轉水精盤，誰將小相輕公亦難得，佳人嗣子丹，（君有西河之戚）點閱自憐花滿眼，冲和未要藥平肝，（內籠多疾君獨不藥）案頭文字如茅草，當作菜莢仔細看。

誰夢金階菜與齊，兩關榜信一句稽，（今年合關發榜較遲）酸鹹何必皆同口，桃李誰云可納臍，投報久虛青玉案，（君曩索詩未報）詩歌今廢白銅蹄，（黔學請用詩賦部議罷之）明簾如水盈盈隔，大似東封函谷泥。

六疊肝臍韻案諸公和

秋闈知雜用秋官，長爪仙郎食露盤，詩馬青緣蘆葦白，醉顏時發柏楓，（余少飲卽醉）文章信美木生癭，服食傷人菜忌肝，高臥元龍樓百尺，銀袍如鶴仰頭看。

詩學漣沈失魯齊，開來今古任居稽，根塵未斷舌身意，補養何煩膈臍，村社歌詞唱鹽角，家庖風味致糖蹄，穀城黃石今何往，酬唱猶能續紫泥，（己丑科黃子壽師監臨兩江鄉試余在幕府有紫泥酬唱集一卷）

酬鏡之見贈

儒吏風流岸角巾，歸來盤粥舉家貧，官舍野鶴閒雲意，民似山花礪鳥春，聲實君當高漢最，性情吾樂近吳人，武皇教進天人策，不獨房書賞陸真。

燕人關韻呈四星使

使星絡繹出明光，豈獨三秦士氣昌，知舉和凝傳祖鉢，不眠吳質染天香，西賓乍可爲東主，（晉借秦園秦東晉

西)今藥安能泥古方四傑同時臨雍絳定無人敢抗顏行。

玉尺方巖領貞闈，亦登曾鞏劉輝。(同輝)野言稷下諸談士，樸學國初三布衣；大匠肯教羣木枉，谷王真見百川歸。文章風氣由冰鑑，龍燭騰光九卦微。

通知時務史兼經，歷試三場竹素馨。郡縣後無封建法，陌阡外少井田刑。(見法言)微光自眩同螢燭，飲水無多笑颺颺。何限迂生違世用，好攜鳴鳳上虞廷。

鎖院森沈書不聞，香鑪茗盃坐量才。五雲未謁飛龍榜，九日長虛戲馬臺。叢桂舊憐霜菊晚，(見趙雲崧贈洪北江詩)芙蓉今並露桃栽。重簾不隔蠻箋遞，願解何須鼎自來？

味春侍御見和聽雨詩語特淒豔疊韻奉酬

香篆銷紅酒力柔，井欄絡繹夜啼秋。憑君剗盡芭蕉綠，不聽跳珠也自愁。燭奴有淚恰無煙，難得娉婷進雨前。屈指玉簾重入世，如今應及破瓜年。惆悵燕支澹意真，向來無著是天親。猜量驄馬西來意，可爲秦雲如美人。月移帶眼沈東陽，擣麝成塵到地香。艇子莫愁在何許，一生愁上鬱金堂。

再疊聽雨韻酬子陵

不聽盤門雙橋柔，吳江楓葉下殘秋。共君曾在蘇州住，識得瀟瀟一段愁。杏箋重疊掃湘煙，又落青燈夜雨前。最憶樂天親切語，減君顏色損君年。浥浥躡香蕪降真，乍涼燈火自相親。沾衣點點珍珠雨，愁絕初三月下人。昨歸柏府對斜陽，錦石秋花滿院香。生就楚人聽雨處，蕭蕭瘦玉綠君堂。

感懷三疊前韻

風氣支那一味柔，龍山風髻可憐秋；如今別有傾城帽，我較茶村十倍愁！  
盛服往視坐定脫帽於床杜睨之笑曰我是箇多愁多病身怎當你傾國傾城帽劉大慙而去近來營卒皆冠西冠  
奔走滿前感慨係之矣）

銷盡三條蠟炬煙，榜花今放繡衣前；幞頭初著隨鄉貢，先帝龍飛第六年。  
丹房粉壁畫仙真，貞白金鑪授受親；筋力風情渾不似，鏡中五十七年人。  
宦蹟浮沈古樸陽，簷花夜雨伴茶香；老坡喚醒春婆夢，二十三年下玉堂。

九日醺客懋翁疊前韻見示一再疊韻奉酬

河魚正美莫生懸，芳俎初開晚霽天；北物整教羊酪後，（余性不喜羶）南山仍到菊籬前；興來行樂攜兒輩，老  
尚偷閒學少年，海上香冰宜冷飲，漫教活火百分煎。

新製黃囊錦帶懸，禽華靡色欲寒天；宴游黃頰山非遠，飲食白頭翁在前；詩格沈雄獅子相，榜花璀璨虎兒年，剪  
燈更試官壺茗，未是元真竹裏煎。

發榜有日三四疊韻索懋翁和並示實衡

虎榜來朝粉壁懸，泥中仰首望雲天；衆仙詠落曹唐後，千佛名爭孟顥前；簾內外猶分殿最，（內簾獎拔較外簾  
爲優）河東西不隔同年，秀才夢寐泥金事，心似纒湯百沸煎。

桂樹陰中片玉懸，將圓月在碧雲天；身非羅隱曾從後，心似蓮師頗憶前；名譽已慚高過實，文章自覺老於年，祇  
憐撒棘還台夜，最憶茶廳蟹眼煎。

登樓一首五疊韻

八水雙峯（謂紫白二閣）鏡裏懸，欲攜謝句問青天；三三徑憶柴桑外，七七花催蕊榜前；漢紀湖從神雀世，（

兩省首題省取漢詔。秦樓起自鳳凰年。唐詩台起鳳皇年。何時歸訪江城鶴，採取松脂石鼎煎。

### 六疊韻呈懋翁

曉鶯昨夜雨猶懸，鵲噪新晴近午天。食料魚香兼筍美，詩情雁後復花前。當官休論升沈事，公昔守西安余爲渭南。令余擢陝臬公方守同州。秉氣還分大小年，楚俗餐英公莫笑，一甌芳菊當茶煎。

### 鎖院次懋翁韻

歲陽在攝提，秋賦選佳士。時賢論人才，自廢八股始。唐宋重科目，法程遞張弛。詩賦及策論，一彼而一此。若金必有砂，若粟必有秕。夢中糊眼處，暗有朱衣使。是素輒非丹，受辛或惡旨。要皆一孔見，衆喙紛難紀。晉晉誤清談，豈得罪塵尾。膠州文章伯，秋水清見底。座有春風溫，天無微雲滓。從公入鎖闥，人謂歐梅似。自愧蚶投魚，安能驥隨駟。香憐月中桂，苦棄道旁李。咫尺簾內人，蓬山隔萬里。四星照秦分，玉衡正文體。懸知程墨出，不受纖兒詆。外簾畢三場，事等絲就理。吏繕鶴頭忙，客到龍門止。庭際兩株槐，纍垂黃金子。移牀就綠陰，秋晚蟬微弭。爲和煎茶詩，秋風生鼎耳。

## 鰈舫集

### 春孟有懷爽秋同年

春到江南草木青，思君中夜望台星。十三篇廣兵家注，君嘗謙言願入水師學堂讀十年書。二百籤疑小品紅。君邃於佛理。詩好入於宣聖室，酒醒長坐醉翁亭。部中多少南朝寺，可要雲門挂錫餅。

### 癸卯元旦行宮早朝

起攝豐貂夜未央，紫珂葱轡謁明光。兩行寶炬籠紗出，一路春泥爆竹香。星轉玉繩催曉箭，雪晴金闕晃朝陽。乘

春更覲龍顏去，會見天池集鳳凰。

石甫寄示紀恩詩賦答

五歲奇童馬上飛，此行梧柳解重圍。（君入謝上勅以佐輔臣辨賦）諸軍柱管聽籌策，二女纓冷受指揮；銅柱天南吟黑蝶，甘泉春後到紅旂，賊平倘畫凌煙象，白面書生擬豸衣。

與客話申江事

拋擲黃金海可填，出門咫尺卽蓬山，縱橫閭閻疑無地，晝夜笙歌別有天，香茗三層樓上下，畫橋十字水中間，裙裾如織春如夢，酖毒鴛鴦花，誤少年。（進退格）

年少迷春不是春，良家女兒委風塵，芙蓉館裏真烟瘴，翡翠巢邊假笑嚙，錢虜也談風雅事，輿儂多是綺羅人，虛無海市連雲起，鮫客螺姬箇箇貧。

幕僚王君新婚時方司樞鳳翔

芙蓉幕下十年餘，櫻符筵前合昏初，面壁禪心偏旖旎，（君自號也僧）畫眉新手尙生疏，茶清粥淡貧仍樂，宦早婚遲意自如，此去東湖波似鏡，照君雙坐碧油車。

癸卯五月二十四日發西安止於華清行館將軍中丞以下送者餘三百人感賦

入水爭如別意長，出郊旌旆盡飛揚，台司自叶燠筮誼，（余弟中丞而兄方伯）掾屬無非桃李行，（卸任後僚屬多執弟子禮）西北關河天所眷，上東冠蓋道相望，青蓮祇得汪倫一，莫以花潭例此鄉。

輿中悶坐戲作兩頭纖纖歌寄葆蓀

兩頭纖纖牛戴角，半白半黑鴛鴦問，鴛鴦腦腦膊膊弄絃索，磊磊落落落人中，鶴兩頭纖纖柳眼長，半白半黑石屏方，腦腦膊膊炒炒豆，磊磊落落落梅子黃。



□ 上樞密瞿尚書

星宿文昌翼紫微，早登禁密秉樞機，作公五載頭仍黑，留館三年服已緋，日下共瞻孤鳳舉，天西親扈六龍歸，元城舊是溫公客，自入中書晉謁稀。

□ 上張大冢宰

屈指中興蓋代功，魁儒大半起湘中，豈期再造興元日，猶見先朝正始風，天以尚書爲北斗，人言管子出江東，津梁後學無窮事，姓氏連天有二公。（公與少保師同定學堂章程）

□ 初寒

庾家袍襖思添絮，杜曲園林未見梅，世事從來有翻覆，紅爐重煖隔年灰。

□ 贈冬青

露白霜紅天氣清，夕柯黃落滿秋城，憑將絹繫南山樹，惟有冬青不世情。

□ 柳

軟宜春水淡宜秋，抱月飄煙不自由，合使全身俱入畫，不應眉眼獨風流。

□ 鏡

漫整烏巾弄黑髭，七年常對聖玻璃，憑君照到百年後，只似當初照時。

□ 題紅紙

花葉輕紅三四番，了無一字著春痕，緣知隴上饒鸚鵡，素手拈花笑不言。

□ 再贈冬青

南檐佳樹垂垂碧，獨立霜中與月中，冷笑人間殘暑在，銀床一葉下梧桐。



雨中讌客葆生觀察出示一詩卽次其韻

鐵冠不赴東南調，衣繡重經右北平。紅燭試停今夜雨，珠槃早弭十洲兵。衡山嚼芋留精舍，小海看桑別舊京。自煙台至大沽爲小海。頗厭六朝風氣薄，酒邊重話石頭城。

葆生贈詩以湘綺見況何敢當也次答

抱冰湘綺縵堂翁，香瓣低徊此數公。屈子離憂傳宋玉，龍門史筆授扶風。章堂蜀郡仍無恙，湘綺先生肯主成。都尊經講席，蕙帳臨川故未空。私淑潭州三十載，鑄金早置佛龕中。

東溪小集誦琅琅，散得天花作道場。圯上傳書憐我晚，鏡前擁髻笑人忙。君得樊山集終夕吟，誦姬人曰莫風狂否。明珠佩擬酬交甫，老樹花猶爲褚翔。梁褚翔守義與枯樹再榮。千古竹林觴詠地，肯因華要屏山王。

楊漢中令子得南元寄賀

喜動周南舊吏民，仙郎欄幙一時新。中州省卽中書省，本年京兆試借豫闈。第二人原第一人。北榜以第二名爲南元。修竹楊家添故事，蓮花榜眼現雙身。君先德奉常公王子第二人及第。因君卻起鄰翁羨，累月答兒事竟真。

題楊守默先生采菊圖

離落蕭然處士家，滿衣風露採禽華。種成弈世科名樹，記取江南掌故花。

鄙井香泉爲寫真，離騷經裏想風神。至今玉貌琴川女，飲水餐花學楚人。

乾嘉題墨盡芳鮮，四七星辰少一賢。乾嘉老輩題詩者二十七人。人物蕭條秋色老，令人想像太平年。漢南賢守誦清芬，屢撰延英進奉文。記得重陽花一束，深宮手詔賜鍾君。

月下憶京師舊遊

春明坊裏夜行觴，半是詩豪半酒狂。張八韋三今不見，一方明月照單床。

■ 疊前韻自述

關中二十年游宦，逮事桓公及謝公，每挹金莖消肺渴，亦聞檄草愈頭風。晚唐瘦句拈無可，東海殘碑訪不空。三輔吏民相假借，乞求常在外臺中。

漫將仙館署琳琅，試客分題小戰場。北地詩歌憎習氣，（近見報館刻詩有一城花月庾開府兩鬢江山趙倚樓之句其不通如此）南人飲事半閒忙。（杜牧詩南人以飲爲忙事）玉章有客鷓鴣達，（此間秦銅漢玉率多贗鼎）石鼓何年去鳳翔。五載渭南多賦詠，至今傳唱小秦王。

■ 寶衡捷北關喜贈

我所能爲汝盡能，亦如飛衛學甘蠅，十年名重蓮花幕，一旦功成夜雨鐙。富貴於人相逼迫，文章生翼自飛騰，紅梨舊是君家記，解首無因得繼登。（尊人平之親家癸酉領解光緒乙酉與余同官北山嘗贈詩云分明一則紅梨記別是人間趙解元今此詩久帙附識於此）

■ 題家塾

糝粥平生志，橫經老尚堪。茶聲添書靜，栗事佐宵談。兒喜生書熟，師言苦菜甘。自忘居柏署，彌勒結同龕。窗樹初延月，瓶花未結冰。一堂絲竹肉，三代子孫曾。成就無瑕璧，低回有味鐙。爾曹勉駢角，犁雨我猶能。

■ 兒輩初學屬對余出云墨竹換詩詩換蟹皆不能屬戲賦一詩

近來閩粵競詩鐘，未許兒曹學步工。墨竹換詩詩換蟹，畫松如篆篆如龍。天衣巧製須無縫，玉合精求必可逢。（唐人謂作詩如掘得玉合子有底必有蓋精求之可得）自古文章珍偶儷，南彭北紀勉追從。

■ 再示兒輩

對屬天然雀燕俦，可知鎖鎖儷鈞鈞。萬言每受單詞答，新意須從故實求。墨竹換詩詩換蟹，黃金償劍劍償牛。雅人深致循良事，都被先生古錦收。

自題照像

照影疏篁綺石邊，絲緜摩尾望如仙。一方樂鏡恆河水，人面依稀似去年。（去年亦有竹中照像）  
盡傾心血作文瀾，鬢鬢青青亦未殘。君看東岡老松樹，最禁風雪最禁寒。  
不教放浪不矜持，山澤巖廊在處宜。惟有拈花人解得，維摩眞備四威儀。  
霜臺符檄凜如秋，七尺升車擁八驄。誰識惠文冠底客，畫蛾從古擅風流。

北山

雕陰北望風沙慘，林澤哀鴻幾子遺。萬竈爭熬神木斲，三方橫截宋川荒。（府神葭設局宋家川葭收銳減）連年霜雹災成例，絕徼鹽茶販有私。近買明蛇過三百，可憐挽雪出花池。

皋蘭消息雁郵疏，手板都忘問起居。禿髮地寒宜擁被，林連性忍不知書。極邊春瘦榆林馬，十月冰雹府谷魚。從古銀州誇貴壽，近來織女道何如。

十一月朔

月吉無勞薦壽卮，蜜梅花底閉門時。駸駸驄馬行香早，戢戢饑鴻趁粥遲。（是日粥廠始開）天下大寒瓶水覺，老來輕健獨眠知。年年今日書窗下，依舊蒹蘆一首詩。

生日再賦

謝遣賓僚獨下帷，絮庭兒女倍瞻依。遲遲綺日暉琴榻，肅肅青霜凍戟衣。樂府歌辭鶯百轉，命宮格局蝶雙飛。（子平家日余八字爲蝴蝶雙飛格）南窗打睡遽遽醒，誰識先生杜德機。

□葆生以詩見祝賦答二首

青梅筵上使臣賢，天下英雄孰後先？君子令詞原善頌，老夫不及豈惟年？論才已許兼文武，舉酒何勞慕佛仙？同是楚中將家子，功名未可負貂蟬。

箕牛斥退命宮星，水冷金寒愛火行，鳳歷恰當周建子，蟻史亦怕宋逢庚。（余命中有兩庚子，前年庚子幾瀕於危。）愛談馬槩忘年老，穩步薰屏覺體輕，好學漆園不鳴雁，天人交忌是才名。

□賦得銀燭

流光如雪氣如蘭，夜雨秋屏覺影單，玉箸垂時人惜別，海棠睡去汝同看，心從明鏡臺邊照，身在銀荷葉上安，怪得金釭居二等，冰銜輸爾一條寒。

蘇合香中薰一枝，紙窗竹屋見凝脂，明明似月心堪白，皎皎如霜涅不淄，光豔欲教珠母避，行遊禁得玉孃持，洞房永夕能停待，較勝青燈有味時。

□簾鈎

曲瓊名字亦風流，三角弧形傍畫樓，雙擘柔荑思漢苑，一彎斜玉記揚州，時時反側珊瑚女，世世疏封戶牖侯，三挂冠纓嚴節度，杜陵遺老感恩不。

風舒霧捲鬱金堂，犀玉琤琤夜有光，詈汝中中緣惹鬻，愁人乙乙似回腸，三星掩映成心字，微雨黃昏念膽孃，正好垂帷掩書坐，嫌渠多事放鑪香。

等閒未許挂鸚哥，收拾珍珠與綺羅，致釧音聲敲夜永，鞦韆身世絆春多，勾留楚岫雲無盡，約束瀟湘水不波，碧玉螭猶猶漢製，春溪落日幾摩挲。

西山飛雨捲蛟綃，記得天寒賜錦袍，斜月東西珠箔映，春風上下玉纖勞，洞開門戶休妨燕，乞與綸竿便釣鼈，誰

是九天披霧手，黃羅遙揭五雲高。

□贈梅君前輩梅翁屬書扇因墨其上

升堂俱是聖人徒，請業緇帷德未孤，繼續老先摧鹿角，商量舊學會鵝湖，黃花插帽參差晚，黑豆投瓶積漸無，學術慚余雜王霸，祇應嚴事考亭朱。

□鏢舫寒事

侵階凍草先春發，滿案冬暄比月佳，判事可須湘管筆，見賓惟憚魯風鞋，文章禹玉誠多寶，歌曲堯夫善打乖，一榻青氈一杓火，蜜梅香透小眠齋。

□題尤水村所畫東坡石銚圖用自題韻

此中曾貯老人泉，菌蠢儀形尺幅寬，畫仿竹籬春社冷，名齊石鼎夜吟寒，中冷小杓分江入，陽羨荒廚焙葉乾，古器已登天府貢，尺縑流轉到長安。

□碌礪堰勘堤歸馬上望西安城作

參差樓堞倚青冥，風靜嚴關鼓角聲，虎視九州秦內史，龍蟠八水漢西京，前朝塔廟留奎藻，（名劉數十並邀御題）近郭川原帶晚晴，一自翠華西幸後，長安今是鳳凰城。

□再寄午公

西門柳色自依依，歲暮江皋雁字稀，鄂鈔風行空紙幣，楚棉雪聚紡紗機，遂開馳道如虹瓦，重起高樓待鶴歸，（公籌萬金修黃鶴樓）見說西園多雅集，常令猿鳥見旌旂。

□歲暮過西園有懷內兄

抱鄰微吟饒歲篇，西園風物自蕭然，橫枝尙綴玲瓏雪，新木纔生淡沲烟，退食白魚香晚飯，倚樓紅鶴下遙天，故

人不共桐陰話，石几筌生近一年。

再過西園

西還經歷幾春冬，薄暝園林佳興同。薰草雪銷青綬帶，牡丹火迫錦薰籠。魚衣冰面連錢碧，雁字霞天映帶紅。莫怪庭階生意滿，小樓昨夜已東風。

閱電鈔知石甫觀察備兵右江喜賦

朱鳥南離望繡衣，鏡中鬢戟未生時。身爲雛鳳知名早，官比鴛鴦待闕遲。君候簡三年矣，不似柳劉傷謫宦，好收側貳作蠻姬。（時粵亂未靖）政成莫負搓酥手，要和東鷗絕妙詞。（周叔芸前輩官右江道）

雪中讀綺香樓詩即用其丙子喜雪韻三首

太白仙才世不多，濺珠霏玉兩相和。飛英會上曾交臂，掃葉窗前且訂訛。（集中多誤字）釣雪清湘朝荷筍，朝元行殿夜鳴珂。吾曹羅袞何分別，好續陽春一曲歌。

三輔豐穰久澹災，誰騎白鳳散花來。閒中小賦酬雌霓，酒畔清歌奏忽雷。高詠合登羣玉府，凌寒一上望春臺。梁園若授先生簡，未覺鄒枚是異才。

新編真當古書看，月地雲階別樣寒。漢殿屏風晃雲母，唐賢洞府署猗玕。漫疑銀海花生眼，直借湘江水洗肝。一世衡山依芋火，燒梨天子見應難。

壬寅除夕

西府暉暉庭燎光，朝元端整繡衣裳。信知鏢舫春風早，銀燭垂花照海棠。十九年來判牘勞，能將秦隴土音操。西臺檢校樊山集，關內文章一尺高。量移豸節領之江，鵲報新傳閃電窗。好把煙波洗塵土，明年真上木蘭艘。

紅閨兒女慕錢塘，開到辛夷卽辦裝；打點西湖頭一願，先拈靈隱寺中香。  
十錦名城似畫圖，香山標榜又揚蘇；世人都道湖山好，好過長安舊雨無（中丞方伯以下無不惜別余亦不勝戀戀）

蟠根二麥綠初齊，喜入豐年百棧宜；檐際猶封待雪雪，燈前重賦祭詩詩。  
調鉛弄墨女門生，附鶴書來在碧城（是夕得竹延兄妹書）料是無眠非守歲，玉梅花底話西京。  
不辭今歲今宵盡，頓覺明年明日催；見說君恩似花信，每年二十四番來。

□開歲五日小園餘雪猶在

鶯鶯多時露羽翰，園林臘雪尙留殘；梅邊撲簌疑花落，松頂停凝當鶴看；東府圖書羣玉朗，西樓眠夢水晶寒；藥娥欲鬥春青色，未覺風前縞袂單。

□客和殘雪之作疊前韻

冰檐凍雀曬輕翰，日出高樓粉未殘；天女花多麾塵見，石頭路滑倚筇看；天街過錦防泥澆，夜榻投瓊覺指寒；掃地焚香齋閣靜，自添桴炭展棕單。

□再疊餘雪韻示客

積雪終南互染翰，瑤華明麗忍摧殘；絕知姑射肌膚似，莫向安仁鬢髮看；老友冰心多耐久，癯儒壽相不嫌寒；嬋娟持作煎茶水，肯共羊羔上食單？

□二疊韻詠餘雪

上春重染免園翰，未覺林花昨夜殘；玉蕊蕃釐如有待，金蓮頃刻莫同看；賦梅大段紅情少，倚竹蕭然翠袖寒；直等春風消得盡，一庭芳草綠花單。

□贊臣領師範學堂事四疊前韻戲贈

楷模不獨在詞翰，苦守遺經說抱殘。山上山形同嶽峻，門生門下當孫看。瀾迴學海流何遠，薪盡儒林火未寒。供奉神師堪一笑，如今關內有田單。（昔抱冰師設兩湖書院擬延杜仲丹主講，余爭之，師曰：子以爲不稱耶？此特田單神師耳。）

□賦得梅聘海棠

齋頭朱梅海棠同時著花，光豔照人，戲成四解。

芻尼柳上報春歸，花有風情玉有暉。當汝佳兒佳婦看，衣裳一色染宮緋。  
春睡唐宮酒醒遲，江蘋珠斛有餘淒。如今消盡樓東恨，爲取楊妃作小妻。  
道是無香恰有香，珊瑚玉樹學鴛鴦。好教鴿子投慈母，羞喚山絜作小郎。  
雙飛齊入紫宮籬，難得名花福慧兼。成就青紅兒女願，綠陰生子半酸甜。（海棠果色紅味甘較勝青梅）

□立春夜友松有詩五疊前韻

第一春宵試彩翰，單于風動二更殘。百年青史將詩代，三輔黃圖當畫看。缸面撥雲忘老至，年頭讓雪補冬寒。（去臘暄燠特甚）不須預惜河梁別，尙待春衣換袂單。

□春寒六七疊韻

硯冰生纈罷滌翰，尺涕臨風笑懶殘。眠柳可能春早起，睡棠真怯夜深看。馬行平地霜猶滑，鶴訝今年雪更寒。重裝貂狐肌尙粟，紅圍添絮製中單。

西北風高落雁翰，待將佳雪起荒殘。花須暖窩烘纔放，詩向灰蹠畫與看。銀漢水知通體凍，玉樓人念外邊寒。是誰耕繹忘龜手，擬把黃金買藥單。



賦得咬春八疊前韻

年少曾揮鳳沼翰，紅綾宴後齒牙殘，獅鬚任作常年供，魚鱗休同異物看。（去冬解甚多）  
藟檉雪玉漿寒，咬春筵上羣兒競，卷餅區區較復單。

同人見和梅聘海棠詩再賦四解

卻扇蘭房玉樹齊，紅妝臨睡燭花低，若教解語還輕薄，卿亦孤山處士妻。  
芳梅解笑亦能言，金鼎和羹與細論，儂人黃扉卿命婦，百花頭上互溫存。  
人間五恨說彭郎，金橋鱗魚漫比方，嫁得何郎好夫婿，雪肌分與滿身香。  
幾生修到瑤臺上，百兩迎歸紫府中，值得天錢十萬塊，春秋不斷海棠紅。

夜雪九疊韻

天鵝落鳧鷖飄翰，竹屋通明玉漏殘，疏密自歌禪榻聽，尖叉懶覓韻書看，  
然藜閣小回青照，列柏堂深榜翠寒，不獨琉璃屏覺冷，春牛塑象也蘭單。（是日兩縣送春牛）

微雪即晴曉起坐南檐下曝背十疊前韻

竹外幽禽晾翠翰，松巔微雪漸闌殘，簷牙粉絮因風起，池面冰花映日看，  
萬玉妃纔溫曉夢，（陳與義墨梅詩）  
繁江南萬玉妃，兩黃人不識春寒，西臺暖勝雲門寺，容我三年此挂單。

淇泉見和量移浙臬詩疊韻奉別

玉溪文采映流蘇，惜我雙旌到聖湖，不分量移十錦地，亦如彩選百官圖，  
物情戀別花攔馬，鄉思撩人飯憶鱸，（君浙人）  
煙雨樓前好煙水，情深得似隱侯無？

贊臣移居關中書院十一疊韻

老鶴西來暫養翰，請鄰祭竈燭花殘。書知惠子車中載，身入通明畫裏看。華屋新春雙燕習，胡床舊物一龍寒。唱酬擬續山薑集，宮羽休疑發口單。

友松贈詩書雲門爲雪門雲生讀而覺之十二學韻一笑

要知雲雪皆天物，魚虎從來有賸殘。宰相山中多不贈，書生落井下映來看。梨花夢裏何分別，柳絮風前有暖寒。省識六書通假義，不妨老杜氏徒單。（金史國語解徒單曰杜）

癸卯同鄉團拜張樂設飲梅老首點借雲一齣寓惜別之意致可感也賦此奉別

舊曲梨園說借雲，部頭進點示殷勤。關中暫得陪楊尉，河內猶思乞寇君。南部烟花休箸錄，東山絲竹感離羣。公爲當世胡安定，知否西湖待主文？

再疊鱸字韻贈淇泉

春入秦川百卉蘇，街西柳浪似欲湖。玻璃盞子聖賢酒，雲母屏風主客圖。子弟並爲中散鶴，（兩猶子皆雋才）神通能致左慈鱸。（君所至應有盡有）永嘉八面矜刀割，爲問才鋒似此無。

己丑客滬上識淇泉於小村中丞座中時君初登賢書一彈指頃十五年矣三疊前韻誌感

往歲秦氈客大蘇，孝廉船欲返鴛湖。東方未擁三千騎，對食同甘四十鱸。（元詩歸釣吳淞四十鱸）賢主風流如謝傅，仙郎輕俊異昌圖。關西今試扶輪手，回望州門有淚無。

四疊韻寫懷

風上清佳杭勝蘇，在官不異在江湖。大宗臥閣饒山水，元相全家住畫圖。漫以美官方枳鳳，（客有言缺瘠者）虛慚巨口似松鱸。（昔與郭主事共食郭誇左湘陰口能容拳余曰口巨能作健不郭憤曰汝見第二人耶余諱握拳納口郭默然）鳳凰山是君王賜，提點三年許我無。（香山杭州詩皇恩只許住三年）

關中春興五六疊韻

神皋春物盡昭蘇，祇欠昆明水一湖。（昆明池今湮）勸學侍刊三李集，過關誰貌七賢圖。雪消隴麥青如鬪，冰裂河魚狀似鱸。三輔祇今猶漢最，官清民樂九州無。

眼明身健罷豈蘇，人道詞仙似石湖。碧樹風柔來載勝，紅房春靜掩椒圖。燈屏多畫桃花馬，檀帖新題淡墨鱸。（陸詩堆繁菱熟燕支角，藉藻鱸新淡墨，鱗猿叟嘗寫此聯，余屢仿之）風雅不教妨吏事，名場曾見此人無。

戲簡灑生

東洲書派歸猿叟，北地詩名讓蝶翁。爲乞湘南齊處士，好鑄珠篆翠珉中。

疊石甫以詩見示自註云直鈔公一句近賦紀恩詩亦然戲題其後

敝衣椰簷玉溪生，豔體西崑故不情。幾樣時時學京兆，鴛聲一一辨楊衡。藥偷幾粒歸蟾府，梅有雙身現鳳城。（晏元獻有紅梅一株爲園丁竊賣王君玉獻詩云剛被園丁偷折去，鳳城從此有雙身）自滂宮牆傳笛譜，人間纔識李謨名。

可是東方食玉桃，亦如秦女學吹簫。楊家慣效唐臨帖，崇本真成宋影鈔。鸚鵡性靈能學語，葫蘆樣好不勝描。憑君偷盡江東集，不廢錢唐萬古潮。

介眉將軍自畫東都紀遊圖，屬題卽步卷中自題用東坡宿牛口詩韻。圖蓋甲申歲介眉官祠部時從廷尚書勘視東河作。

自濃急宣防，爭言寒瓠口。東河昔沈菑，水嚼斷岸柳。以金擲蛟龍，官職西園舊。君時賦皇華，來饒濟南酒。雁戶懸衣糧，河兵肅刁斗。手寫東遊圖，金篋緘之久。從來鴻烈註，不可無高誘。索我和坡韻，我卽杭州守。斯圖掌故存，豈止畫中友。更讀畫中詩，一殊掩百陋。筆力有餘勁，挾河駕東走。

三月湖雨日食不見

庭氏虛彎救日弓，表相應策雨師功。良辰無恙行天上，龍虎何勞禁海東。誰見太陽遮黑子，莫將初月問黃童。崇朝甘澤盈天下，復見光華慶再中。

西堂春興

枕西堂宿雨餘，春駒飄影過交疏。庭莎綠襯緋衣鶴，池水金明繡尾魚。頻喚茶來留客話，暫拋花去課兒書。後園隙地除荒蕪，半種垂楊半種蔬。

光風轉蕙泛崇蘭，簾閣幽幽草不刪。梁燕有情交哺子，林鳩雖拙也名官。聞雷筍迸犢雙角，過雨苔添豹一斑。寒食前頭兩株雪，不須惆悵憶東關。

衣繡三年受吏衙，林亭還似野人家。臺烏八九皆生子，蝴蝶單雙總戀花。白白桐絲輕可紡，青青梅葉小於茶。點背偷記新詩去，寫徧屏風六扇紗。

暮春三月麗人天，休拗楊枝贈馬鞭。（時候代未至）曲水遊從紅杏始，玉堂歸在紫微先。治書每夜過了夜，修禊今年又癸年。王謝從來多任達，臨河佳序慕前賢。

題綠珠畫像

倩女真還隔世魂，明珠重現掌中身。平生第一清談好，閑閣居然有晉人。明妃果薦奇章寢，弄玉還歸沈下賢。解釋當年金谷恨，一生含笑對雙川。

清明雨中

薄陰罨樹曉凄凄，三月餘寒鷺未啼。兩樹新煙榆莢火，滿鞋春雨杏花泥。燕如游宦巢難定，柳似攤鬢髮未齊。每歲清明思舊里，子規聲裏發紅梨。

新寒

濕煙吹霽曲江春，草色裙腰積漸勻，紅杏含稱新進士，綠榆應是古錢神，讖鴝成鶴天無恨，將虎儕鷓物自親，見說東菴逢穀雨，姚黃接引看花人。

二月二十八日大錄獄囚畢，轎客於默化堂循故事也，即席索諸公和。

百吏晨趨御史臺，闢門大錄動風雷，乍停秋讖丹毫筆，試舉春風藍尾杯，喜雨詩偕修柏賦，紅雲宴爲海棠開，爽鳩事畢朝天去，更領東門祖餞來。

排悶

風柔雨膩作端陽，齋閣愔愔日正長，鏡攝衣花呈三字，（照象佳者衣上花紋畢見）書題扇葉作雙行，發揮名理由心得，識別人才要眼光，案牘已清裝未辦，垂簾清領幾銖香。

午日雨

轅門飛鳥避旌旃，靴版中台逐隊還，朔日釀成熟梅雨，（時連雨五日）南風吹溽深蘭天，得梟好佐天中酒，尊錦眞愁海上船，（聞俄日構兵）今有南朝王鐘惡，紅榴如火照瓊筵，（是日北都護生）

賀葆蓀生日時方統四旂督修水利

河渠遠溯漢西京，歌吹聲繁細柳營，百二永開秦國利，十三還並帝君生，（是日祭關廟）鴛鴦豔奪神仙福，（君刊小印曰願作鴛鴦不羨仙）鯨鱗難當子弟兵，（君修碌礪堰成大水驟至隄竟亡恙）照眼榴花妝閣喜，忘憂萱草板輿輕，（時太夫人將至）五花玉轡驕名馬，（君有馬癖）萬柳金隄聽曉鶯，盧肇是龍嬉大午，（五月望爲大午）李侯古棠應長庚，力田處處皆秋熟，衣繡人人羨書行，文武兼資將家子，麒麟高閣勉題名。

五月十三夜聞鶻

舉頭見華月，漸滿如佛面。窈窕玉女窗，流暉閃薄電。鵲喜昨雨晴，明河皎匹練。離立嚮南枝，好音若珠貫。豐年合有慶，病婦或當健。福我小兒女，舉家皆半善。老年愛吉祥，對汝齒爲粲。清影一簾花，莫驚徐郎彈。

人日 春效初唐體 鈸別

春光不落歸雁後，酒盞常置梅花前。園林散雪仍團雪，樓觀迎仙復望仙。望仙樓畔青旂舉，彩仗東郊競笳鼓。七日方開薦鴿筵，一年又換鞭牛土。去年人日故人同，今年人日別離中。蠟鴉花下遲遲夜，金燕釵頭裊裊風。蠟鴉金燕皆依舊，故人那得長相守。爲問分看百種花，何如同傾一杯酒。百花酒熟須謀醉，中有秦川美人淚。若將紅淚滴春槽，何止中山千日睡。千日常如一日春，今年漸老去年人。世間白髮持公道，陌上飛花擁畫輪。花開陌上歌聲緩，乘興東遊不知遠。楊柳青時馬去遲，湖山好處春來晚。湖山好處此間無，此間人好勝西湖。判將佳麗歸吳越，未必風流遜白蘇。蘇髻白傅吾同調，鏡裏朱顏都未老。相別當如春日遲，相逢當似春風早。東望望春春已歸，西望望君君可知。明年人日題詩處，是我西湖西望時。

渭南感柳 丙申丁酉間所種

手種垂楊萬萬枝，渭城煙浪足相思。鏤金衣帶青青髮，此是樊山七歲兒。

出華州屏去牌纛

王融搥壁亦何求，苦道車前少八驄。何必霓旌與芝蓋，蓮花仙掌在前頭。

輿中道興

今年盛夏比秋涼，車騎輝輝滿路光。行轡攜茶惟冷飲，驛牆落墨半斜行。秦雲舊隱如嬌女，渭竹檀巖是故鄉。怪底酒痕紅上面，殷勤父老致壺漿。

華州行館雨中與葆生雲生夜坐

灑水虛連漢，將營藩陽猶駐黑河兵。徒勞小范憂天下，忍聽何戡唱渭城。雨榭一樽炎暑退，風簾雙炬夜談清。不須重惜河梁別，世事悠悠去住輕。

□ 葆生偕唐司馬童大令送至闕鄉同宿於河神廟質明而別

送客灞橋情已盡，情深尙覺潼關近。出關五十里黃塵，衫笠蕭蕭垂柳映。臨流祠樹碧於雲，古殿乃祀河濱神。東西道院並修潔，草花石几羅苔茵。三君就我夜連榻，解衣乾浴飯有鴨。綺綠親傳海上琴，（時以琴贈葆生）淚紅猶惜關中蠟。寺鐘三打朝暎紅，君馬西還吾馬東。一聲珍重車塵起，拗頸數望蓮花峯。

□ 閏午日宿新安縣廨

靜院燼熏沈水含，從容小邑息珂騶。南風解慍雙重五，東道留行一再三。（是日擬宿磁澗言大令有章挽留至再）新酒泛蒲香飯美，小桃夾竹露紅酣。憐渠玉雪嬌兒女，自摘安榴勸母饈。

□ 新安署齋見悉伯師楹帖感賦

病腕支離十四鴉，酒邊彈淚濺屏紗。當時几格尋常見，今似萋蒲葉底花。

□ 戲贈阿頻

眼遲起晏不知愁，催上金車索臂鞦。晚傍榴花安鏡具，夕陽如水照梳頭。

□ 閏五月初六日中兒迎謁於洛陽城西十五里明日護眷如汴梁賦示

初試牽絲手，欣看納粟郎。風塵諳吏事，燈火話家常。弟妹色皆喜，妻孥累暫忘。朝天無筆礙，未第憶金梁。

□ 渡河 內于欲借行余止之

孟津北去森煙波，快馬輕輿取次過。織女明星不同渡，人間亦自有銀河。

□ 初七夜斂溝橋行館見月

長黛娟娟畫未勻，初三弓樣掩輕雲；  
一旬梅子黃時雨，度了河橋始見君。  
玉宇瑤樓未覺寒，迢迢迥出碧雲端；  
光明一片秦臺鏡，多少蒼生仰面看。  
自繙行卷寫朱絲，攪馬喧騰上豆時；  
萬事淹遲成一笑，月中纔補雨中詩。  
（是夕作硤石道中五古一首）  
玉臂雲鬟是也非，去年今日送將歸；  
瑤臺後夜相逢處，香霧濛濛淚濕衣。

寄五嶽

第二人如韓稚圭，臚雲甲第有光輝；  
高陽里爲荀龍重，忠孝名於鄭獬歸。  
（君廷試原擬第一）  
白日憑將肝膽照，青雲生得羽毛飛；  
冰壺玉尺詞臣事，會見星軺出帝畿。

孟縣以東林木茂密風物清美喜賦

雞犬相聞阡陌通，  
肩輿安穩勝鳥篷；  
炒茶火接頭青後，  
衣繡風生萬綠中；  
瓦屋三椽當畫黑，  
石榴一點動人紅；  
冰襟六月渾忘暑，  
不用浮瓜羨鄴宮。

寄繡漪兄妹

高弟經年別絳紗，  
朝天今日當還家；  
金釵預換雲亭酒，  
素手重煎雪水茶；  
一卷珠璣行笈草，  
滿門桃李女兒花；  
謝庭朗韞俱才俊，  
棋墅聯吟定自佳。

木蘭店感舊

斜日荒城柳弄煙，  
沉河新水碧於前；  
木蘭店裏填詞夜，  
雪打花朝又七年。

出磁州北門候車未至小憩柳陰下書見

粉牆竹柵是誰家，  
碧玉溪光兩道斜；  
驕馬倦時磨柳瘦，  
小鷄嬌甚賽蘋花；  
天中艾虎紗初換，  
（近兩日始熱）  
甚裏磁枕亦佳，  
（磁枕多作兩孩拱伏狀）  
上得盤輿仍不去，  
貪看雙鷺立煙沙。



過湯陰謁岳王廟

金牌火急出臨安，五國城中白日寒。泥馬屏王渡汴易，鐵椎養子擊秦難。故宮有客歌離黍，樂府傷心踏賀蘭。我到西泠寒廟柏，與王灑掃作祠官。

余讀北史最喜高神武過鄴屢賦其事今再詠之

英雄投袂起鮮卑，風誼機權見亦稀。看斬亂絲心自許，能馴惡馬衆爭歸。飛龍膝下三英主，落雁宮中幾玉妃。欲訪香姜求片瓦，屋山金字已全非。

鄴中

清河如鏡鄴城東，無復高歡避暑宮。政爾虛名薄袁紹，居然國色出曹洪。錦堂未是能文手，（見宋景文詩）銅雀終高折臂公。賢令勸爲河朔飲，西園飛蓋燭花紅。（安陽令留行頗切）

魏家營見馬纓花盛開

依約城南見彼姝，燕支洗影映清渠。門前送客疑紅拂，嫁後宜男定紫鬚。綠耳梯來高摘豔，桃花馬汗細零珠。金屏早晚隨開闔，記得春燈隱語無。（或出燈謎門前一樹馬纓花打禮記二句戶開亦開戶闔亦闔）

高敖曹

龍犀豹頸鐵兜鍪，人物英彭第一流。抵死軍前張鼓蓋，快心枷上斫人頭。風流新婦知詩否，氣力河神敵虎不。鞭撻健兒終賣主，始終論定似桓侯。

絕句

高昂豹頸身隨盡，韓軌豬腸貴有餘。上士傷亡中士死，朝家封拜付庸流。

河北行館夜坐遣興

明蟾入戶照行騰，夜渴呼漿僕漫鷹，暫駐顏霞女兒酒，未消心火老人燈；（王幣詠老人燈詩猶有心頭火未消）詩思灼突泉千眼，官級靈光塔七層，京洛故人今復見，風期無改玉壺冰。

□憶阿璘

隨娘別我兩依依，長大傳經或庶幾，看戲亦能談古事，見賓常願著新衣，紗籠茶火書邊照，髮繫蜻蜓屋裏飛，不識西湖在何許，花前惟是盼爺歸。

□順德行館鏡下自書日記聞鄰店琵琶聲有作

聞笛山陽境逼真，驛程今日渡洛津，誰家碧玉初教曲，有客黃金願買鄰，溫尉錄殘乾臛子，江州感動濕衣人，尊前一寫明妃怨，更助坡詩百態新。

□子修典試雲南遇於順德行館喜贈

使星如月出京華，六月黃塵撲帽紗，綠蠟暫同河朔酒，碧雞遠賦日南花，求仙東海謀真誤，（談次及東洋事）踏雪西泠願豈奢，（君約訪余杭州）此去荆門煙浪闊，臨江草閣是吾家。

□疊韻酬子修

多收秋實屏春華，不患鍾陵障眼紗，（世傳熊次侯典吳試夢人贈以眼鏡遂迷五色）文換神龍當日藻，（唐神龍中尙臺閣體）士如天馬滿身花，要知經濟須儒者，莫倚橫縱是作家，卻指西湖爲息壤，與君畫地作交踪。

□子修來詩期待良厚再答

身騎驄馬入東華，重對宮屏十扇紗，御稻少密春雨後，苑荷還發劫餘花，肯知夷甫諸人重，（謂賢拳禍者）俗厭歐羅一味奢，（今學西人者但學其侈）日下學堂根本地，好將忠孝答天家。

□模齋京兆送鐵牌如邯鄲遇於順德疊前韻爲贈

日出扶桑望使華，姓名早記御屏紗，久儲香艾二年藥，飽看紅櫻白鳥花；我覩卿雲先得快，人望霖雨後彌奢，明朝金簡投龍罷，同踏春明覓酒家。

□夜半登火車卽寢

扶上鸞輪人語喧，月中城郭過如煙；亦如醉著吳船，聽水聽風自在眠。

□至真定換車板屋新淨喜賦

槐柏清華結構工，銅樞網戶望玲瓏；自忘一日行千里，坐臥依然鑠舫中。

□湖上小極呈晦若

黃塵二千里，抱病入湖天；煙水碧無恙，露荷香勝前；朝臨肚痛帖，夜釋轉筋篇；特許聞瀉鷺，來依臥榻眠。

□自和高廟第一樓題壁韻

捲幔西山翠欲流，重臨潭水試綸鉤；木蘭院裏尋鴻爪，古柳陰中賣雁頭；（又名雞頭又名雁頭）東壁至今添

雅唱，（前詩和者甚衆）西湖依樣起高樓，（西湖亦有第一樓）杭州此去舒雄眺，不減春明陌上遊。

□題菊人少司成江樓送別圖圖作於丁酉

庚戌前頭寫此圖，南遊豪宕覽雄都；承平蓮幕千鍾酒，舊物青天一顆珠；鐵鎖江關飛雪練，玉堂人物浸冰壺；如

今再把新亭蓋，江表諸賢有淚無？

□陪少保師晚登寄園西樓看西山用雙聲體

臨流嶺麓葛連蘿，公袞剛歸館閣歌；香灑西銜霞榭小，淀舸東盪電鐙多；山深禪樹捎霜集，樓斂林嵐攬綠羅；羣

峭秋清勤檢校，擔簦得地好頭陀。

□又賦得樓上晚霞雙聲體輾轡格

陰煙厭雁影遙移，新現霞綃小岫西，仙杏天斜香旋洗，潭桃點逗鸞都低，衣纓一院圓於月，笳束三山瘦似詩，畫  
幌黃昏紅鶴喚，層斂彩翠詫參差。

□曉起坐綠勝盃呈少保師同文

煙帶露華清，曉碧垂垂柳畫窗，綾傳公是學眞星日，讀子由詩冷雪冰，天信有情魚水在，地間無草蕙風蒸，前  
從記室宣高論，罷舞雲游臥曲肱。

曲肱臥游舞雲罷，論高宣室記從前，蒸風蕙草無閒地，在水魚情有信天，冰雪冷詩由子讀，日星眞學是公傳，綉  
窗畫柳垂垂碧，曉氣清華露帶煙。

□登吉士樓呈叟夫 浙館爲趙天羽寄園故址屋後有樓五楹抱冰師題曰吉士樓○同文

臺池好處在深幽，水抱斜街一玉鉤，開畫古藤舒靜院，振衣天羽借高樓，苔斂舊井茶煙綠，燕掠寒塘柳色秋，來  
看晚山西學翠，才人楚越學歌謳。

謳歌學越楚人才，（余不日赴浙）翠疊西山晚看來，秋色柳塘寒掠燕，綠煙茶井舊斂苔，樓高借羽天衣振，院  
靜舒藤古畫開，鉤玉一街斜抱水，幽深在處好池臺。

□江亭散客偕晦若符曾翰甫陪少保師坐後廊看山用雙聲體

半碧蘋婆白藕醅，焙癩滿餅伴冰杯，怕斑潘影憑描墨，勉命述名每夢梅，甫傍溪陂白悲別，（晦若在京祥將如  
浙故云荆宜間甫讀如浦）坡盤滄浦邁旁陪，（師從子三人侍游）浜邊蒲稗蒙評泊，盼眇明波緬八裴，（在座  
八人）

□代定輿公題乘槎自濟阿圖具少壯老三像

欲將自濟濟斯人，滌筆清湘自寫眞，一世度生情不斷，無風波處現三身

重開圖書看瀟湘，彷彿銀槎手澤香。後世三公開濟手，於今橫海要津梁。

又代題分燈課子圖

不是機聲燈影圖，齊看梁孟把經鉏。當年一點寒窗火，換作宮蓮夜照書。玉立文孫兩府開，宣仁宮禁嘆奇才。老人一幅南樓畫，乞得天題第二回。

槐

風動雙槐軟玉枝，青蟲嚼葉滿階墀。曾供五月清涼夢，何恤秋衫墮網絲。

梨 庭前梨一樹八月著花未幾葉紅

秋梨吐萼破春慳，又得新霜半樹殷。可有時賢速成意，葉紅花白兩句間。

桑

策策庭柯夜雨霜，秋桑落後憶帷裳。餘杭亦有新醪酒，何獨蒲城是醉鄉。

柏

參天不恨十年遲，拱把爲龍已自奇。冰雪如山不凋色，况今未到歲寒時。

聽竹

松清竹俗強區分，次律尋聲未識真。太尉豈能知許事，聽秋別是一流人。（房琯云竹聲最清及聽松聲始知竹

俗）

贈別顧五

梁園詞客玉京遊，滕閣長風送使舟。才與情兼人是玉，筆先年老氣橫秋。錦爲半臂真銷得，酒勸雙鬟且醉休。送我東行高著眼，湖山第一古杭州。

近與少保帥多爲七言絕句賦呈二首

苦愛江東義試詩，蒼山格調劍南師。張王淺處饒深曲，祇是今人未備知。太白龍標兩不磨，入粗入細要才多。六朝人物王湘綺，奈爾孤舟夜雪何。

南宋義試詩有夾竹桃楊妃鬢二題戲和二首

神仙君子一時并，品題羣芳轉見輕。藍菊臘梅皆此類，不中客噉是虛名。（夾竹桃）開元天子整蒙塵，不獨纖柔爲太真。輕薄香奩亡國券，蓮花響屐是何人。（楊妃鬢）

原詩皆著題僕詩則寓意也再和二首

天遣紅兒藕綠君，一重花雨一重雲。分明戲鴨圖中見，並照春波影不分。（夾竹桃）纖纖新月媚三郎，解脫雙蓮到地香。當日壽王宮裏至，可提金縷過南堂。（楊妃鬢）

宋人又有上元及詠茶二絕並奇麗澆和二解

月采星華聚此宵，紅蓮豔發五雲高。人間子固真詩伯，壓倒王珪駕六鼈。龍鳳連翩貢玉京，君謨陶鑄好門生。聘眉蟹眼通侯相，世世疏封不夜城。

前題再和

鐵鎖星橋紫霧蒸，今宵百萬費繚綾。汴州爭及杭州富，替買東京一夜燈。詩城酒國斂勦勞，萬竈槍旗挾雨驕。九曲山前尋鬥將，軍中娘子服周韶。

試茶

秋冷風爐漸可偎，候湯評水助詩材。工夫可但茶中久，更玩成窯小酒杯。

炒栗

此事休文恐未知，東京風味仲秋宜。斜街上銚鐘如豆，滿路糖香似舊時。

□ 不朽堂看松月

千百蒼龍擢夜珠，空明瑤水積庭隅。誰知露下看松客，三嚙清光一事無？

□ 斜陽

幾多俠少投歌館，亦有仙郎別省薇；（一作出粉闌）莫道斜陽無一事，催人夜飲送人歸。

□ 送子封早朝坊缺引觀子封名在第五今第四矣

柳拂宮袍露未乾，雞人催起五更寒；聖俞難免閨人笑，又上鮎魚一寸竿。

□ 秋夜待竹筵不歸與繡綺庭際看月

一鶴青天久未還，遠聞宮漏滴秋潺。分明夜過承天寺，月在空庭竹柏間。

□ 中秋

今年今夜金杯酒，明月明朝可奈何？（十六夜月食）待過明朝無缺陷，更持杯酒勸姮娥。

□ 癸卯九日少保師招集塔射山房卽席有作有西人夫婦避暑於此頃始移去

遠人歸我山房塔，節度重飛九日觥。撲地雲嵐揩老眼，倚天樓閣照秋晴。紛綸御撰迎中使，插戴寒花學後生。徙倚經廊歸騎晚，星河鼓角滿嚴城。

□ 詠庭際小松

疊石三層作小山，種松七本繞亭欄。枝柯未放龍鱗老，膠液真同虎魄看。依託小園憐地瘦，平章晚節待天寒。髯翁自有三公貴，不樂秦時所贈官。

□ 歸自湖上小極偶書

貪著西山向暮回，焚香擁扇閉高齋，多眠常覺眉稜重，少食休言口輔佳；低著帽簷三寸屋，寬留胸氣一條街，（見靈樞）閒門盡日無車馬，臥聽疏桐滴雨階。

兼葭簾晚坐

澹雨濃晴薄暮天，乍寒高木起新煙；倚欄閒看風吹柳，搖蕩僧房似釣船。

葡萄

盤龍珠帳翠光浮，秋實離離帶露收；官職豈關醇酒事，有人一斛博涼州。

記北人語

某都統語抱冰師曰吾輩居東南輒病渡河而北喫些黃土即愈矣  
卑濕江南百病煎，鋒車絡繹願朝天；東華可但萱蘇貴，一線京塵值萬錢。

晚詣湖上積雪滿地

畫角催寒晚霽開，水邊無數好樓臺；一條扇子湖西路，看盡風荷看雪來。

贈沈京尹

往歲行都見書札，早知緯武復經文，綢繆國用勞心計，指畫邊情視掌紋；秦爵亟登樽里子，燕臺重起望諸君，百年文肅遺風在，冊府標題續舊勳。

千載風流說尹京，張韓異代與齊名；跨驢漫作推敲勢，拊馬還將使面行；奏草頭番稱雪瑞，（君到任三日即奏得雪）官梅垂發覺詩清，應官十日能停待，木李茱萸索報瓊。

十一月十二日力疾出都以詩別宮保師

病齒兼旬頗自憎，升車雙袖淚成冰；一甌藥粥清漳館，孤負程門雪夜燈。

盤豆驛夜坐 連日齒痛益甚



破店荒雞三換更，詩肩病骨兩峻嶒，不宜煖筦休燒葦，欲作稀糜更斧冰；凍柳依依盤豆雪，明星的的嶽蓮鏡，來朝靴板瀉關路，延接賓僚僕未能。

齒牙伶俐翻成病，養尤荒唐蛙作塵，今日翼經窮八站，詩囊藥裏兩奇貧。

臨潼縣齋對雪贈雲生

整紆征轡駐臨潼，來踐琴堂玉一弓，笛裏梅花唐李白，甕頭竹葉漢新豐；律吹寒谷春先到，飛近溫泉粉易融，二十年來琴酒伴，瓊瑤滿握得重逢。

是詩  
余到京寓四牌樓十二巷內兄令竹延夫婦繡漪姊妹與余同居起居服食與在家無異別後感念而作

謝公兒女入吾家，寢膳甘甜樂事除，不辨兩家綠楊樹，合爲一本紫荊花；性情都似溫涼玉，定省還隨早晚衙，兄弟昏姻勿相遠，夢中腸繞舊京華。

疊前韻

清書焚香百慮無，厭聞秦缶唱鳴鳴，魚烹妃子含來玉，露挹仙人掌上珠；雪藕自呈浣紗臂，黃葵猶茁女冠鬚，（女道士康紫霞生鬚見西陽雜俎）遮牆誤喜輕雷過，恰是金車轉軸轆。

清書攤書百慮清，到秋猶轉建章鶯，袍靴對客誠多事，裏袒驕人亦不情；（用謝靈運事）薏苡菊甘便服食，苒紅芹白各根莖，暑寒全與都門似，從古長安是漢京。

戟傳用消暑韻見寄次答

楊有疑塵徑有苔，停雲長負掌中杯，小文會友師湖舫，（同治間復堂藍洲諸君爲湖舫文會）大字刊書仿相

臺杞菊有香爲我壽，薔薇多刺笑人栽，百家詩派從吾說，妙解人頤望鼎來。

■疊前韻酬午詒

東園日涉半弓苔，愛玩池花酒數杯，花似菩提全著子，池如明鏡亦非臺，晚榴萬綠中間見，早菊羣芳末後栽，泉石謝公親位置，風光留付阿連來。（東園爲尊人中丞公締構）

■八月二日招同仲錫澂之子指集牛頭寺送徐子修孝廉楊吟海大令之日本

角巾挈雨出郊關，來叩香林禮佛鬘，馬不驚塵知土潤，僧難免俗羨官閒，平臨二曲（韋曲杜曲）煙中樹，指點三神海上山，千載杜祠觴詠地，桂叢三發待君還。（寺中桂猶未花）

■壽萱枉過話舊

種紫薇花可一廳，君來併作二薇亭，功名各自庚辰始，（是年君留館而余改外）科舉新逢丙午停，華髮滿頭皆隴雪，同年三百漸晨星，往時丹鳳城南雨，移向長安剪燭聽。

■題壽萱詩集

能教綺麗復飛騰，上口依稀學杜陵，少日文章驚八米，（君少有神童之目）晚年家法守雙藤，（君先德有雙藤書屋詩行世）徧游蒿華才難盡，付與伊梁唱可能，此老心胸定何物，若非匱錦卽壺冰。

■次韻酬壽萱見贈

薛能肯戀一官粗，解印東來覽漢都，隴首花緣何遜貴，王官谷異柳州愚，（君所居距谷口數程）告天細數焚香事，盡古徵吟定命謨，（謝公讀毛詩最愛訂謨定命二語）河決至今留惠政，仁人忍效豹投巫，（去年蘭州河決君力任賑務）

■次壽萱東宦陝諸同年居陝者凡五人

德星一夕五珠聯，高會無如此酒賢。後熟果同前熟果，出山泉似在山泉。敢云氣盡關中布，未覺莊荒陸氏田。他日隴秦修治譜，樊南可有一燈傳。

晚憩柳下

盡日東風吹柳絲，鱗鱗春水動荒陂。雪山水牯垂垂老，竭力耕田恰爲惟。

元日吉甫中丞見過

柏子香清畫舫齋，宋旗前引八驄來。黃人捧日重陰豁，青帝敷春萬井開。關內羣山朝玉座，海東高浪駕蓬萊。履端莫下憂時淚，好進南山作壽杯。

春事

東風冷暖視桃穠，芳樹迎暄綠未齊。縵色自循茶瓊袖，硃臙添拌印池泥。客來浮蟻逡巡滿，衙散幽禽自在啼。得似晉人高致否，絲囊麈尾手親攜。

春興一首呈吉帥

福陵東望涕縱橫，無恙旌旗在漢京。雲物曉蟠龍虎氣，鶯花春入鼓鼙聲。收儲病裏三年艾，騰躍胸中數萬兵。亦欲觀棋從局外，奈持遼瀋作棋枰。

十一日海棠花下賦

露紅新綻海棠梢，佳節何人伴寂寥。可但今年今日憶，年年明日小花朝。（俗以十二日爲小花朝）

雨後種竹都活喜疊前韻

新篁如酒人，渴吻希三雅。雨則孫爲龍，不則兒作馬。昨暮月離畢，膚雲起太華。夜臥聞跳珠，喜如金躍冶。農田方待澤，三禱龍祠下。首爲豐年慶，此君其次也。曉起巡南檐，琅玕不勝把。先蓮爲君子，與蘭皆王者。遂疏管城封，靡怨

湘娥寡，細已勝漁竿，大將劍樓丸。其旁筍斜出，穿破土花赭，明明嵇阮徒，君侯何瀟灑？一再催我詩，波箋雨中寫，晚飯不用肉，清齋屏官鮓。

清明

周家原上夕陽晴，聞道青松已長成；惆悵官身歸未得，故鄉一十五清明。

二十四日日本攻旅順燬俄艦三

驚起驪龍臥榻眠，排雲戰艦出仁川，鼉鼓久催弦歌地，砲火橫飛雨雪天；鐵鹿沈沙船帶甲，金蛇繞屋藥無烟，山東豪傑今何在，野哭千家過少年。

午帥電示正月二十四日日本攻旅順克之電寄一首

昔借荊州不我還，祇今墨守屈於般，雄師覆壓孤豚上，弱肉推移兩虎間；小海真成無定水，豪酋欲觸不周山；俄守將先有決不投降之語，捷書電告東京夜，美字椒風一破顏。

二月二十五日曉起雨雪雜下

東風吹雨糝銀沙，深炷爐香罷早衙，寒食清明剛過了，人天無處不梨花。

午帥電云好詩方到戰耗不真蓋旅順未失也再賦

海上高臺百尺危，般攻翟守歎交綏，甘泉夜奏無消息，橫水明光半信疑；七日更催苟偃戰，兩存無礙少陵詩，扶桑已據神頭勢，且可旁觀國手棋。

俄踞奉天金銀火藥二庫

廠藥椿錢滿舊京，豈期吐吸任長鯨，籌邊久已無中策，逐北何當召外兵；冰上有橋驅鐵馬，遼西無夢警黃鶯，萬牛盡挽戎車去，三省春田不廢耕。

營州

營州消息近何如？舊國遺黎少奠居。燕壘似聞騎劫將，（俄以科將軍代阿提督）聊城誰致魯連書？鯨鯢各效封京觀，蚌鶴何曾畏老漁。舉世清明爭上塚，四陵松柏日凋疏。

營州消息近何如？黑水西來卷怒波。前敵已迴平壤道，後軍猶阻大陵河。民間轉粟牛車盡，戰後添兵馬賊多。辛苦瀋陽諸父老，五年一再被干戈。

感事和文觀察韻

東風誰置一丸泥，震動全遼事鼓鼙。橫河尙餘楊僕艦，（我兵艦今爲日用）哭師何限杞梁妻。片言存魯無端木，萬里思鄉有達奚。（謂阿提督）誰向平陰先二子，不鳴多是失晨雞。

漫興

貂狝全寬覺體輕，臥聽鼓笛滿層城。海棠開泛春酒冷，社燕飛高雨乍晴。橫艸何來邊寒氣，種花無異老農情。鬢頭有酒姑謀樂，更覓何年是太平？

曉起坐東園寒甚

珠茸換後曉寒加，風色清嚴畫幔斜。暝坐心同魚在水，閒行意異蝶尋花。科場舊物憐紅杏，故里春陰憶采茶。亦欲草堂題秀野，朱欄粉甃竹籬笆。

中立

眈眈兩虎薄庭除，畫我遼陽作陣圖。爭鹿未知誰得者，鬥龍何取我觀乎。鼎形早失三分二，博局曾微一註孤。三十五條中立例，春王正月出皇都。

日本兵艦攻旅順甚急

兜烽紅煞海東雲，萬灶無烟白日曛，死蚌今明俱不兩，鬥蛇內外各成羣；雙棲海燕愁危幕，（俄將夫人生日諸軍稱賀日人攻其不備受創頗鉅）數紙風鳶出敗軍，聞道扶桑詞賦手，安排露布寫和文。

寄遠

修門一別意何如，身與秦親覺越疏，書札再三問東事，夢游四五到西湖（東坡與人書歲常四五夢到西湖）楊花白後成春服，豆子紅來作念珠，爲問絳紗高弟子，暖風遲日有詩無？

次韻代答

修門別後問何如，莫遣長安信息疏，藥註欠斟涼暖玉，蘭舟長負雨晴湖，扇羅江左家家畫，歌曲樓東字字珠，除卻當年蘇學士，紫薇花見此人無？

雨中

幾番風雨送春回，點點飛紅挽綠苔；人欲速成天亦爾，清和便已入黃梅。

初夏

春深夏淺氣清華，種豆將成課種瓜，一雨一晴熟梅子，九天九地糝楊花，池中菱芡勝鋪錦，竹裏軒窗未換紗，好與如來作生日，藏經箋紙寫兜沙。

以官署夸示內兄

有唐舊立中書省，易代猶爲宣慰衙，仙樂自鳴萬年樹，（謂音聲樹）風香不斷四時花，王侯第宅登詩史，（署在唐爲中書省其半爲汾陽王府）金粉樓台出畫家，曾是六龍行幸地，微之州宅漫相夸。

午帥移節吳中馥庭方伯歸自滇南餞於鶴樓繪圖誌別電索拙詩寄題一首

新撫欲乘黃鶴去，故人已倦碧雞游，雲移鶉首雙持節，（兩公皆常撫陝）風送龍驤不泊舟，來暮歡聲動吳會，

凌烟副本在江樓，誰知留滯周南客，腸繞蘇州又鄂州？

消夏四首

多栽竹樹敵炎氛，檻外荷香屋裏聞，果實象形成卍字，（秦中多卍字果）鳥名轉註得雙文，（謂黃鳥也）窗留月作當心鏡，簾放香爲出岫雲，夜就黃栢花下宿，楚衣三日有餘熏。

靴板清朝應接繁，楚猴真自強衣冠，欠人書牘將詩代，斬我林泉借畫看，東閣行吟梅子大，北窗眠夢水精寒，冷泉判事須臾了，修到坡仙福分難。

嫌羅不著况吳綾，紕縷蕉衫衫一層，豎拂自稱木上座，插花卽用水中丞，靜聽枚籟常疑雨，冷飲茶漿可代冰，按牘如山須卜夜，未能迴避是青燈。

結構閒房似釣臺，涼風兩面入窗紗，洋瓶厭飲荷蘭水，京信常封茉莉茶，老閱西書添腹笥，近憂東事損肝家，青門乾淨真吾士，擬傍東陵學種瓜。

日本早崎教習爲余照像時年五十有九矣四首

紫薇花下數華年，艸有忘憂鳥信天，六十平頭老宦慰，風標猶似十年前。

大羅天上詠霓裳，畫像流傳到下方，若向三神山上見，東南日出照扶桑。

功名撰述兩踳跬，贏得家家畫扇羅，一片玻璃如穎水，世間何止百東坡。

佳果新冰供玉台，六朝人物庾郎才，紅圍若當崔徽喚，團扇輕衫欲下來。

火器

奇器能無作俑嗟，兩軍驅命賤蓬麻，槍明競試無烟藥，砲利爭開落地花，可惜傷亡皆上士，極知慘礪出兵家，祇今鴨綠江邊壘，戰血紅深一尺沙。

■疊前消夏詩韻

綠槐風動掃塵氛，五月鳴蜩尚未聞。雲笈蠹穿倭子本，（舊藏大藏音義蟲蝕過半）雨牆蠹篆臘丁文。晨餐荷蓋品瑩露，午愛松顛活動雲。不解著棋和飲酒，自攜書帙伴爐熏。

省牒台移了不繁，科頭三沐罷彈冠。銖斑舊玉身常佩，藍面新書眼倦看。風定茶烟隨意綠，雨餘榴火照人寒。詩家百寶流蘇派，常恐人間索解難。

寄遠常時寫雁綾，江雲渭樹隔層層。聽枝擬和裴中令，畫雪誰師王右丞。夸示東游馳秘電，（午帥電誇廬山之游）封題西釀致香冰。（葆生寄洋酒十二瓶）答書剩飽飢蚊腹，辛苦書窗作夜燈。

年前重泛玉河船，紅藕香中障扇紗。蔬筍僧慳三笠飯，旗槍天靳六安茶。（除官皖浙俱未到）再塵徽省還多事，每見桐民似到家。久食露漿消內熱，老年無取鎮心瓜。

■東園晚坐

人間傳舍卽吾廬，懶學三閭更卜居。幾度斜陽王謝燕，一生極樂惠莊魚。移春欄檻花常滿，待月池塘樹要疎。台輔自饒經國計，端居不敢問何如。

■題畫

小桃生葉傍春江，猶有餘花映水窗。好似泥融沙暖候，鴛鴦燕子各成雙。

■三疊韻書感邀同人和

白日全迷紫塞氛，遼陽消息衆知聞。北兵尙有星羅勢，東帝先頒露布文。松杏山河傳警電，鳳凰城闕起愁雲。督師破壞和平局，彼得天爲宰相薰。（俄相某主阿督議遂肇遠東之禍）

郊壘連雲羽檄繁，奉天文武白衣冠。魏臣祇擬監廚用，漢將眞宜踞廟看。旅順口邊新鬼大，（謂馬考洛夫）合



肥身後舊盟寒，圍棋勝敗尋常事。局外人持斧柄難。

練兵屢詔寫黃綾，誰畫凌雲第一層。帶甲空多河朔馬，伏蒲不少殿中丞。諸公辛苦思填海，一老髮危說抱冰。文武學堂根本計，一篇綱要有傳燈。

萬國交通博望艤，外臣爭覲御屏紗。扶傷海內獨金幣，病渴軍中散藥茶。（謂紅十字會）老將能當秦白起，（謂科魯伯奎）娉婷亦有魯朱家。（美國某夫人親赴戰地救治兩國受傷士卒）烏兵不忘中朝處，六月重圍憶賜瓜。（庚子拳匪之亂慈聖兩詔榮文忠饋使館瓜果）

□ 同人和消夏詩篇篇佳也四疊韻答謝

言言冰雪洗敲氛，宮羽清適日夜聞。每撰詩歌難在夏，（昔人謂夏詩難工惟張文潛三篇爲世傳誦）况親吏事澀於文。倒流瓜蔓河中水，高挹蓮花頂上雲。晏坐石牀樹細茗，等閒銷得蕙風薰。

清唳堂裏厭囂繁，延接高流忘著冠。鄰下定教車子喝，唐宮宜付婉兒看。琴從碧玉泉邊聽，詩比明珠社裏寒。欲辨雙聽兼二牘，黃華綠樹一時難。

歌曲能消幾束綾，清風來往閣三層。長留天地惟巢父，不勝江河有駱丞。感物休鳴春鳥怨，外人難語夏蟲冰。西窗乞得秋前雨，好辦茶槍煮瘦燈。

敵廬門泊釣魚綫，絡緯鳴時促紡紗。鄉味未能忘炒豆，官壺猶得飲真茶。卽今庇廈無寒士，難得吟詩對會家。欲報君恩仗羣策，東臺擇士敢如瓜？

□ 望雲山館用雙聲體

阿翁兀傲晚聞烏，午未惟鷗偶晤吾。穩臥霧帷溫宛委，愛偃瓦盎玩文無。王維輞外剗變藕，韋韞菴阿問矮梧。萬物安安圍我屋，爲微萑葦望甌吳。（池中乏水故云）

西堂假山

錦石離離豹虎斑，松疏竹短補烟鬟；城中那得雲嵐氣，脫幘西堂看假山。

寄葆篋觀察

故郡洪都攬轡游，似聞碧玉說春愁；書生轆轤真同妾，夫婿英雄不願侯；桃葉兩歌傳白下，蕉心一世怨湖州；東方茶火三千騎，依舊蕭郎在上頭。

寄慰石甫

一挂彈冠桂樹秋，灘江煙浪入湘流；難爲黃祖腹中語，肯斫朱溫柳下頭；米賊乘虛橫象郡，楊枝含笑去龍州；請看琴志樓頭月，一顆明珠照十洲。

暑夜露坐

護門風動小單于，夜靜山屏敞碧虛；月地看花如霧裏，暑天食果勝秋初；幙僚共檢新聞紙，繹館頻添未見書；時有妙香解煩熱，盆池新綻白芙蕖。

午窗卽事限燈字韻

小年長日氣如蒸，北戶風來揭刺藤；官牘宜師宋文鑑，兒書添課楚詞燈；閒研自種無憂樹，禪榻人呼有髮僧；欲買機輪師造化，郇廚多喫唧令冰。（西饌冰唧令極甘美，暑中以機器爲之）

再用燈字韻

赤日行空潦霧蒸，雪山誰與畫溪藤；脩然荷芟亭前水，癡絕芙蓉帳裏燈；肌骨清閒思玉女，文章修潔傳高僧；去年道署皇城裏，日進紗幮十担冰。

三用燈字韻

息假花龕避鬱蒸，一杯新酒酌黃藤。吏支短假三旬料，（課吏館放暑假月支祿料如故）佛笑長明一盞燈。畫省再爲紅藥主，詩朋獨步白蓮僧。損功費日知何益，辛苦爲文似鑠冰。

解雲鳳池兩觀察先後惠川浙佳茗賦謝

不寐方知此味真，綠槍花碗伴蕭晨。水如許淡堪求友，茶不勝嬌也醉人。蜀使書回金雁雨，越娥價重碧螺春。峨嵋古雪西泠水，洗盡行都萬斛塵。

題女障子

不分瑤臺月下逢，微波咫尺見驚鴻。思量馬上同樓上，安放詩中又畫中。八字眉尖誰奪翠，百花心裏可憐紅。銀河水與蓬山路，不隔靈犀一點通。

立秋作

西陸蟬吟冷抱枝，一句庚伏好禁持。梧桐昨雨涼先覺，枕簟今年暑不知。（一夏不熱）瘵疾嬰瓶丹藥盡，有情鏡鑷白頭遲。城南沙草平如掌，又近秋冬射獵時。

立秋夜大風

夜聽秋風第一聲，掩書危坐倚長檠。霜臺啞啞羣鳥沸，沙磧蕭蕭萬馬行。天黑似聞東海立，牡飛難定北門驚。軒皇亦有吹塵夢，誰遣蚩尤息五兵。

新涼

景物吹殘節候佳，未秋前已減茶瓜。清風扇枕先搖竹，小雨催詩併及花。瘡痂盡隨殘暑退，眠餐新爲晚涼加。不緣早暮聞衙鼓，何異柴桑處士家。

賀和甫同年抱孫

兒與蓮花同日生，太邱懷抱見公卿。子魚將子成三印，雛鳳生雛豈半英？投鐺蕭公從白髮，試啼溫嶠識聲清。楊家修竹青如玉，纔試孫枝第一莖。

秋熱用新涼韻

新秋既雨覺晴佳，解暑猶煩七月瓜。焦綠足供詩社紙，蓮紅長獻佛瓶花。掃苔實望來三益，止酒虛教浸五加。若與竹垞互爭長，金風亭子屬誰家？

三疊前韻索同人和

詩境通禪語語佳，亦如灑雪喫冬瓜。絳潭叢帖兼眞草，白定圓融起暗花。著論養生茶最損，率眞待客豆無加。吟朋各抱謙謙意，更向誰邊問作家（用大作家在那邊語）

四疊韻遣閒

齋閣通涼舉體佳，吾廬非草又非瓜。因防午渴儲山果，欲解朝醒漱井花。眉黛誰將秋柳畫，黃袍天與蜀葵加。俸金半爲收藏罄，書畫時時出舊家。

卽事五疊韻

扇葉臨風致自佳，垂垂香墜水晶瓜。簾紋蹙浪清無汗，密密斑筠筠玳瑁花。鴨脚黃深分兩向，雞冠紅淺已三加。遮門荷葉平階水，長憶東溪阿那家。

六疊韻憶東溪草堂

東溪風景到秋佳，籬有牽牛架有瓜。米油自蒸油碧糯，魚籃兼賣水紅花。身堪黃燭燈邊老，足任青奴腹上加。惆悵官身歸未得，白鷗傳望語還家。

前韻花字太寬加字乏味七疊韻簡課吏諸君子

三句道暑意清佳，（館中放暑假一月）又薦新秋乞巧瓜，詩入澀腸聲近木，腦留押脚字成花，營田潦後租求減，吏道循時秩有加，經濟詞章須切用，求名莫近腐儒家。

### 閒居八疊韻

壘石疏泉境漸佳，東亭西庫儼分瓜，（香山有琴亭酒庫）松脂化液根成珀，榴腹含珠背帶花，食客雖多無可減，藏書既富又何加，時人若訪乘蓮客，此是清都太乙家。

### 觀物一首九疊韻

便是卿言亦復佳，梁亭西瓜卽楚亭瓜，要知吾意何分別，唐苑花仍漢苑花，吏部雙金從客擢，尙書半臂爲誰加，老來閱世皆平等，莫笑儒家遁佛家。

### 秋熱詩爲韻所限不盡著題也別賦一篇

真有秋風再熱時，勞勞團扇復何辭，薦瓜爲解雙星渴，流火堪徵七月詩，玉塞霜難新雁帶，瑤臺雪豈晚蟬知，盧家雙燕憎殘暑，怪底金堂送客遲。

### 古人詩多渾寫大意故東坡云作詩必此詩定知非詩人自同光間館閣諸公作詩帖始用箝字之法而

詩格乃益難益密推而致於詠物莫不以細切爲工昨以秋熱命題看似平平然須從秋字寫出熱字方與夏詩有別再賦帖體一篇案同社諸君和博奕猶賢牝金虛擲殊自笑也七月初三日夜

今年宋玉減秋悲，荷淨松涼屢入詩，剛與春寒爲反對，轉疑夏令有推移，已乾初日芙蓉淚，更展薰風茉莉期，瘦蝶尙隨班女扇，牽牛還睨貴妃池，花稀露白蓮房煖，林待霜紅橘市遲，微雨天章仍和柳，傾陽人意不如葵，咨嗟地氣南而北，驚怪炎官盛不衰，殘暑祇如絲一絢，青蟲能絡幾多時。

### 碧岑病中兩和新涼之作十疊前韻奉寄

詩如草茗未能佳，那分瓊琚屢報瓜。靜座有香生釜粥，清朝飛雨濕簷花。秋涼漸喜衣篝暖，病減休催藥力加。短假不關尊菜事，好教荅朮健脾家。

十一疊韻詠秋涼

今年秋夢問誰佳，肺欲生塵祭以瓜。未有涼風吹桂樹，豈其生日問荷花。調冰入酪餐宜少，（秋後忘食冰）待雨催詩點不加。何限葵心盡西向，夕陽黃煞四娘家。

雨後驟涼十二疊韻

拂曉晴鶯語語佳，昨宵銀漢渡匏瓜。千山過雨千般翠，百草逢秋百種花。肺熱香教黃熟滅，肌涼衣倩紫綵加。茂陵不少秋風客，爭索長裘向白家。

十三疊韻和戟傳新秋感懷

關內蒼然秋色佳，素瓷新薦識棠瓜。簫爲秦女流連物，蘭是湘人佩帶花。君有鳳毛當世美，余慚馬齒逐年加。龍筋鳳髓成何事，雅近虞初小說家。

早秋寫懷七疊消夏韻

梧竹交枝掃夜氛，蟲娘院落落屏聲。聞回文集裏，悽蘭錦，乞巧樓中誦柳文。徒倚玉階生白露，徘徊河漢淡微雲。分拋鴛被無多日，重遣名香百和薰。

新秋庭樹草花繁，妝束戎葵學女冠。撲蝶扇留殘暑在，牽牛花趁早涼看。日中食粥猶顏汗，月下停琴覺指寒。不願人間爲宰相，秋霜欲上鬢絲難。

中單早晚怯吳綾，心字羅衣著兩層。初月巧偷京兆嫵，衆星爭放絳河燈。新炊香稻憐匙滑，欲嚼甘瓜怕齒冰。金橘石榴齊著子，好將秋賞擬家丞。

秋齋結構肖雙鸞，漸怯涼颼入隔紗。浮蟻舊醅濃似珀，來禽新葉美於茶。（吾鄉以林擒葉代茶）兼并甫白成時國表裏程朱問笛家，昨夜畫屏清不寐，碧雲天際望匏瓜。

□前詩鐙丞兩韻倒置別賦一首

秋雲隴首白於綾，渭樹青蒼隔幾層。輞水月明招隱士，褒城酒惡有逋丞。連昌夜雨無多柳，玉井流泉徹骨冰。終是華清溫暖地，最思晚浴照華燈。

□示及門諸子

名場亦有信天翁，與世推移道不窮。未敢薄今仍愛古，不遑救過肯居功。新奇論說中年悔，貴壽文章後路豐。打點儒林根柢事，狂華客慧一時空。

□卜居

離騷經裏卜居難，商略儒宮一畝寬。萊婦尙能借我隱，詞人不合老於官。衣糧粗足皆君賜，松柏相將保歲寒。兒女嬌癡婚嫁晚，名山移入畫圖看。

□秋夜寄懷花間

憶乘驄馬玉京游，送別江亭歲一周。仙掌露華今夜白，御河柳色隔年秋。此些香物荷囊貯，疊疊詩箋鏡屨收。花葉親書誰寄與，一行新雁過妝樓。

□秋鶯

秋燕剛如客欲行，何來百轉建章鶯。深愁露下濡金縷，乍似月中聞玉笙。灞上柳條疎欲斷，遼西瓜戍夢猶驚。荷花桂子香如海，更試遷喬第一聲。

御園曾許紫桃含，烏鵲橋邊路亦諳。坐柳我思當日緒，按歌汝是舊人讖。橫河佳語逢初七，幽谷前游話再三。待

得霜林紅於酒，爲卿雙挈洞庭柑。

名隸風人睨皖篇，春花秋月致纏綿。養雛已儷秦臺鳳，求友羞偕望帝鵲。晚爲騷壇頌鼓吹，久棲喬木老風煙。羽毛自惜金衣美，難得金薰露更鮮。

城東煙草軟於羅，留得珠喉一串歌。簧澀重翻楊柳曲，金寒仍擲海棠梭。雙文別後教珍重，子野尊前喚奈何。老去詩人憐汝在，中庭秋思爲誰多。

七月十八日雨中招同懋臣移香友松海雲戟傳敬之和甫雲生諸君集兩廳齋卽席有作  
冠冕三秦此數公，花前莫放綠尊空。棋枰冷淡秋窗雨，巾角頽唐老輩風。灑掃閒軒鷗虎外，屏除世事蛤蜊中。畫屏紅燭無多淚，消息何勞問海東。

觀棋戲用前韻

老將誰當黑稍公，有人劍術賽空空。蜀軍死戰出降日，金使微言有勁風。坐閱袁曹官渡口，最思頗牧禁林中。欲教軍馬馳驅便，安得青齊畝盡東。

勝敗何勞溷乃公，老坡欣喜善觀空。河山東帝侵西帝，歌曲南風競北風。兵柄釋於杯酒後，豹斑全在管窺中。如今惟覺芝山樂，縱有江船不欲東。

博局分明肖井公，箕張翼展掃成空。衰朝氣象唐甘露，開國規模漢大風。鍊百早爲天補漏，磨戈重見日當中。朔風天遣長江恨，莫學令人驚遠東。

誰將上計走檀公，餘子蠱壘目已空。折屐似聞灑水捷，揚裘殊有太原風。掃虛潛蹠龍庭後，得子深探虎穴中。何限英雄浪淘盡，爲持鐵板唱江東。

同人見和秋鶯詩再賦四首



東風已帶百花行，七月猶聞漢苑鶯。秋色漸歸金綫柳，曉寒重理玉靴筩。桂枝濕露從卿借，棠蔭非春也自鶯。贏得早秋數相叫，前溪白鷺是同聲。

淒辛橘葉一分含，露媚烟慳味已諳。隴上收完鸚鵡粒，盧家騰出燕兒龕。（龕與戡通）舊巢芳樹曲江曲，好景明年三月三。一自櫻桃紅上口，坐看青李到黃柑。

昨宵新賦感秋篇，起看金衣氣力絳。覲面生疏來隴雁，非時鳴喚訝橋鶻。池荷粉退風吹水，陌柳金凋雨似烟。別有鷗鷺新世界，霜天高舉羽毛鮮。

一生不愛北山羅，哺子成羣自教歌。有志搏成寒谷黍，（鶯一名搏黍）無心乞得巧樓梭。渭城一唱行歸矣，喬木重遷奈老何？霜露雖寒吾舌在，建章門戶好音多。

### ■ 秋夜

香鴨無煙夜卷衣，流蘇宛轉傍人垂。燈前靜聽風吹雨，自覺羅衾自掩扉。

### ■ 酬雲生

君來自清華，疲馬犯寒雨。睠言過東省，坐我胡床語。始商糴新麥，繼請繕倉庾。稍稍談風月，瑣瑣話雀鼠。爲約詰朝見，官廚具雞黍。人言橘中樂，我忝花下主。今歲秋霖多，高齋燕香母。座客八九佳，詩家一二數。隔竹送棋響，解碁出畫譜。得閒謀一醉，聊洗襟上土。嘉魚東路來，冷餅南窗煮。武火燂花酥，嫩湯點茶乳。長筵羅八珍，不效郭功父。同乘皆弟兄，和歌相爾汝。酒闌起送客，三打寒澀鼓。君行意有餘，餘意以詩補。三日兩寄箋，知章勁於弩。燒燭和君詩，南簷月華吐。

### ■ 或見余照象以爲四十許人戲賦

才可容顏四十餘，吳霜曾未染頭鬚。昔聞耳順稱娘子，持較樊南恐不如。

不餌金銅竹葉丹，紫薇省裏望如仙。雁來時候紅於錦，信有花叢老少年。

賦得同心蘭酬葆衡見寄

梔子同心未鬪翠，西陵松柏此情真。馬姬畫以雙鉤勝，燕姑香從複帳聞。屈宋合爲天下美，娥英俱是意中人。兩條羅帶灑湘水，揉作藍雲剪不分。

花花相對葉相當，蕙草中庭詎可忘。秋水鑑形并四美，春山無意賞孤芳。金絲幾（平聲）斷舍人柳，綺夢雙溫妃子棠。欲把花身作舟楫，兩舷相倚學鴛鴦。

白華詩裏報瑤瓊，鴉管參差合兩竿。借隱君山非獨秀，小名王母賜雙成。英翹姊妹羞先嫁，王謝家兒有孿生。絳繹名香供御服，人間蕭艾一時輕。

湘波如鏡照雙鸞，掩映芝英與竹斑。君子有言書縞帶，美人無計解連環。芳心蘸露舒啼眼，香氣蒸雲結妙鬢。省識離騷憂國意，嬋娟多貢玉堂間。

再吟同心蘭示葆衡

一簾花氣卷湘波，不獨香名說四和。楚澤庚寅同覽揆，山陰癸丑絃臨河。解來泉佩真名偶，譜入騷經獨汝多。花肖斂鉤雕比玉，葉如裙帶剪雙羅。

春風燕睇鬱金堂，振盪余情說信芳。松是三公偕入夢，竹兼兩個始稱王。有情處處生芳草，服媚人人愛國香。紉佩試垂連理帶，爲膏還照合歡床。

猗猗風露楚人家，笙磬同音詠白華。易傳分明金作妃，謝庭彼此玉無瑕。橘堪合袖稱皇樹，菊不同時亦女花。一寸香心千尺水，餘波羞澣苧蘿紗。

一雙翡翠戲陵苔，豔體連珠演六朝。自覺苦甘兼菊蕙，莫持丹素較梨桃。楚庭檮杌褒忠愛，澧浦鴛鴦養羽毛。留

得後身蘇薰錦，月圓花好付秦滔。

### 三詠同心蘭

柔桑連理竹連筠，別有幽芳楚澤濱。王者對含龍麝氣，美人雙慰翠蛾顰。蒼松並列姬姜隊，蘅芷無非肺腑親。邈近明堂圖職貢，有誰能寫鰥鷄真？

因果羞從粉絮論，蘭池宮裏此花尊。騷人級就成雙佩，香在生當不二門。萑葵傾陽無向背，芭蕉捲雨互溫存。金荃纔識靈修意，若遇桃花定不言。

湘北閩南異暖寒，釵花劍葉總平安。抱冰意可千秋白，捧日天憐一點丹。並蒂有情呼姊妹，握椒傾意付郎官。娟靜女生幽谷莫，作唐宮秦虢看。

並照清波俊不禁，黃鸞綺石養春陰。腸回柳絮枝頭少，情比桃花水色深。畫汝雙身螺子黛，感人一操鳳皇琴。東風種出雙紅豆，始識他心卽我心。

### 四詠同心蘭

楚國非無無價寶，花叢亦有有心人。瀟湘並照三生影，天地重回數點春。顛倒每嗟蓮有意，甘甜都是杏生仁。詩人服御需香澤，二女徘徊在漢濱。

光風汎采輕崇阿，一種名香豔綺羅。三日茵馮殊未歇，雙烟芸荔總相和。臭貽叔寶曾何有，經念觀音不在多。其此白華芳潔意，陔南荷艸又成科。

丹附縹葉競芳時，澤畔行吟意可知。沅澧皆爲股肱郡，琴箏合奏性情詩。荃蓀敢不尊香祖，桃李焉能背本師。起自三閩終賈傅，更誰能返楚人詞？

合并曉晦扇和風，玉樹前頭喜氣融。花有連枝方北竇，香無一瓣不南豐。雙丁並立瑤階上，兩已交暉繡帳中。借

問丹心誰得似？黃人夾日御樓東。

次碧岑中秋對月韻

青冥風露不知寒，猶是秦時玉一團；相伴姮娥關內住，今宵一十七回春。（余甲申九月入關迄今二十一年惟五中秋不在秦耳庚子閏八月故曰十七回）

甲辰中秋夜內子偕諸女弟及兒女孫曾輩平台望月是夕月明如晝

月自秦時圓到今，碧天如水鏡當心，姊從西母求丹藥，我愛南山鍍紫金；綠鬢惹烟花氣重，羅衣濕露酒痕深，一門四世長驩樂，驗取檀欒桂樹陰。

八月既望微雨尋霽入夜月出憶去年今夕在京寓與竹延夫婦繡綺姊妹同看月食至待復圓始寢今年一年矣恨然賦此寄竹延汴梁繡漪京師

秋宵燈火暖於春，秋空月色淡於銀，昨夜月勝今夜月，今年人憶去年人。去年人說皇城餅，青天半蝕山河影，竇氏夫妻繹錦文，鮑家兄妹溫香茗。庭前琪樹映瑤花，屋裏瓊枝隱絳紗，對擊鼓鐘援玉兔，雙持弧矢射金蟆。廣寒半掩黃金船，太清剩被浮雲滓，焚香禮拜玉觀音，刻燭歡聯詩弟子。履鳥徘徊夜嚮晨，圓儀重寫素娥真，披紗全露啼妝面，對鏡還思痛定身。謝家兒女快人意，如月如花侍清閨，只覺當頭珠璧暉，那知舉目山河異。今年月比去年佳，月地行吟憶謝家，叢桂天香還繞棟，羣山紫磨正當衙。玉塔徒倚禁風露，三分明月分三處，金水河邊渺渺秋，鳳皇城裏遲遲曙。天上銀河裳可窈，地中碧石海能填，但願人如無限月，與君千里共嬋娟。

夜坐

隔窗明月可中庭，盆桂無花意向馨，寒燠不時秋易嗽，公私多故夜常醒；蟲鳴暗壁拋書坐，雁過高齋倚燭聽，何物能回搖落感，笛中吹得柳條青。（是夕聞笛）

賦得可憐九月初三夜得憐字

月到初三絕可憐！玉弓斜挂影娟娟，依然露似珍珠夜，又是雲橫玳瑁天。遠信威遲霜後雁，瘦人徙倚菊花前。重陽近也無風雨，檢點萸囊憶去年。

已涼

已涼天氣畫簾陰，檢得秋詞背地吟。夾帳裝緜香絮軟，紗窗換紙茜紅深。樹留喜鵲朝朝語，雨滴燈花夜夜心。至竟薰爐恩不斷，爲儂重暖玉鵝衾。

九日登臺

登臺潦霧隱南山，東望神州一黯然。四戰衝非秦國地，百年秋是楚人天。霜清灞岸收魚罟，木落商州到蟹船。賴有杯螯相料理，不辭茗芋菊花前。

九日陰暄入夜雨甚呈同席諸公

秋陰壓屋沸棲鴉，銀燭無烟帽影斜。昨見南山松上雪，今看東府雨中花。百年多故身猶健，四海名知鬢未華。手把茱萸思昔會，師門應是念侯芭。（憶去年天寧寺之游）

卽席再呈懋翁

鎖廳聯句虎兒年，重對糕盤試彩翰。餐菊一如前日事，種柑還待十年看。樓台上下知筋力，燈火親疏驗暖寒。九日藍田尋故事，倩誰端整少陵冠？

送和甫之咸陽任

咸京五十里猶賒，匹馬西行對晚霞。鬼胆破來驚李果，神鋒輟去贈張華。政成漢殿捐金賜，詩就旗亭換口誇。四十賢人同適館，齋寒修竹憶楊家。

送載傳監稅商州

一出衡山游二京，鄴侯書笈又東行。  
商顏依舊芝房紫，蕭寺回頭芋火青。  
美政鸞庭芳樹在，新恩牛埭稅錢輕。  
繩床倚壁張安道，說似欒城不忍聽。

送敬之權釐白河

早開東閣待朱雲，臂指相依那忍分。  
若到台司全勝我，恨無官職可酬君。  
小蘇鑿典西江稅，髯鄒終參北府軍。  
每見芙蓉思庾杲，秋池獨立倚斜曛。

子搢入幕喜贈

成璿一官岑旺替，夷吾兩目隰朋。  
爲道南大宅還推汝，江左清歌恰顧誰。  
倚馬成文行遠近，同車適野計安危。  
萬龍龐鳳生何處，南郡多才更不疑。

喜晴

睡眸猶怯小窗明，已斷莓階積雨聲。  
鶯鶯好音催早起，雛花喜氣入秋晴。  
一時瀟水分消長，對面南山半熟生。  
五色日邊誰作賦，倚天仙掌露華清。

寄亦元

未必中華盡醉眠，鳴皋一鶴聞於天。  
可能無意求晨夜，獨恨相逢是晚年。  
胆氣堅剛非酒力，史才明籛著詩篇。  
千秋萬世無窮事，鼇軸何人共轉旋。

冬夜

良夜惟於燈火親，南牙佳客少過存。  
水邊邀月成三影，霜後看花尙百盆。  
齒軟橘梨怯酸冷，肺寒薑附助辛溫。  
興來欲和淵明句，矮紙欹斜凍墨痕。

十月十日引通濟渠水入行宮池五首

豐京從古水朝東，十月流水暖易融。剛是慈寧天慶節，玉波新滿鳳池中。  
花水溶溶入苑牆，倚欄雲影蕩天光。九龍呵護蓮房玉，不落華清第二湯。  
二聖徘徊行在日，臣冠解豸侍宮籬。如今池苑皆依舊，惟有恩波歲歲添。  
荷鋤揮汗已經年，纔見芳池一勺泉。人世定然速成事，學堂休倚後生賢。  
活水原頭要識真，漢香波翠躍修鱗。西京亦有滄浪叟，笑指金魚是故人。

閩新聞紙

福陵松柏龍形古，斫作樵蘇孰見憐？悔不早教蟲蝕盡，卻供萬竈起炊烟。  
蜿蜒濛濛逼紅牆，盡取犧牲佐裹糧。徒有郎官守原廟，幾曾落日見牛羊。

涑之求歸甚切賦得詩留之

後先捧檄下蓬萊，莽莽風塵眼轉來。一自漢南感衰柳，十年江外負寒梅。  
宦情蕭索思投版，吾意沈吟獨愛才。見說海堧風浪惡，柴桑未可賦歸來。

涑之爲余強留喜而有作

難得獮牙並世生，五湖暫莫與鷗盟。西征叱馭非無意，東閣留人似不情。  
出處大都思已熟，利名久與世無爭。君看典午圍棋手，強爲蒼生住冶城。

題家書後示庶並寄照象

挈榼龍門羨汝登，掌箋桓府遜吾能。一張畫象秋風鬢，數紙家書雨後燈。  
曠職汝勝酸棗尉，（蘇遺尉酸棗）勞生吾亦苦瓜僧。鯉魚爲寄平安字，撞破黃河十月冰。

聞葆衡納姬詩以調之

雲屏新得謝芳姿，早晚僧彌好護持。  
臉際芙蓉勝庾幙，懷中茱萸受毛詩。  
讀書莫復過了夜，出府安能待西時？  
月惜花成反對，近聞眠早起常遲。

再調葆衡

玉梅花發小窗陰，婉孌楊枝伴醉吟。  
紅燭影中添半臂，幽蘭詩裏證同心。  
文書收掌煎茶手，釵釧消磨潤筆金。  
料得有情憐大婦，藥烟如水夜寒深。

藍州寄示湖上諸作不禁神往

何意輕拋十錦城，皇恩許住只虛名。  
自憐畫省鳴騶出，不及蘇隄軟轎行。  
僧壁數行詩卽畫，湖光百變雨兼晴。  
梅花自是孤山種，可得郵傳到漢京？

和藍老游孤山用湯貞愷韻

步履乘春出近郊，逋仙曾此結衡茅。  
公鑿燧烹黃蘗，宋嫂羹魚去赤梢。  
葛嶺東西烏榜聚，蘇隄裏外綠陰交。  
全湖莫化昌黎酒，買得青春恰又拋。  
(韓詩十千買取拋青春)

憶西湖

廿年不打理安鐘，倘有江船吾欲東。  
歷劫未銷金粉氣，四時不斷綺羅風。  
月珠松翠能留客，桂子荷香莫啓戎。  
萬古妍華遺此地，吳興慚愧水精宮。

前詩以金粉綺羅寫西湖唐突西子矣別賦十二章寄藍老

西子剛宜淺淡妝，山眉水眼費端詳。  
但看周昉屏風畫，豈識名山有道場。  
妙手伊誰爲寫生，香山以後又端明。  
明明湖恰與明妃似，意態由來畫不成。



水有畫船難到處，山當綉幃未來時。白沙翠竹人烟少，獨自拖藤意可知。曙色僧窗猶未分，漁僮踏浪綠苔深。湧天水氣欲爲雨，一半樓臺隱白雲。（三十年前諸蓮菊所說如此）

竹香如霧不論竿，三五禪人涉翠寒。虎跑清泉龍井葉，斬新槐火烹來難。（余性嗜井茶自越入關香味頗減）

朝游三竺暮還城，風景何人識晚晴。無數綵船歸去後，婆官吹笛兩三聲。

山寺歸來月挂松，水烟四合綠濛濛。西湖別有閒亭榭，不在屏山十景中。

不識漁舟一葉輕，紫髯燒燭坐調笙。孤蒲深處籊籊雨，朝貴耳邊無此聲。

不應城外卽孤山，雪後傾都犯曉寒。此事林逋殊不料，梅花種與俗人看。

南屏僧飯小淹留，蔬筴酸寒夏亦秋。二十年前湖上事，每隨夜雨上心頭。（癸未四月同鶴士子珍湖樓聽雨如

昨日事）

投筴擬謁辨才師，鉢帽隨緣住淨慈。掃地打鐘俱不會，飽餐山潦坐填詞。

聚似疏星散似烟，湖山回首意茫然。欲窮水曲松深趣，且可雲棲住十年。

### 生日示客

蓮子知非又十年，倚樓看鏡未華顛。客談星命憐金水，（余命宮金水獨多）身在儒林愧老先。歲歲春風生玉

座，家家冬日暖黃縣，行香已了無公事，自傍南窗晒水仙。

### 宴坐

簷風隔日任相侵，宴坐猶爲抱膝吟。紅樹鮮明晚秋色，黃花淡靜老年心。無情書牘拚投甕，有數人才合範金裘。褐無人同暖熱，莫驚霜露氣蕭森。

### 答友松見祝用來韻

三接龍光三入秦，匏瓜長繫老來身。學因年進多更事，奢與廉兼亦未貧。早退故應稱上計，易衰休更笑南人。詩筒拆向梅花下，小鵲枝南已報春。

戲題東壘假山用雙聲體

趣鑿巉岑蹲瘦獅，字劖三四翠參差。粗材慙廁曹參座，造次曾催楚些詞。澤草錯鋤撻翠菜，櫻叢層簇覩蒼髭。裁辭皺瘦思生澀，崔蔡從茲贊色絲。

十一月初四日與碧岑過課吏館清言竟日因贈

同臨仙館挈茶瓶，廊廡深嚴網戶扃。時世新裝無古錦，歲寒老木有冬青。巡行漢沔纔今日，（君新擢陝安道）貢舉咸同幾曙星。（君咸豐拔貢余同治舉人丙子歲會于京邸）二十九年交誼在，一時衣繡集秦庭。

課吏館晚歸卽事

蒼然暝色度高城，寂歷街西遠市聲。池暖不冰羣鴨喜，樹寒無葉萬鴉爭。馬駢泥路須防蹶，人瘦肩輿未覺輕。三載秦台繡衣使，依然村塾老諸生。

臘月十七日移居藩署

移家重入紫薇廳，簷雪初消鵲語靈。綿絡池台花外起，（夏許兩方伯茸治東偏台沼備極幽勝）依稀絲竹樹頭聽。耳傾東府年時雨，（憶菽軒三兄）眼見南山分外青。我欲請鄰并祀灶，老坡生日薦椒馨。

癸卯除夕

木筆花開第一枝，春風又到歲朝時。霜橋垂柳關何事，二十年中少別離。滿意西湖載雪游，吳山不換嶽蓮秋。都將百二關何勝，抵兌錢王十四洲。三接天人玉冕光，歸來行殿肅鴉行。（是夕在行宮朝賀）朝衣不費金爐火，帶得皇城土亦香。

芝罘鴨綠互烽烟，壁上觀人可自憐；昨讀兩宮中立詔，九州猶是太平年。  
依倚韓門問起居，錦囊酬唱百篇餘；呼燈細檢春明稿，奇絕東坡大字書。（少保師尺牘及稿草度細書者坡詩所謂醉眼有花書字大也）

歲暮宗臣別帝鄉，過家上塚奠椒漿；老臣自結松楸暮，長日諸陵黯夕陽。（以上二首寄少保師）

楚鄉烟水未成歸，卻坐冰廳對紫微；更比遽賢聞道晚，明年五十九年非。  
午夜朝元列炬紅，八驕前引謁行宮；清吟未了常年例，更續新詩煖轡中。

雲生詩云：酒爲封泥懶不開，佳話也；惜出句遜仿其意爲半律寄之。

建茶再淪瀟根水，越酒全封印面泥；茶密酒疏王介甫，眼前真景卽詩題。

寄懷午橋撫部長沙

上春飛渡洞庭槎，秦楚相望驛路賒；今古三湘足蘭茝，西南兩嶽各蓮花；更張同治湘軍制，提倡中華哲學家，千載賈生纓吐氣，如今王佐領長沙。

雨中連得電音日本逐退俄軍奉天無恙感賦

花朝前後雨紛紛，消息遼陽說退軍；好月一句纔一見，捷音三日已三聞；倭刀夜洗沙場血，陵樹春荒戰地雲；誰換銀河天上落，流膏潑火到秦分。

園居述懷

小池菟柳弄春妍，接引南山到榻前；夜雨籬根穿筍角，午陰花杪過茶烟；不甘閣東方求外，雅好樓居爲學仙；熟讀城南晚晴賦，作家吾愛杜樊川。（樊川晚晴賦遠出阿房宮之上而知之者尠特爲拈出）

夜興

眼霧心冰與自佳，遲遲更漏靜南衙，燈前書牘憎紅紙，雪後詩脾愛綠茶；夜霽池台初見月，春寒桃李未成花，  
軒一代填詞手，不信登樓脚力差。

雲生和聞雨再韻賦

廿四番風過幾回，關雲猶落豆稽灰，漸看萱艸凌春發，真有桃花帶雪開；池水似能承釣竹，井桐猶未中琴材，  
塵一騎無公事，爲送華清錦句來。

喜晴疊前韻

誰遣羲和叱馭回，晶屏光奪自然灰，煎熬水柔美暖，披豁雲山倦眼開；二麥怒生豐餅料，百花爲末助香材，  
日邊紅杏莊嚴甚，肯向春風作鬧來？

雲生又和差字韻卽事再疊

淡雲微雨覺春佳，蕙草庭前散吏衙，期會不愆惟海燕，風情略少是山茶；手堪泔泔非關藥，眼罩玻璃轉不花，  
食料南人喜清雋，毡根終較水梭差。

三疊開字韻寄雲生時方縣試

舊韻詩篇往復回，陰何各自劃爐灰，檄催藥稅心常惻，（余爲令時烟畝稅不過二三成比因款緡加征殊遠本  
志）驛寄詩函口任開，古錦爲幘知不可，畫縑作襪故多材，試廊日永茶香熟，更學歐梅唱和來。

十一月初八日奉電鈔真除陝藩恭紀

除書旦下紫薇天，三輔遺黎宿有緣，久已法冠辭柱後，（去夏卸臬篆）早聞天語許蕃宣；槐廳真授仍三輔，  
花縣分拋僅七年，國計艱難遷不次，敢希清福臥林泉？

小謫風塵出禁林，手栽桃李久成陰，香常在晚臣年老，貴不嫌遲聖意深，熟路輕車河繞華，新收舊管粟兼金，（

糧道裁缺，樞台歸併藩署。中台每事資謀斷，笏聲難爲離別音。（時吉帥移節西江）

□寄菊人

新亭老淚洒臨分，向見夷吾信不羣。妙墨自書東海若，英雄吾愛左將軍。於今隨陸真能武，並世陳劉盡有文。料得輕裘歸武帳，停杯長憶華山雲。

□遼東

新聞紙上說遼東，砲火經年角兩雄。浴血河山掃松杏，入關藥物斷葑茸。島中雲氣全軍墨，（謂旅順口）局外旌竿十字紅。萬古瀋陽根本地，可堪原廟夕陽中？

□冬窗和雲生韻

北來甚勁觸簾風，展卷依然秋水暉。位置梅繁人意愜，平章茗酪所言公。歲寒不改憐松翠，鄉信威遲盼橘紅。打點甌爐烹雪水，老懷消遣寂寥中。

□冬夜用前韻

銀燭交輝燄不風，玻璃罩眼抵重瞳。游揚修竹爲君子，抬舉梅花作相公。香篆每縈詩髻綠，墨批常掩邱文紅。夜長抽得官身去，徙倚雲階月地中。

□雪後早起喜晴

水樣衾裯臥似弓，起來喜見日高春。橫琴左右皆修竹，開戶東南對雪峯。藏窩諸花同一豔，消寒昨酒到今濃。迎春自是垂楊事，妝點年年灞岸容。

□乙巳元日立春書懷一首

入關兩見歲朝春，（丙戌歲亦然）二十年來一舊人。貪戀西京乾淨土，崎嶇行在受恩身。省中芳樹鳴仙樂，雪

後梅花畫喜神，薄暮土牛送寒罷，鵝黃重放柳條新。

示客

盆花得氣翠鸞庭，樹無驚鳥夢常安，春至面田饒喜色，夜來肩井慎風寒，餽賓不過三行酒，益壽常於獨睡丸，老去涪翁仍綺語，秀師宜作寓言看。

初六夜對月示雲生

池面冰紋解，柳梢春意生，新年新月色，淡酒淡交情，花送過牆影，詩含賀歲聲，纖阿解留客，暫莫返華清。

寄仲山大令司權鳳翔

岐陽監稅養秋翰，新自瓜門帶雪還，草怕脊鴿原上綠，（君有伯氏之戚）鬢從雀鼠訟時斑，碧湖新柳參差長，銀海狂花積漸刪，（病目已愈）倘憶江南邱壑美，瀧沂之際有吳山。

夜坐聞雨

夜傍紅爐暖漸回，自拈金筯撥霜灰，從他簷雨三更急，遲我園花十日開，下杜筍魚充酒佐，北江杏燕足詩材，（洪穉存自言於花愛杏于鳥愛燕子）春寒雖臘能多少，後面紅雲冉冉來。

前押九字韻凡一再疊迄未成篇久亦忘之今日花朝遇雪因用前韻

特許花神跨素鸞，百花生日水雲安，玉從燕子來時戲，春在棠妃睡後寒，舉盞白波生酒令，裹巾黃氣入泥丸，飛瓊似待瑤池伴，留向鴛鴦瓦上看。

雪霽而春陰特甚再用前韻

韓家池沼鏡窺鸞，猶倩金爐膝上安，花到春分剛種，（一作撒字）子，酒過社日尚消寒，幾曾撲蝶忙斂劍，未便聞鶯轉藥丸，見說韶華如蔗尾，媽紅留待晚晴看。

□感興三疊前韻

握符左轄自言繁，  
庀事當如寘器安。  
櫻蔗調和消內熱，  
茶芽分別獎孤寒。  
祠官夜夜燭牲玉，  
獄牘時時辨挺丸。  
時春祭方殷秋讞又至，  
縱使蘇黃刀筆在，  
後生輕薄幾人看。

□四疊韻示吏

野有嘉禾樹有鸞，  
極知三輔慶磐安。  
使君如月家家望，  
屬吏行冰箇箇寒。  
得士豈宜譏畫餅，  
聽言先要止流丸。  
眼光措大從來短，  
洗濯瞳人遠處看。

□七疊韻自述

諸葛言繁事亦繁，  
戟門香寢未遑安。  
衣裁細尺常嫌瘦，  
屏掩玻璃不畏寒。  
銀管筆揮雙蟹爪，  
金壺墨費幾螺丸。  
年判牘張春草，  
一任關中父老看。

□翰臣又得句云：茶因調水遲難待，  
乃真工矣。再賦半律以志欣賞。  
茶因調水遲難待，  
酒爲封泥懶不開。  
似得玉腰金翼否，  
樊南賓客信多才。

□春望

下九登台眺晚晴，  
紙鳶風軟近清明。  
花開繡陌初調馬，  
柳簇紅樓尙待鶯。  
禁火遠徵傳燭事，  
聞簫遙識賣鴛聲。  
憑高不道層梯滑，  
新試春衣覺體輕。

□與翰臣論詩用差字韻

詩到天然始自佳，  
玉爲底蓋兩無瑕。  
衣裁須取全身稱，  
棋力難教半子差。  
水裏著鹽知有味，  
鵝頭剪綵不爲花。  
性靈卽是良知說，  
要讀奇書過五車。

□一春多雨戲爲俳體索懋翁涑之師愚和

一春強半是春陰，誰作商岩宰相霖？好馬鄴泥惜紅錦，貪人點滴詫黃金；筭皆爭長平權起，絮不羣飛壓力深；衙鼓聲中靴版集，難爲十日閉門心。

□ 諷柳絮

上下雲龍未許攀，涵悲茵喜兩無端；輕纖自詡升高易，流速深知載福難；偶入青樓原似夢，縱登黃閣不中彈；因風鷲自汚泥起，偏有癡兒仰面看。

□ 嘲柳絮

如雪蜚螭便是才，了無根蒂墮塵埃；醜雞離甕分飛去，野馬成羣漉蕩來；摹仿玉從天上戲，誇張花向日邊開；雖根牆脚尋常見，一日山僮掃幾回。

□ 戒柳絮

乃祖城南老樹精，神仙種子宿知名；魚吹何苦相輕薄，燕唼終然另潔清；每到高危防墮落，本無道術敢飛行；亭亭不受淤泥染，淥水紅蓮是化城。

□ 代柳絮答

答諷

茵廁由來判濁清，肯同閣老耐彈抨？逐風上下今知悔，似雪聰明夙有名；合與參寥爲法嗣，甘從謝女署門生；風流自比泥中婢，翻笑康成喜怒輕。

答嘲

天上碧桃誰見來？月中青桂又誰栽？略如藍玉浮烟起，得似葵心向日開；芝醴何知根本事，風塵豈少謫仙才？莊生野馬言皆寓，引喻荒唐亦可哈。



答戒

烟雪迷離認本師，禪家戒律小鸞持。飛能及屋功何有？寒不中衣愧可知。獨我淤泥防染著，幾人台閣懼高危。慈雲一片皈依處，大士瓶中是故枝。

沈澹集

題麟鳳箋二首

角羽鮮明紙百番，圖形隨處有凌煙。中原不是無麟鳳，盡在樊南自製箋。  
四靈得二寫成圖，玉采浮浮素映朱。不入先生金篋裏，龜龍滄海怨遺珠。

述懷

少年已愧得名虛，晚對時髦百不如。心計漸隨頭髮短，宦情欲共扇紈疏。論交弟范兄司馬，問事今琳古仲舒。猶有涓濱舊竿綫，無心更釣北溟魚。

七夕

重棟高樓乞巧針，滿衣風露坐桐陰。似從天上聞河鼓，難得秋前見藥砧。明日立秋，絕鏡紅蛛占喜事，過橋靈鷲寄芳音。絳河碧海何分別，月姊天孫夜夜心。

仲錫令弟新婚不逾月即赴日本留學賦贈一首

鴛鴦七二各成行，燈樹垂花照絃妝。兄弟天台循故事，（新婦即仲錫妻妹）女牛銀漢共輝光。少年日月真須惜，兒女風雲兩不妨。一出紅閨行萬里，玉人含笑看扶桑。

效放翁

連雨纒晴罷晚衙，  
一句叢桂兩番花，  
閒房幽草盆盆蟀，  
別院斜陽樹樹鴉，  
眼暗求明瀚白菊，  
胃寒思暖啖香砂，  
祇除睡裏無拘檢，  
夢蝶依依到謝家。

塘報

重臣三策起時艱，  
四海喁喁望轉圓，  
憲法學堂作遙對，  
女兒天足在中間。  
(某公陳三策一立憲二不纏足三學堂也)

閨房僧鞋菊

飛卿錯認錦爲鞋，  
纖手輕招葛屨來，  
刺繡燈前描白足，  
敲門月下是瑤臺，  
羞隨羅襪凌波起，  
各有金蓮貼地開，  
省識西廂皆佛理，  
秋階臨去又徘徊。

禪院女兒茶

門茗來尋雪隔師，  
鼎娥名字漫相疑，  
淨瓶甘露教誰捧，  
秋水禪心有妓知，  
消渴喜逢散花女，  
調泉應是竊符姬，  
浦東寺裏枯魚淚，  
莫怪崔娘响沫遲。

屠肆觀音柳

努目低眉兩不侵，  
福田孽海日相尋，  
放將刀下承甘露，  
過我門前借綠陰，  
樊灌豈無龍象力，  
鄭滕都具菩提心，  
婆娑此樹饒生意，  
滌手來依紫竹林。

蓬門富貴花

枳棘何當辱鳳凰，  
簾瓢門巷借輝光，  
尋常燕睇家非謝，  
偃仄蝸居國有王，  
十戶醜金培豔質，  
三旬乏食飽天香，  
后妃列傳從頭看，  
半起寒微侍玉皇。

壽竹銘中丞六十

天子初元第一人，上公劍履動星辰，標題金榜科名首，成就熙朝柱石身；門下誦絃龍種貴，（公值上書房久）關中都典虎符新，千秋萬世無窮事，始自堯年丙子春。

漢宮虞美人

數行泣下粉娟娟，難化江東紫玉煙，回首可憐歌舞地，傷心只在奈何天；細腰誰與成雙對，（傾國傾城無對無）雙見徐孝穆文，結子卿應過八千，坐閱娥媼到文母，（元后爲新室文母）名花含笑液池邊。

禹廟儀狄酒

采桑津畔釀醇醴，夏后荒祠祭品豐，玉粒祇應分后稷，金船終是屬司空，（船司空）白狐量可千鍾滿，饗養形呈九鼎中，何必祠官申酒禁，一時慍解五絃風。

魏營諸葛菜

儲胥風動菜花天，江左鱸魚無此鮮，煮處那分三足鼎，買時須用五銖錢；漢家根蒂知深固，曹氏町畦盡棄捐，可得全忘求益意，直規河北作屯田。

唐代隋隄柳

海內天人見錫裘，蕃釐花事幾番休，裙腰武媚開箱驗，眉嫵蕭娘滿鏡愁，（用楊帝覽鏡語蕭后事）始末風流雙後主，（隋前陳後主唐後李後主）中間妖亂小迷樓，（揚州妖亂志）直須等到漁洋出，結束江南一段秋。

寒夜俳諧體

譙門畫鼓已三敲，倦聽茶聲半夜潮，鑪取微溫方適手，帶非甚緩不宜腰；空心硯滴中無水，罩眼琉璃上有橋，試取茸裘較分數，羊羔程度淺於貂。

春日效俳諧體四首

捲簾含笑對東風，世界於今亦泰鴻。跳舞會宜夔一足，測量學要羽重瞳。西京花鳥皆標本，南畝人牛並苦工。春物滿前任描畫，名詞輸寫入詩中。

賦得女學堂十四韻

傳聞婦學盛東京，興起支那女弟兄。初六履霜陰象見，東南出日牝雞鳴。鉛黃自昔留污點，釵弁於今要競爭。絕國語言嬌乳燕，大家講義囀春鶯。教之歌曲鸞爭舞，畫以臙脂虎竟成。標本室中花樣巧，體操場上柳枝輕。宮腰可似諸夷細，天足纔堪萬里行。梅實改良將問鼎，蓮花進步卽傾城。天公電視應相笑，織女星期任改名。橫舍各安娘子位，陸軍常備美人兵。地球漸逐秋波轉，天柱都將玉笛擎。治外法權操女手，自由婚嫁順人情。號姨騎馬羞前輩，章母稱師畏後生。成就國民四百兆，中分一半是娥英。

閱報紙戲書回文

徒然計利取譏嘲，反覆心情任貶褒。無可盡言空縱誕，有何知識特矜驕。朱同白辯誰非是，燕與麀爭幾暮朝。狐有野禪談自妄，蕪荒學舍草蕭蕭。

蕭蕭草舍學荒蕪，妄自禪談野有狐。朝暮幾爭麀與燕，是非誰辯白同朱。驕矜特識知何有，誕縱空言盡可無。褒貶任情心覆反，嘲譏取利計然徒。

衛生

舉世何緣得壽康，頑靈垢淨每相妨。貫輸宇內清空氣，打掃城中穢濁場。果木且嫌癩痔累，禽魚猶忌羽鱗傷。物華人傑同珍衛，須信身強國始強。

初夏

風簾嬌燕引雛遲，紫馬鞭香盡一枝。桃葉青青梅子綠，蔷薇紅到動人時。

書窗

蕉葉抽心整復斜，刺梅開瘦膽瓶花；消磨眼力書窗紙，又換宮蟬十扇紗。

記夢

槐葉初生冷可淘，卯時殘醉午前消；垂帷正作還京夢，驚起一聲婆餅焦。

盆蘭

一朵能香屋數間，芳風淑氣滿前軒；綠窗盡日箋香草，不是同心定不言。

贈燈

下筆千言思百回，宮壺蓮箭遞相催；樊南二十年來稿，總被金釭照出來。（余自爲兩縣時爲幕府作奏恆以夜千人靜籌鎗命筆往往達曙至今猶然）

消暑

綠君堂下掃莓苔，竹榻橫安茗茗杯；池水自喧蛙鼓吹，鑪煙時結蜃樓臺；詩貪夜草朝還改，性愛秋花夏已裁；每日東園須一到，露花風柳引人來。

六月既望作

倩卿逝世三十九年矣

當年永夜伴牛衣，今日黃昏對紫薇；富貴忍忘貧賤事，回頭三十九年非。

六十照象自題

斜簪散髻對長松，心字羅衣衫一重；每歲荷花生日近，自臨池水照清容。（去年亦六月照象）  
名馬牽來可據鞍，赫蹄方寸寫蠶眠；修期諱老何從諱，鄉榜題名四十年。  
尋常不賦四愁詩，贏得吳霜點鬢遲；乞向花間草堂住，隱囊紗帽坐填詞。

親知爭索鏡容圖，媿以清詩字字珠。爲問春桃倚風笑，今年人似去年無。（時夾竹桃盛開）

□ 月夜登平臺舒眺

絡角蒼龍夜轉東，登臺左眎極清雄。置身迴出風煙上，顧影低徊月露中。東省層樓無地起，（擬築樓未果）南山一碧與天同。行宮只在闌干北，佳氣經年自鬱葱。

□ 清晝

清晝焚香百慮空，金槌剛打午時鐘。家書視紙爲長短，官茗分杯試淡濃。睡起篔簹紋常印臂，公餘書味自蟠胸。老農頗望芳田雨，試禱仙潭白耳龍。（南山有白龍潭）

清晝攤書百慮忘，石闌干外過斜陽。綠陰似拜仁人賜，白日偏於靜者長。雜紙寫詩成五色，百花作枕備諸香。人間熱病誰能療，買取松風一味涼。

□ 疊前韻

清晝焚香百慮空，閒庭見鹿不聞鐘。忘情莫詠宵征肅，有味爭如午睡濃。道暑時時冰在抱，照人朗朗鏡當胸。青松五粒何年種，鱗鬣開張已似龍。

清晝攤書百慮忘，似曾仙籍占樵陽。桃榴豈必分華實，烏鶴何心較短長。新月照廊青桂小，遠風吹幔白蓮香。井泉澆徧斜陽地，徙榻當花納晚涼。

□ 前題

清晝焚香百慮無，誰從屋上愛陽烏。清風入戶佳於客，小雨沾花貴甚珠。梁燕不候虛紫頰，池蓮生子盡黃鬚。舉家都有浮瓜興，金井時聞放轆轤。

清晝攤書百慮清，柳深深處坐聞鶯。蟻如偶語原無禁，蝶總雙飛較有情。薄電可能迴玉笑，凌雲猶望賜金莖。

郊廬置藏冰室，果盈令人憶舊京。（長樂門外有冰窖，自龍首渠廢而西安無冰矣）

□ 暑夜池上

露下天高夜氣清，自攜團扇繞池行，兩三小鴨眠花熟，一二流螢點竹輕，不放風搖紅燭影，久疏雨滴綠荷聲，新秋又乞針樓巧，臥看雙星分外明。

□ 七月八日立秋喜雨

夏雨艱難潤原隰，秋風容易入闌門，茶瓜涼到二三伏，琴鼓歡連數十村，一葉辭柯覘物態，百花成實總天恩，人生適意常宜晚，蔗稻欣欣長子孫。

□ 秋暑

秋至炎官尚有威，林鳩無語駐晴暉，夜親文牘三條燭，晝接賓僚兩截衣，（俗謂羅漢衫）一院竹荷詩境淡，滿城瓜藕病人稀，官身雅得林泉意，臥聽青蟲轉紡機。

□ 新秋柬懋翁

藜杖來過滿鬢風，秋堂觴詠兩人同，綠槐高處尋知了，紅藕香中聽活東，七月雙星天有喜，九晴一雨歲仍豐，詩家亦有麒麟閣，劉白誰當上將功？

□ 早秋雨中

臥聽簷雨似流泉，老竹新蕉各自妍，涼燠適當中立地，春冬都遜早秋天，西風熱解諸無苦，東電言和數不鮮，誰挽銀河洗兵馬，榛苓吾愛美人篇。（俄日方在美京議和）

□ 中秋夜無月

風動姮娥青桂枝，暫收明鏡理妝遲，玉臺只在寒深處，暗地團圓世未知。

亙古清光徹九州，祇今煙霧鎖瓊樓；莫愁遮斷山河影，照出山河影更愁。  
碧海青天深復深，滿衣風露夜森沈；陰晴不改年時面，惟有素娥同此心。  
一寸銅荷磊瑩珠，露螢涼到桂花初；今宵無月關何事，打點秋燈照讀書。

再賦

胡牀坐據不知愁，晴日登臺雨卽休；但揀涼天佳月夜，老坡無夕不中秋。

何壽萱解任歸小住西安賦贈一首

關隴維藩兩弟昆，東臺西省自爲鄰；一官進退常先我，（君備兵肅州余方宰咸寧今又先余解組）萬事安危付後人；（君去蘭州時番回不靖）使節久膺方岳重，歸裝仍似翰詹貧；秋桑落後官醪熟，爲薦行都軟脚春。

食料

幽詩八月說瓜壺，葵棗蟬嫣入畫圖；漬酒滿筐生啖蟹，炷香候火爛蒸鳧；飴鹽並下思吳膾，蘭橘均調仿御廚；獨對秋風憶蓴菜，虛名無取四鰓鱸。（鱸在魚中最爲下品）

仲秋 進退格

仲秋煙景美於春，山水清無一點塵；從暖到寒逢過渡，將宵比晝恰平分；紅蓮落瓣房房子，玉雁成行字字人；織女明星輕貴壽，要聽學士詠微雲。（秦少游詩織女明星來枕畔了知身不在人間）

受軒和食料詩再賦

秋高底處宴頭鵝，松下清齋笑腹皤；學士豈知酥爲甚，相君不過飲亡何；世言腐敗猶魚爛，我厭魚鱗甚虎苛；却對鯽盤成感慨，如今名士亦無多。（自新學盛而龔所謂江湖名士者亦不多見）

閒事一首



定須開地覓閒人，官府應無自在身。玉枕筆痕三折媚，幺幺詩格兩頭勻。俸金有羨心常足，館吏多賢跡較親。展折東籬作重九，先期灑掃祭花神。

□ 秋景回文

牆花度影蝶藏深，鵲動風枝橘綴金。香篆裊雲籠壁畫，竹籬通月曬牀琴。良鄉酒過無佳味，復社詩多幾苦吟。涼夢鶴邊秋喚起，黃花許我獨知心。

□ 衙退

退食焚香日又西，油窗大半鎖銀泥。花箋乍可酬前韻，墨牘何煩請內批。率請內批。本事一編徐電發，閒情再世馬雲題。莫嫌雅俗常相屬，心有通靈一點犀。

□ 秋景再賦

翠秋一柳著煙輕，水畔西樓翠色晴。人泥綠筒鄆酒淡，客貽香餅建茶清。新霜鬢怯初來雁，晚樹花留欲去鶯。麈榻掃餘公膳罷，茵紋玉皺賭棋枰。枰棋賭皺玉紋茵，罷膳公餘掃榻塵。鶯去欲留花樹晚，雁來初怯鬢霜新。清茶建餅香貽客，淡酒鄆筒綠泥人。晴色翠樓西畔水，輕煙著柳一秋翠。

□ 俳體疊東堂韻

一年好景仲秋時，清鏡何勞鱗鬢絲。上海書來貽鐵酒，中州集裏選金詩。皆有本事。偶翻神秀身非樹，帖仿唐寅指不枝。昨種梧桐今種竹，長成都與鳳皇期。

□ 秋日雨中讌客次何方伯回文韻索同人和

予招一叟漫行杯，坐榻安花倚北臺。虛與昂推同綠酒，西法每於星期會飲。露兼霜落欲黃槐，書家舊本千

毫禿，畫手名縑幾卷開，疏雨墊巾烏角軟，初寒嫩菊早看來。

來看早菊嫩寒初，軟角烏巾墊雨疏，開卷幾縑名手畫，禿毫千本舊家書；  
槐黃欲落霜兼露，酒綠同推昂與虛，臺北倚花安榻坐，不行漫叟一招子。

夜霽

霞顏駐酒得閒身，遠漏宮壺玉滴頻，花意快然天愛好，燭心紅甚暖如春；  
紗窗綠淨松過雨，月夜清佳茗似人，華有菊黃金綻蕊，斜枝數朵晚香新。

高等學堂新葺小園秋日與懋臣觀察冰之大令飲卷阿館卽席有作

斑斑錦石細垂蘿，爽氣秋高雲雁過，山斷不平天與翠，水多無定雨鳴荷；  
（池水常竭待雨而滿）顏開酒進將誰勸，講輟亭中可若何，閒院午陰桐井綠，鸞驚欲起緩聲歌。

初寒

風琴玉動警棲鴉，日出東窗紙換紗，豐要甃裘勝弱體，軟宜蒸餅試殘牙；  
紅蟬蝕卷詩呈草，綠蠹浮卮酒起花，重慢翠罽薰熟麝，濃香午茗酌些些。

秋窗

華清曉氣月窗斜，屣倒迎來此客佳，花露染藍柔性紙，柳風吹淡淺紅紗；  
又了玉挂長條畫，醞醇香煎幾串茶，衙吏散時芳菊晚，鰓簾翠捲一鉤霞。

秋樹

鴉來莫喜鷓來長，氣得秋多態老蒼，花發偶然嬌愈醜，葉多何者綠非黃；  
瓜爲棗認新成實，菊映松憐晚送香，佳月夜來人境寂，蛇龍動地掃風霜。

□九月初三夜見月感賦

蟾蜍今年廢不庸，寒膠白露一時空；嫦娥未識人間事，依舊青天挂玉弓。

□代月姊答

靈藥偷回去有窮，廣寒深避箭頭鋒；三千年後纔安枕，盡廢狂夫射月弓。

□雨中夜宴次懋翁來韻

人中數鶴嵇生一，夜笛邀仙醉上樓；新舊黨知誰得志，下中才愧我吟秋；  
鵲螺翠解山眉恨，淚燭紅銷雨裏愁；伸指將壇詩伯五，（兼謂何吳徐文四君）賓來雁住強君留。（君屢欲歸余強留之）

□玉筍長

菊名花瓣纖細長白故以女手爲喻

天女何時乞與他，玉如纖手軟兜羅；輕籠翠袖聞香否？半露柔荑奈冷何？  
葱指可能持瘦蟹，檀心誰與數旋螺；東籬霜曉催班急，收入唐家進士科。

□白牡丹

菊名

金天旄節玉光浮，異姓稱王楚僭周；豔雪數叢來栗里，行雲一朵去揚州；  
籬東置酒應傾國，洛下看花直到秋；經麻風霜纔富貴，千紅萬紫一時愁。

□白玉蓮

菊名

獨立西風抱苦心，青苔白露鎖相尋；霜籬葉展田田翠，月地花生步步金；  
池北招邀隱君子，香中禮拜玉觀音；館娃宮女能詞賦，須學陶詩放淡吟。

□九日招同移香懋臣省三三觀察仲錫太守涑之大令集慈恩寺陪曹大中丞雁塔登高卽席賦呈

綸羽來登七級巔，插花霜鬢望如仙；三秦豪傑從車後，萬里雲山赴榻前；  
目送黃河到東海，手扶紅日返中天；九

州多少澄清事，不是龍山落帽年。

□成子蕃侍御屢和余高廟題壁詩韻因友松觀察還陝彙錄見寄二十二疊韻奉酬

早從畫壁想風流，（曩在江亭高廟屢見題句）才筆銛於玉手鉤，飛入文林驚鳳藻，傳來諫草識魚頭；詩如課最誰居殿，人果能豪許臥樓，（宋詩殷勤傳語臥樓人）他日還朝車第七，欽臣眞作老坡游。

□友松以重陽前一日還陝二十三疊韻奉贈

又見長河遶華流，君來重試釣詩鉤，去時梅子雨盈尺，歸日菊花霜滿頭；多士燻溫師範學，（君仍領師範學堂事）近詩傳寫酒家樓，還家小住蓮華寺，只當高僧挂錫游。

□寄藍洲書題後

關內稀逢越雁求，故人霜鬢苦相催；庚寅記得秋分手，黃過籬花十五回。

□白菊四詠同人多次韻見答雙關題爲韻所限往往顧此失彼古人勿尙也尤而效之亦因難見巧之意

云雪獅子

合被元章畫裏收，（米有獅子圖讚）日中睽矚目光流，金精作貢騷人喜，（獅爲金精）香國封王隱者愁；（師子國王）據地差爲八風舞，凌空莫打五通毬，上元粉塑獅蠻像，借作重陽院落秋。

□花間女史得四刻樊山集吟諷達旦書來索詩因寄

乞與新書錦帶長，彩鸞聲韻叶歸昌，行行秋水眸中過，字字蓮花舌上香；棠睡今宵虛玉簫，牙琴眞賞出紅房，鬢蟬未卸脣脂在，免促明朝曉鏡妝。

□再寄

簷風入牖颭銅荷，好語如珠得幾多？本自神清少眠夢，借儂詩卷養秋波。

□僧鞋菊

挂屨楓前夕，照黃蘭閣亦染秋。鞞香莫借鹿女傷行露，好與琴聰操履霜。行脚不踰彭澤縣，結趺曾上魏公堂。拖泥帶水知無慮，花雨彌天是道場。

□禪院女兒茶

鳩摩洗鉢試茶旗，吞盡銀針（茶名）始得妻。白日雲房花散雨，綠煙禪榻絮沾泥。嫩湯生眼橫秋水，小葉如眉證菩提。（菩提新葉小於茶見宋詩）居士巾瓶誰得待，玉容靈照自扶攜。

□屠肆觀音柳

善惡當於根性窺，豈真宰割倩柔荑。放生好附慈航尾，戒殺常低菩薩眉。割肉還家貽善女，擲刀成佛是男兒。能沾一滴楊枝水，即是過門快意時。

□夜坐

地衣五色印成花，顛鼻香枝一種斜。酒惡更思霜後橘，樹凋全見月中鴉。無花未便風情減，有鏡何嫌目力差。爲嚙華池貪瞑坐，無聊試學養生家。

□湘綺先生遊秦喜贈

金山漫詫滕元發，唐殿驚逢李拾遺。道莫能容纜可大，老猶得見未嫌遲。高名彈壓三公貴，正義分明百世師。孔子西行終不到，秦人今始識音儀。

□湘綺先生小住五日意將登華而歸賦詩惜別

乘興西游入武關，絳雲舒卷意閒閒。去從漢水浮湘水，來爲樊山與華山。舉酒水曹梅樹下，題詩玉井藕花間。誰知京兆街頭客，五日匆匆走馬還。

香瓣南豐是我師，東歸何早見何遲？津梁雖倦情難盡，節笠孤行意可知。老鳳文章逾藻耀，神龍首尾望迷離。他年續刻題襟集，添取西京掌故詩。

送懋齋司權鳳翔

東湖風景似西湖，曾見髯仙再至無？（公嘗守鳳翔）今日分攜十學士，（謂學務處尹仲錫程戟傅吳敬之仇涑之楊吟海吳少蘭黃肇青蔡師愚張衡玉秦辛畬）明年消領萬紅芙。禁栽鶯粟新增稅，勸種魚菱薄取租。竹馬兒童認顏狀，依然前畫醉翁圖。

流水高山抱古懷，牙琴莫嘆賞音乖。魯瞻惟有靈光峙，漢雋無如曼倩諧。驛騎往來送詩札，鞦韆上下喻官階。（公守西安余爲渭南令及余陳臬而公守同州）野王二老依棲久，祇覺關中氣色佳。

冬日池上

自披風帽俯冰池，照我須眉復在茲。詩到古人不到處，愁生春水未生時。山頭積雪松猶健，樓上迎暄柳未知。萼綠邇來消息少，好憑驛使寄橫枝。

宋人有貧樂圖詩三首皆佳戲和其韻

老翁白頭方著書，斷簡剝落青漆膚。兒就燈讀母作襦，學書自詫王豹奴。平居不草封禪書，得妻花貌冰雪膚。憤鼻即是鴛鴦襦，婦翁勿矜八百奴。秀才短視夜讀書，石蓮去心仍帶膚。自起煎茶火燎襦，笑罵茗者酪之奴。

再和前韻

大兒聰明讀父書，小兒黃頰白玉膚。燒栗互讓承以襦，火攻何敢同阿奴。典琴時時購異書，青氈夜夜親肌膚。寧飢無粟寒無襦，不爲平陽公主奴。

荆妻覓線裝舊書，嬌兒食橘忘剝膚；興來鈔詩滿袍襦，楚騷直命之曰奴。

□ 三疊前韻

平生恥作乞米書，大雪晝臥凍裂膚；一縑不受冬少襦，終不屈身陶胡奴。  
夜除鄰酒佐讀書，地爐活火燒松膚；絮衾上覆短布襦，獨睡不解溫錫奴。  
夜思古事繙破書，凍飲盪汁清毛膚；短衣怕著裘與襦，目中何有三寶奴。

□ 余論詩專取清新以爲古作者雖多於詩道固未盡也賦此示戟傳午詰

句律原參造化工，兩間光景信無窮；若無鹽鼓蕪何味，爲有梅花月不同；略取蜀薑生辣意，定須越紙熟槌功；今當萬事求新日，故紙陳言要掃空。

□ 寒夜疊韻簡午詰

吾廬漢繡復綸連，睡蝶醒來影尙翩；鐙盞自明無月地，（用呂吉甫答刑公語）梅瓶剛及試花天；詩心馬上和牀上，茶品明前又火前，爲報晚雲濃釀雪，紅氈重坐暖金船。

□ 寒夜寫懷

寒羅三打夜蕭森，鬢脚吳霜稍見侵；芒角有時生酒後，黛螺何處染情深（見宋詞）；盞花水足波生臉，程燭紅深暖到心，至竟未除遊俠氣，十年銷盡幾鍋金。

□ 北臺冬望

鳴鶻風急小寒天，俯仰關河一慨然；滕六以雲爲釀具，樊川將水換桑田（樊川曲江今皆闢爲良田）；九達馳驟金車耳，雙塔依稀玉馬鞭，惟有南山不改色，時時青到酒杯前。

□ 菽帥用前韻見贈並懷湘綺三疊韻奉答

雲際消搖一鶴翻，望中紫白兩峯連。不衣自暖春風座，有酒消寒小雪天。威鳳羽儀雙闕下，老梅叢行百花前。故人歸聽瀟湘雨，港曲烟深一釣船。

四疊韻書感

三神雖立望之翻，自昔東夷有少連。擗馬最思南牧地，陽烏難拘左旋天。桑生於海今非古，薪積如山後在前。時事悠悠人意懶，風潮休撼米家船。

倒疊前韻

風波不到米家船，逆炬何勞導我前。國際儘多中立地，箇人都入自由天。白雲可贈無宏景，碧落難窮笑目連。何日東歸訪黃鶴，羽衣吹笛任飄翻。

疊北臺韻

飲啄飛鳴且信天，蒼官歲晚意翛然。祇愁晚達妨賢路，略識人情是聖田。深避北風花入幕，更通南埭竹行鞭。時流輕薄吾何恨，四傑文章勃在前。（謂湘綺）

東園五疊韻

索笑巡檐帽影翻，物華隨地可流連。苦茶後有甘甜意，暖閣中無凜冽天。黯淡冬山呈馬耳，侵凌凍草茁車前。斜簪散髻平生願，縱著貂裘不上船。（杜詩注以船爲衣領）

昨押奴韻用奴僕命騷語戲傳以爲過賦此解嘲

騷經萬古詞人祖，奚錦安能軋楚風。且可狂言沿柱牧，亦如險韻趁尤侗。懷襄二主恩俱薄，景宋諸賢道益窮。（若三閩作僕宋玉輩將爲興臺矣）楚國蘭芬稱絕代，獨高位置選樓中。

曉起寒甚六疊韻



拂曉南窗鷓鴣羽，風披霜女互鉤連，手營寒素千間屋，（時方擴充各學堂）胸有陽和一種天，山似酒人眠醉後，雪如文勢蓄題前，聚星堂裏饒佳客，莫憶清溪訪戴船。

### 池上七疊韻

牆東緩步角巾翩，默數苔痕屐齒連，此水聊當地中海，一冬暖過嶺南天，人情樂與雞爲口，宦興慚如馬不前，更待池冰膠似鐵，小兒來放自行船。

### 冬暄一首八疊韻

冬暄如綺相烏翩，照映紅檐雁齒連，暖熱似依南極地，雩涼未是北門天，透迤橋信來霜後，蘊藉梅心破臘前，朝邑新來報冬汛，三河不見打冰船。

### 日來陰曖多風九疊前韻

九英花下綵幡翩，屋裏金罍品字連，近得茶團思雪水，（藍老遠寄佳茗）昨因月暈識風天，鏡容寫我猶年少，詩景無他只眼前，簾外奇寒簾裏燠，精廬宜稱小如船。

### 長至朝罷與戟傳敬之共話十疊前韻

景風初至戟衣翩，桓府珣超遞接連，美酒羊羔三四日，（用爾詩）香煙龍雉九重天，功名退讓甘人後，機鑿通靈貴事前，又是一陽來復候，濟川努力渡頭船。

### 六十自述

五十之年又十年，晚晴猶是渭南天，守中祇覺人皆智，從事誰云我獨賢，鉤黨李牛銷水火，性情安豹贈韋弦，賓僚推獎言皆過，真率無如自壽篇。

七品何來獬豸冠，多緣君相獎孤寒，教參龍武新軍事，羞署麟臺舊史官，弦上誰知爲箭苦，牀頭未覺捉刀難，二

年丹鳳城東住，贏得琴樽續古權。

斗起煙塵鞞轂間，戊庚妖亂互迴環；魯連欲蹈無東海，遼瑗微行有近關；黃蠟寺九猶北寄，（拳董變起先後上府主四十餘箋出京後猶屢書啓事）紅燈一路照西還，兩家平善由天幸，（婦家同行）馬上閒吟看華山。西幸金輿入建章，紫微今始用君房，房齋果以能謀進，陸贄偏於典誥長，當國二公同患難，回天數語繫興亡，詔書切責誅戎首，辣手袁絲漫比方。

十一月二十九日寄懷湘綺是日爲先生生日

月頭月尾兩凋弧，西華南衡道不孤，滿馬嶽雲出關去，一帆湘雨到家無，來將芝草酬黃綺，歸有梅花壽老逋，天地泱寥松柏健，雅輪夫豈異人扶？

九月廿一爲菽師生日越二十日而竹帥生又二十日而增祥生賦呈兩帥一笑進退

四十日中迭稱壽，亦如隔八應黃鐘，差排甲乙剛勻稱，攪揆庚寅小異同，共作一龍頭腹尾，（洪北江六言詩三人始爲一龍言事非獨力能辦也）合爲三友竹梅松，何如文富同居洛，君寶叨陪末座中。

臘日花匠進蟬蟹水仙數頭憶正月作詩纔一羅預耳感賦

趁逐春燈無幾時，爬沙重見玉交枝，世間偏是無腸子，會日常多少別離。

玉質金相得聚頭，花魂了不辨春秋，近來更有梅花蟹，逸致橫生湘綺樓，（壬老近詞有更有梅花兼之蟬蟹之句）

除日早起午詒送一詩來卽次其韻

誰爲逋仙補憶梅，箇箋深費阮郎才，（昔人憶梅云擬作逋仙寄內詩時午詒姬人將至）滿城歌管先春動，萬里瓊瑤掃雪開，（前夕大雪）臘甕自言諸葛菜，歲盤重暖尉遲杯，詩心欲共穠花發，明日明年羯鼓催。

乙巳除夕寫懷

年前三白吏民權，柏子香中薦膽盤。二十二年今夜燭，照人十九在長安。（余入關後二十二除夕惟己丑在鄂庚寅己亥在京）

六十平頭白馬生，三遷遂踐紫薇廳。當時花縣鳴琴侶，起視東方幾曙星。一從注牒去承明，朝列多聞嘆惜聲。楚國蘭芬稱絕代，強拋著作事功名。秦風板屋氣如雲，跳梁緣稜待策勳。須信將門終出將，老年來此領新軍。諸子同爭日月光，董生能以一言亡。二千年後思周道，第一功名在學堂。雅流多視簿書輕，案牘來時只署名。試數古今朱墨手，惟應蘇綽稱台衡。滄海橫流直到今，操舟欲濟阻重深。諸公莫復爭鈞黨，新舊都同愛國心。遼東半島洗兵塵，十部星羅用重臣。天下太平從此始，吾皇三十二年春。

丙午元旦

丙午生人逢丙午，春王正月頌春王，讀書識字從頭起，運水搬柴作計長。（禪家以搬柴運水爲真實事業今方講求實業故以爲喻）五福首先論壽富，百花次第吐香光，勾除六十年烏兔，百葉重題第一行。

元日午詒見過持除夕八詩去尋卽和示疊梅字韻奉答

東南日映九英梅，醞藉承明侍從才。出謝朱衣雙吏引，歸看木筆一花開。千官漫刺投諸甕，四海狂瀾渡以杯。見說春回人日後，西園芳信要詩催。

元日次房前輩謝余饋藥次來韻 君患瘧得瘧後自贊安睡竟夕

重看宜春苑裏春，芳情勝氣與年新。螭頭同下朝元拜，烏爪剛投蚌後身。美睡瘳皮從呂授，令詞羊舌賀韓貧。願

回涕上看山眼，巡視周南舊吏民。（君甫自山東回陝）

受軒和元旦韻再賦

風調無如大蘇氏，雪晴能唱小秦王。（蘇詩濟南春好一絕爲小秦王調）稍欣詩格與年進，漸喜兒衣如我長；袍袖先回春草色，茶甌豔發綠波光，人間四十年鄉貢，合與梅花論輩行。

齋頭牡丹盛開戲疊前韻

若把牡丹方杜甫，花中詩裏兩名王，唱酬人日窮愁少，終始春風富貴長。（牡丹一春再花）檢點一年來草稿，徘徊十步外花光，彩毫豔奪臙脂色，每句求工肯拙行。

新歲示客

扶風馮翊久牽絲，古帝王州極盛時；燭武得君今老矣，國僑爲母衆安之；星臨東井長相聚，官愛南山兩不移，多事得閒因歲首，萬花暉麗錦堂詩。

示吏

渾忘德怨了無私，謗譽由人不自疑，才有短長臨事見，意存忠詐聽言知；俗情免窟營何早，國計羊牢補未遲，我自不爲田舍計，底須二頃瀾張儀。

廣示吏詩意

解道多師是我師，老懷平淡謝恢奇，才情豐約生來定，血氣盈虛睡後知；（用王微語）最喜舊人憎學究，每存新理廢名詞，西儒未見吾狂耳，相見當勝不見時；（劉改之詞）不恨古人吾不見，恨古人不見吾狂耳。

高齋

高齋晝靜客來稀，風裊香煙上戟枝，眼界擴於觀海後，名心淡到看雲時；每防出話卮無當，未害除官核不離，才

德了無精進處，年來所得是頑癡。

□開歲五日東園舒眺

陶公遊戲斜川日，我亦熙怡畫省東。牆脚暗苔留老雪，庭心暄柳引芳風。雲嵐往往生衣上，花信番番在意中。已是春頭仍臘尾，送寒行策土牛功。（十二日立春）

□同門周仲海別四十年不得消息頃有書來知以戊戌成進士尋補盱眙令以憂歸賦詩卻寄

少年同學兩人奇，四十餘年繞夢思。猶記上頭有崔顥，（來書推甚至）堪嗟北不識盱眙文章溧尉登科晚，名字清臣到眼疑。（君鄉舉改名故通籍而余不知）河有鯉魚衡有雁，尺書往復寄新詩。

□馬日曉起大雪次韻

散花天女下華鬢，玉蟲東堂看假山。裴令園林春尚澀，袁安門戶晝常關。老農舉酒皆欣賀，寒士無衣偶謗訕。料得萬家同冷暖，不應李令獨蕭間。（元微之詩千官暖熱李令間謂李西平也）

□日暮又雪倒疊韻

北臺卮酒可能開，東郭寒人未足訕。泥路馬蹄常滑滑，竹間禽語自關關。裝添春色瓊瑤樹，激射斜陽紫白山。階下兒童工學塑，雪獅上面有花鬢。

□次受軒人日書懷韻

七日新年過，人間未立春。製燈象蓮女，守戶有桃人。賀雪書傳隴，看雲美在秦。盈庭盡嘉客，何敢效顏暉。百種魚龍戲，連枝富貴花。笙歌皆樂府，誦博亦兵家。畫象仙人鹿，（常觀察贈蝠鹿照片）陰功宰相蛇。（是日接滬上書以海州風災求助振）多爲吉祥語，詩筆更妍華。

賀摺春前返，平安祝聖躬。（摺弁初五日回陝）雪從瑤島白，雲捧袞衣紅。時政王兼霸，臣心老尙童。九州同暖

熱，無盡是春暉。

同年三百輩，交契兩人深。榮把煩春翦，花燈照夜吟。酒添磅礴氣，詩慰寂寥心。魚稻此間樂，無爲思故岑。

□梅

牆北一株梅，凌寒數萼開。雪隨殘臘盡，香逐上春來。得埒湖山樂，生兒宰相才。百花皆後輩，還仗好風催。

□有感

悠悠未是汝南評，微覺桓公喜怒輕。朱邑家鄉還此地，藍田鼓吹是何聲。如公始稱才兼望，顧我安能實副名。渭曲白魚青竹子，一竿煙水盡生平。

□改歲

改歲已過三十日，老來襟袍覺間寬。英雄人每輕邊幅，格律詩如養內丹。家釀速成緣水短，（酒有長水短水之別）汪琬詩短水具新膠。國花晚達爲春寒，清尊首置芳梅下，萬紫千紅次第看。

□署齋春興

木筆初開日漸長，香鑪畫省自徜徉。學堂生草憐書帶，倉吏栽花得米囊。南畝雪泥三尺透，西京燈事半存忙。（西安常以二月賽燈）掃清案牘餅梅底，領取橫枝自在香。

□二月朔艾卿學使枉過煮茶看畫清言竟拜進退

東省春融接使星，養新商舊互忘形。十年種樹頭應白，小雪煎茶眼倍明。李郭暫同書畫舫，憚王俱在紫薇廳。關中桃李花如錦，待取秋成貢玉京。

□出城

南陌春分氣漸和，秦山老雪尚蛾峨。唐朝塔廟丹青落，杜曲人煙柳杏多。古塚誰開追悼會，新苗已辦速成科。清

朝小閣銀鎗隊，細柳軍容不曾過。

□ 齋居用前韻

齋居二月已暄和，案牘何曾廢嘯歌？冠帶東人行樂少，鶯花滿眼得春多。綠槐舊是中書省，紅杏今非進士科。胸次蕭條謝塵俗，坐看雙鶻戲庭柯。

□ 花朝喜晴

準備芳辰薦壽杯，南山佳氣入樓臺。鶻如漆吏荒唐語，花爲三郎爛熳開。甚欲挽留佳日住，都曾經歷苦寒來。晚霞幽草皆顏色，天意分明莫浪猜。

□ 池南

池南籬落似山家，寒退纔蘇百草芽。五見春冬新舊雪，雙收紅白異同花。臨文作輟三投筆，對客寒暄一舉茶。來凭朱欄常在晚，牆頭山爲夕陽佳。

□ 俳體酬午詒疊歌韻

莫漫騷壇議戰和，新詩前後緩聲歌。雪能豐麥原因在，風爲催花動力多。馳道擬通西伯利，行都此亦莫斯科。百圍喬木參天起，常願鶯遷舊日柯。

□ 追悼李亦元比部

帶草霜凋歲在蛇，蘭摧玉折豈勝嗟？鸞鳳縹渺知何往？龍象雄懿（平聲）力可拏；無復商量新舊學，更誰溝合墨儒家？三年懷袖東方札，猶見江毫五色花。

□ 馬大令納姬仁甫目爲墨牡丹大令年六十古道照人因以筆公擬之亦強對也寫送次舫前輩仁甫同年發笑不必寄馬

來抱衾裯正及春，細桃結子杏生仁，筆公白到鏡中髮，墨牡丹爲畫裏人，好爲雙荷營斗米，（見東坡志林）卽看五桂繞靈椿，周南處處生芳草，茅苴何辭採擷頻。

丙午寒食次舫前輩仁甫同年以東館落成招集於觀海堂卽席謝賦

輕烟誰寫漢宮圖，冷飲梨花覺暖姝，西北總憐蝦菜少，中南得似鵲華無，敢將郢雪驕秦缶，不醉歐風是魯儒，東岱早爲天下雨，綺筵重進買春壺，（時方祈雨）

喜雨

爲霖果慰萬夫望，庭樹油油暖綠光，二麥信知公益大，百花何至感情傷，窗開朱鳥迎朝爽，裘有青羔備夜涼，晝漏稀聞投謁少，垂簾消領幾銖香。

吳移香觀察輓詞

舫船昨夜泛金波，忍聽今朝薤露歌，人物百年歸海岱，琴尊一夕渺山河，榮途脫屣平生了，華屋聞鐘涕淚多，春到盡頭花散雨，生天不是病維摩，（三月晦君猶夜宴比曉無疾而逝）

滿門清氣鵲華秋，官職聲名第一流，父子有文魁策轂，弟兄接武上瀛洲，薛岐邸第攤書坐，蜀洛人才按籍收，東壁南臺並華要，兩銜丹詔御星轡。

青雲取勢故斜飛，行部關中玉有輝，判牘屢勤南史筆，迎鑾遙識時中衣，兩持玉斧觀風出，一送麻衣帶雪歸，從此周南芳草綠，負他士女望睽睽。

同聲同氣亦同年，東省西臺笑拍肩，知我寸心如水鏡，以君高論當韋弦，新詩未梓先求藁，大事需材每薦賢，寡鶴哀鳴雛鳳小，東風吹淚注秦川。

立夏前一日東招午詒編修戟傳敬之兩太守雲生雨濤兩大令集雙紅豆館分得咸韻



眞率盤餐笑老饒，竹林深處酒杯銜。縱橫文字騰天馬，幽麗池亭似石帆。春夏之交薦櫻筍，暖寒各半任裘衫。此堂此夜祥星聚，聽取詩壇號令嚴。

一樽婪尾夜猶銜，簾簾清虛夏氣撻。春似燭花紅見跋，詩如筍脯淡勝鹹。熊魚得一心俱饜，客館熊掌不中食。龍鶴相逢語不凡，明發斑駁催送客。簷花細雨滿涼衫，雲生明日行涼衫，即今合衫也。

和雨濤江韻

精廬應是木蘭灣，乍可受人三兩雙。舉酒榼杯深門陸，評詩范意淺於江。小奴焙筍爭茶竈，嬌鳥含櫻墮竹窗。更展圖書銷夜永，列錢銜壁有金釘。

和敬之佳韻

老鐵寮中客並佳，馬蹄薄暝度槐街。頭巾早共時文棄，眼鏡新因古畫揩。梅墅清陰深似幄，藥欄綠雨細於篔簹。廚學作家常飯，猶似當年夜話齋。余在渭南常葺夜話齋。

和午詒肴韻

得魚客不道無肴，四月聞鶯夏令交。酒灑可須青豆浸，鮮香未用綠荷包。輪困五果思春薦，鬱律雙槐閱歲鈔。莊叟小言堪喻大，試將杯水驗堂坳。

和戟傳覃韻

座中人物盡江南，心迹都如月印潭。漫與小詩儒道墨，（余詩時作禪語）慰情薄酒女非男。睡魔須用真茶醒，書味初回諫果甘。官廨三間忘主客，祇應題作憩雲庵。

和雲生鹽韻

揮犀捉麈喜相兼，試味卿言似此鹽。語判莊諧詩有體，字兼刷勒筆無尖。政聲黃霸須防減，酒量山濤未可添。我

是貞元舊朝士，待將佳句付何哉。

□ 偶然作

嬌柳含風蕩綠漪，芳晨已過牡丹時。逡巡又薦玫瑰酒，次第當吟芍藥詩。論史莫輕小司馬，注莊還愛大宗師。等閒識得西來意，不遣靈明挂一絲。

□ 偶步池上憶去年作闌干詞歲一周矣

畫羅衫袖有餘溫，最曲猶凝舊日塵。惆悵摩訶池上事，水中紅影月中人。

□ 池上疊前韻

池萍風皺見清漪，又是花鵝哺子時。雨後園林顛米畫，夏初雲物盛唐詩。蒙蒙莊作吏仍蝴蝶，柳惠除官詫小師。（見貢父詩話）桑葉漸肥豌豆綠，坐看蠶箔欲成絲。

□ 月夜池上疊前韻

池光受月晃金漪，樓外棲烏已定時。柳挂風箏前斷線，苔侵石筍舊題詩。才搜儉府充花幕，文勒蘇亭謝雨師。雙鬢不緣多事白，未勞燈下簡新絲。

□ 三疊前韻遣興

靜院風簾動翠漪，飯香欲過午鐘時。人無畫裏無人畫，（某遺老作畫不畫人問之則曰世豈復有人耶今其畫罕見）我有詩中有我詩。頭上名花簪藥相，心源活水悟田師。羣兒盡說蜘蛛巧，絡得簷前幾絢絲。（頌聯自注國豈無人不收畫裏無人之畫世猶有我好作詩中有我之詩）

□ 觀物

漫持物理問照融，觀念由來在靜中。阿魏無真如理學，雞絲有味是英雄。（隋國之論如此）收藏果實經時施，

裁接花枝常下紅，昨見蜂兒語窻子，繭香蜜熟告成功。

四疊韻和午詒感懷

枕簟瀟湘水弄漪，蓄靡花發因人時，方書靈素君臣藥，豔體蕭梁父子詩，偶爲紅綃談劍俠，漫持綠綺問琴師，美人欲繡平原像，買貴關中五色絲。

五疊韻和午詒

煎茶玉水欲生漪，深淺眉痕並入時，澧浦花原香似妾，山谷詩香草當姬妾，玉臺人吏豔於詩，靈籟乍可追琴主，綺語何妨示秀師，怪得青琴絃更慢，水晶簾外雨如絲。

卽事六疊韻

綠窗紗縠皺春漪，眠坐心波不動時，門下私鈔冬夜語，扇頭偶遇早年詩，蜂兒枉作花蠹賊，鳩婦常爲雨導師，祇道芭蕉堪作紙，誰知歐越練成絲。

無題七八疊韻

羅裙水碧斂文漪，背立東風倚扇時，粉澤諱言常下淚，格高佯道不能詩，前蜻後蝶終相逐，我狷卿狂可互師，一片冰心誰繫定，玉壺密密絡朱絲。

藍橋春漲展晴漪，照見雲英掠鬢時，醉我濃於重碧酒，贈君難甚牡丹詩，分茶擘竹還多事，織素裁衣不一師，試捉紅羅餵冰麝，口中腹裏盡香絲。（寓相思字）

兩艇齋題詞

雙舟繫著音聲樹，賦海張融此後身，如鑠如鷓常泊岸，有花有竹自爲鄰，兩弓筈箬菴中地，一箇蓑衣社裏人，昔欲釣龍今老矣，無風波處偃虹綸。

九疊韻書感

海上洪波無靜濤，君看鳴鳥尙知時，甄陶人物由天演，開鑿山川待地師，經史外增無限學，歐羅所作是何詩？吾衰祇合東溪隱，閒看魚童結網絲。

館中微雨示彤臣

金橘花開不滿枝，石榴明潤透簾時，東來雨怯西風鬥，一點紅爲萬綠欺，潤遍墨君堂上字，靜於白鶴觀中棋，垂帷半日爐煙歇，重和煎茶院裏詩。

彤臣走筆見答疊前韻報之

月季新紅雨濯枝，依然茅屋買春時，周原足麥令公喜，越諺迎梅不我欺，蕉綠障天千丈紙，苔錢撒地一枰棋，鳳翔賢守今蘇大，對酒重論書畫詩。

雨止柬彤臣

曉煙散綠滿園林，雲日暉暉漏碎金，紫白山光兩離合，青黃梅子半晴陰，曝乾蝶粉穿花俊，滲溼鶯衣入柳深，無數樓臺皆罷畫，未須吹笛止芳霖。

雨後歸自館中

萬柳街西返照來，女牆匝匝絮雲堆，兩行忽忽佩當花散，一色朱旗捲雨回，榴火媚人爭照夜，梅青如許未聞雷，鳴騶列炬長安市，爭似青鳥踏露苔。

池北亭子

半畝芳池上有亭，亭前流水當琴聽，露花倒影成連理，風柳微波見性靈，昨夜又添三寸碧，新荷始鑄一錢青，午眠乍起無公事，池北閒緝陸羽經。

東堂書壁疊前韻

省東亦有畫妃亭，長日鶯啼鎖可聽。  
白鹿往來花不掃，紅魚潑刺水俱靈。  
窗含霞綺疑三絳，庭列煙巒仿九青。  
爲獵雅詞非考古，焚香閒讀道元經。

晚步池上

斜暉綺榭晚涼初，倚竹新安半榻書。  
茶炒嫩青煙避鶴，沼涵虛影月驚魚。  
花三兩朵紅無那，柳萬千條綠有餘。  
沙白漫池前夜雨，霞融澹粉滴荷葉。

蕖荷滴粉澹融霞，雨夜前池漫白沙。  
餘有綠條千萬柳，那無紅朵兩三花。  
魚驚月影虛涵沼，鶴避煙青嫩炒茶。  
書榻半安新竹倚，初涼晚榭綺暉斜。

納涼

吟秋望雨卷雲烏，妙墨遺詩寫大蘇。  
深樹楚雲生壁畫，蹙花湘水蕩籬珠。  
金絲萬柳如年少，玉版雙魚得意無。  
沈李綠蕘冰浸手，琴牀佇月夢西湖。

湖西夢月佇牀琴，手浸冰蕘綠李沈。  
無意得魚雙版玉，少年如柳萬絲金。  
珠簾蕩水湘花蹙，畫壁生雲楚樹深。  
蘇大寫詩遺墨妙，烏雲卷雨望秋吟。

宵熱

大熱無安枕，微吟獨倚樓。  
星高羣木上，涼解五更頭。  
仙露濃於曉，明河盼到秋。  
幸無燈與月，來照夜人愁。

久雨酬何方伯

屐聲筇影滿槐街，滲漉經旬地不埃。  
渴已掌中仙露解，詩須頭上墨雲催。  
苦如酷吏風吹去，國有豐年雨送來。  
起視芳田秋稼綠，青天萬里一時開。

□七月七日東園小集

雨後開軒覓晚涼，客來先醉綠荷香。園蔬籬果存真味，短髭輕縑盡古裝。黃月照人生酒意，銀河垂地接花光。人間兒女歡今夕，老去隨緣一舉觴。

□雨中作

窗北風清午枕甜，放衙早晚索衣添。雨纔起點秋先到，天亦維新夏不炎。無限雲蘿索補易，有情書札往來淹。呼僮檢視牀頭漏，莫損書廚紅白籤。

□喜晴 是日得電抄有立憲之諭

鷗簷雨歇鵲飛回，日出青門四扇開。北院風香清菡萏，（行宮舊稱北院）南山雲氣對蓬萊。池塘倦柳煙猶鎖，灑灑新棉雪已胎。聞道朝廷改專制，鳳皇銜得紫書來。

□七月既望雨後月明如畫

三日梧桐雨滴階，披雲誰捉老蟾來。玉盤我憶兒時見，碧落天從子夜開。小范甲庚知變換，（范石湖占雨詩或云逢庚變或自換甲始）大蘇壬戌共徘徊。鏡中全攬山川勝，更上凌歊百尺臺。

□玄文

玄文未就揚雲老，說著童烏卽淚垂。爲語老牛須割愛，譬如犢子未生時。

□金陵雜詩

兵力無如劉宋強，勵精政事數蕭梁。何因不享百年祚，甌毒山川是建康。

叢蘆無主魯公池，斷甃難尋武惠祠。功德無憑憑富貴，中山處處有園基。（土人謂布政司園糧道園南至胡園東至張靖逆侯園皆徐中山園址）

荒陂野水尚西流，朱雀橋邊繫釣舟。莫道南朝無可念，未嘗今少大航頭。  
太白南遊意可傷，吳宮泯滅國山荒。雪讒自寫浮雲感，豈爲登臺弔鳳皇。  
孟老錄中思汴臺，遠摩曲裏鄴城灰。世間少有蘭成賦，便覺江南最可哀。  
宰相荒嬉夜宴闌，保儀新拜掌書官。春風一半殘桃李，獨有潘郎忍淚看。  
北橫天塹雪濤吞，東擁鍾山翠壁捫。堪笑謂之無遠致，賞心偏在水西門。  
老借瞿暉作退藏，蔣山驢背舊平章。惠卿雖敗淳京壽，法乳繇延送靖康。  
相公開閫帶中樞，公子南軒闢敬夫。百萬椿錢支破盡，靈虹果有岳韓無。  
方丈讀書號其室，爲南軒南軒之稱由此始也。  
（張浚開府建康時，張敬夫在保寧寺）

耽隱周雷不可攀，栖霞訪古長卿閒。明賢專翫板橋水，讓與貧僧住攝山。  
媒醫開場隨麥肥，君王射雉撒重圍。祇今遊戲無生氣，江上蕃兒獵騎歸。  
句曲陽明洞裏天，館壇殘刻渺荒煙。挂冠神武時賢少，不訪三茅已是仙。  
景宗何如霍去病，慶之無愧張子房。誰道江東詩綺靡，如聞敕勒見牛羊。  
祕種傳來白海涯，雞籠爲帝亦堪嗟。牡丹芍藥舊王謝，一尺妖紅月季花。  
雞鳴寺改半山頽，永濟荒涼靈谷灰。獨喜清涼名實好，贊幽耽僻有誰來。  
秣陵遊客慣騎驢，今日全家挽鹿車。拈出維新一公案，請參利病究何如。  
（金陵諸刹清涼寺爲最餘無取）

過張繩菴宅

北望鄉關海氣昏，大招何日入修門。殯宮春盡棠梨謝，華屋山邱總淚痕。  
（時歿已一年尙未歸葬）  
篋中百疏吐虹霓，泛宅元眞世外嬉。却後何曾銷水火，人間不信有平陂。

憑誰江國伴潛夫？對舞髯龍入畫圖。憐汝支離經六代，此心應爲主人枯。（宅有六朝栝兩株）  
廿年奇氣伏菰蘆，虎豹當關氣勢粗。知有衛公精爽在，可能示夢傲令狐？

過蕪湖弔袁瀉窰

七國連兵共叩關，知君卻敵補青天。千秋人痛晁家令，曾爲君王策萬全。  
民言吳守治無雙，士道文翁教此邦。白叟青衿各私祭，年年萬淚咽中江。（士民祠之於中江書院）  
烏旄江湖老不材，百年世事不勝哀。蓋公堂下青青樹，曾見傳杯讀畫來。（蕪湖道署中瀉窰用宋人蕪湖故事作避舍蓋公堂丙申二月余還武昌過蕪湖瀉窰留余及幕僚賓客談讌竟日）

江西魔派不堪吟，北宋清奇是雅音。雙井半山君一手，傷哉斜日廣陵琴。

舟中望九華山

九點森如碧玉鑿，陽明宴坐愛山深。牢籠不得張司禮，萬乘安知學道心？

登臨

登臨秘要待閒身，（杜牧之詩景物登臨開始見願爲閒客此間行）墨突無黔已幾春。山水有靈應笑我，自疲自樂豈關人？

少年

少年容易擲春華，酒量山行歲歲差。客鬢漸添千縷雪，家園已少五分花。

食橄欖

回甘青子出艱難，爛熟朱櫻衆喜歡。內熟清涼空論定，幾曾同薦赤瑛盤？

兔絲



文杏天桃同一時，天涯芳草濯燕脂。兔絲亦厭風霜苦，誰伴青青湖底枝。

題周東郵畫隱居圖

黃雞啼午棗花開，狗臥桑陰吠客來。驅狗出門雞上樹，華胥好夢莫驚回。

讀唐書

賈誼多言絳灌傷，奮助新進敢衡量。最憐輕薄元才子，操縱英雄綠野堂。

非荆公詩

大婦鳴環治酒漿，彈箏小婦鬥新妝。爲君辛苦成家計，凍折機絲不怨涼。

江上觀漁

綠波風定起微皺，磯畔拋罾待巨鱗。網得固欣空亦喜，喜他江上是閒人。

讀宋史

南人不相宋家傳，自詡津橋警杜鵑。辛苦李（綱）虞（允文）文（天祥）陸（秀夫）輩，追隨寒日到虞淵。

（李綱閩人，虞蜀人文，吉水人，陸楚州人，皆南人）

惜春

老去忘情百不思，愁眉獨爲惜花時。闌前火急張油幕，明日陰晴未可知。

奉和金陵雜詩十六首

老去屏山賦，汴京裕之俳體，雪香亭名篇十六，渾相似。傳唱江南不忍聽。

二喬國色並乘龍，總角英雄蓋代功。公瑾伯符俱不壽，天教寂寞古江東。

紫蓋黃旗下，有人大航朱雀會風雲。鍾山虎踞龍蟠勢，具眼無如諸葛君。

傷心玉樹有何春？佳麗江山要洗塵；除卻寄奴能虎步，南朝天子半詞人。  
一半春風付教坊，李平潘佑枉思量；曹彬勾當江南事，愁坐圍城詠鳳皇。  
天塹橫分制佛狸，後來虞雍繼韓蘄；如今鐵甲乘湖上，不用量江費釣絲。  
瘦丁亭子水西門，古有儉邪尙識真；今日節樓讀洋畫，流連江雪又何人？  
莫愁湖已乞中山，兒女英雄事可憐；萬古雲霄遺像在，勝棋樓子亦凌煙。  
桃花燕子話興亡，馬阮匆匆送建康；朝暮蜉蝣同一笑，臺南十日亦眞王。  
一從時相用商才，大賈如雲袞袞來；千載瞻園幽絕處，金錢花榜夕陽開。  
文采風流遞不如，乾嘉末勝道成初；江南後蟹輪前蟹，依傍倉山有薛盧。  
秦淮畫舫暖圍春，時有漁郎來問津；閒坐河房思誤字，鈞衡誰是釣魚人？

（會忠襄鎮金陵幕僚陳某招權納賄

多在釣魚巷伎館，或改節署三省鈞扁爲三省釣魚）

雨花臺畔血痕蕩，龍膊收功四十年；怪事曾胡殊不料，有人俎豆到金田。  
濠泗風雲祚一僧，殺人如草自矜能；紅燈尙託朱家裔，直恨無人發孝陵。  
西上陶桓意可傷，石城回首舊斜陽；可憐儀鳳門邊地，圈作威廉外教場。  
乖崖持節鎮三吳，苦恨昇平一事無；今試維新開闢手，那能閒卻老尙書？

奉和舟中望九華山

悵望陽明小洞天，功名司禮輿周旋；磷緇不受中牟累，惟有通儒執聖權。

奉和登臨

出人不遠只因閒，趣在閒忙各半閒；開濟時於遊覽寓，峴山以後又東山。

○奉和少年

杜陵野老鬢成絲，閒話開天柱費詞；底物人生難再得，承平光景少年時。

○奉和食橄欖

大官櫻蔗十分甜，誰肯低回苦後甘？良藥忠言皆此類，味長終是水精鹽。

○奉和兔絲

萼綠凌霄索笑慳，冬青晚達意蕭閒；歲寒松柏如求友，不在柔蘿弱蔓間。

○奉和題周東邨畫隱居圖

招隱秋山桂樹陰，自開圖畫自沉吟；如今但許仙雞犬，辛苦淮南煉藥金。（攤會試寓慈雲寺同舍二十餘人多

不相識，漢止潛戲曰：異日淮南得道雞犬皆仙，潘儀甫曰：恐但仙雞犬耳已而果然）

○奉和讀唐書

延賞西平器不同，微之裴令苦相攻；劣棋著著都成錯，不相香山相敏中。

○奉和過張繩菴宅

揮羽休論海上兵，荷戈忍見寒垣行；功名萬里虛乘障，叱咤千人總廢聲；末路難爲齊贅壻，遺經仍授魯諸生；（君遣戍歸主問津書院）時艱每爲人才惜，惆悵當年廢李平。

○奉和過蕪湖弔袁渥綖

季世危言衆所憎，仙家戶解道方成；湖堧未立雙忠廟，（兼謂竹簣）漢室誰憂七國兵；海濤詩名長不死，夢中英爽凜如生；（庚子七月既望夢君與竹簣見過言扈從至此時車駕猶未出也）鳩茲城下東流水，千載猶聞歎吧聲。

□ 奉和讀宋史

不王非劉始漢皇，南人誰拜宋平章？真神兩帝皆英主，孤負朝恩恨二王。（謂欽若安石）

□ 奉和荆公詩

小婦歡娛太婦傷，羅帷一日異暄涼；小紅遣後楊枝嫁，始信糟糠不下堂。

□ 奉和江上觀漁

開徧桃花浪接天，風斜雨細未回船；江湖等是難抄手，且博功名四十年。（宋人詩自從江浙爲漁父四十餘年手不抄江漢間謂賦間爲賣抄手）

□ 奉和惜春

識花情性看花多，準備鈴條與幔羅；說與陰陽調蠶手，雨香雲淡要微和。

□ 竈姬辭

賢婦三言甫入門，得人嗟處只緣新；如何竈下蓬頭姬，不聽登堂勸徒薪？

□ 奉和竈姬辭

暮齋朝鹽奈老何？覆羹差免主人訶；白頭冷眼看人世，媚竈王孫積漸多。

□ 憶行

相攜女伴踏青回，歷亂蓮躩印綠苔；祇有檀奴渾認得，最纖纖是玉孃鞋。

□ 憶坐

習靜耽書出戶稀，玉茵溫暖繡簾垂；除非鸚鵡呼迎客，纔肯擡身隔幔窺。

□ 憶飲

蓮子深杯上口甜，小桃雙頰露紅酣；尋常不道相思酷，倚醉含嬌說二三。

憶歌

解唱蕭郎自作詞，教人緩按玉參差；詞中與妾相關處，減字偷聲出口遲。

憶書

鸞箋小疊報平安，想見蕪芽嫩玉寒；花葉往來無限事，背人書寫背人看。

憶博

南唐金葉亦何爲？入骨相思愛四緋；明賭紅羅十牀被，蘭心暗卜遠人歸。

憶翠

閒情無那上眉頭，桂葉雙描滿鏡秋；欲得郎憐嬌不語，手拈裙帶學春愁。

憶笑

驚喜芻尼報好音，春愁無復到眉心；不知閒坐思何事？忽俊低鬟自不禁。

憶睡

池池薰鑪搭繡裳，了無聲息但聞香；不容白日分明看，深夜移燈照海棠。

憶妝

眼重眉褪鏡菱行，雪白花紅洗面天；臥看梳頭誰解得？未施脂粉最天然。

憶行

貼地宮蓮步步金，一鉤羅襪在花陰；何須更寫凌波照，響屣聲來已不禁。

憶坐

樊山詩集 卷下 沆瀣

檀椅文茵見大家，裙欄端正鬢釵斜；天然妙麗知何似？一朵雕文座上花。

憶飲

泥人軟語帶人嬌，梨頰輕紅上酒潮；花未全開飲微醉，一生此景最魂銷。

憶歌

頓挫瀏漓字字清，問關花底嘖流鶯；自從一折河橋柳，廢盡陽關第四聲。

憶書

錦箋六六肖鴛鴦，小字簪花獨擅場；誰識謝家團扇上，偷臨玉版十三行。

憶博

泥郎清夜賭枰棋，金餅錢銖匪我思；妾負乞君雙繡履，郎輸貽我十香詞。

憶顰

自拈雙蛾對鏡臺，離愁多上遠山來；妾爲金鎖郎銀鑰，得見郎時鎖卽開。

憶笑

拈花無語恰含情，楊柳微風百媚生；多分嫣然因宋玉，錯令傾倒徧陽城。

憶憶

情態無如午睡佳，任他落扇與橫釵；萱松此際俱避迴，布指偷量小鳳鞋。

憶妝

晚妝初了袖羅單，鬢髮油雲照眼寒；反戴髻心珠念子，側身斜背鏡羞看。

憶行

夢覺每爲鶯喚起，香多常有蝶隨身。閒臨池水風吹汝，緩步花階月媚人。

□憶坐

愛書貪繡掩重門，腰擗紅綾盡日溫。幸是玉人輕似燕，不然膝踝印牀痕。

□憶飲

四肢紅玉軟生香，鬢亂釵橫壓象牀。特賴檀奴與勾當，一甌春雪葛花湯。

□憶歌

學得新聲絳樹雙，曼音遙在竹西窗。梨園弟子無人會，別有花間自度腔。

□憶書

粉箋珠字總停勻，小玉旁窺笑復嗔。鄴扇不差王大令，學書真似衛夫人。

□憶博

莫是清朝門草嬴，笑從雙頰小桃生。手談冷笑梅花塔，一世圍棋著不成。

□憶顰

水樣柔腸日九回，真愁強笑耐人猜。同心結子從卿結，結到眉心那得開。

□憶笑

有誰能解翠眉顰，一笑相逢鏡裏春。未必千金真買得，拈花須付有心人。

□憶睡

翠地流蘇玉簾光，暑中假傍亦清涼。冰肌玉骨原無汗，比似青奴較有香。

□憶妝

二七韶年始上頭，團團寶髻學蘇州。鏡中瞥見蕭郎戲，手攏鬟雲笑不休。

□憶行

洛花一朵玉能行，每見驚鴻覺眼明。攜手青山紅葉路，比儂婉弱比儂輕。

□憶坐

玉璫終日炷檀沈，雅得芳梅澹靜心。雙結蓮趺誰得似，中庭新塑雪觀音。

□憶飲

小醫緋紅薦玉卮，自知沈醉更矜持。誰能奪我胭脂色，常有流霞起卯時。

□憶歌

東溪樂府船知名，調得珠喉井水清。宜稱女郎十八九，曉風殘月唱耆卿。

□憶書

熟絹生縑積漸多，閒拈花管作嬌波。爲郎寫徧心經字，祇換鴛鴦不換鵝。

□憶博

填輕暈溼寫宜春，從此紅闈百戲陳。打馬彈碁正月事，年頭酥蜜祭錢神。

□憶翠

苧蘿美隙解亡吳，粉本流傳在五湖。打點屏風圖列女，勸卿刪卻捧心圖。

□憶笑

鵝喜蛛靈強自持，情深情淺定誰知。潑茶終少幽閒意，爭似梨渦淺暈時。

□憶睡



小眠齋裏伴蕭寒，坐我書牀夢亦安。儂自閒吟卿自睡，睡時贈句醒時看。

□憶妝

鏡匣秋水照紅芙，早起蕭郎解辮初。熟透茜牙梳一柄，待儂梳了爲郎梳。

□憶行

鍍金緋屨一塵無，臨水登山與衆殊。偏到廣場歌舞地，故紆蓮步倩人扶。  
報道金車陌上回，中庭朱戶一時開。停凝半晌聞環佩，拂柳分花緩緩來。  
疏香小閣約煎茶，寒夜敲燈味雪茄。瞥見月移窗上影，不知是汝是梅花。  
樓居仙子許飛瓊，立上薰籠鎖骨輕。聽慣扶梯纖屨響，下樓輕似上樓聲。  
長廊顧影顯腰身，緩步輕擡玉線裙。（成句）好似巫山新雨過，和風吹出美人雲。  
迎面看兼背面看，玉人來去影珊珊。直饒面面看俱到，始服能行白牡丹。

□憶坐

戲學參禪罷女紅，綠熊坐具想丰茸。繡簾鸚鵡休相喚，靜女依稀在定中。  
綠窗相對話蕭晨，檢帖繙書始起身。卿自起身儂代坐，爲貪餘暖在香茵。  
雨過天街喚出遊，鈿車欹側轉銅溝。任他欹側還端正，但見欹茸顛不休。  
拂牀準備玉人過，難得茵馮接袂羅。月裏欄杆風裏鏡，涼天暑夕染香多。  
雙陸局邊忘夜久，鞦韆架上翻身輕。偶然半日耽閒靜，莫贈紅闈理學名。  
茵席隨宜故不常，天然情性愛端莊。畫船上與巾車上，南北嬋娟各擅長。

□憶飲

三蕉連舉玉浮梁，軟語時聞隔座香；廊下雪衣殊解事，替人辛苦喚茶漿。  
輕軀嬌困玉橫陳，私語無如醉後真；每到夜深防酒惡，黃柑青子最宜人。  
爲妾殷勤致醪醢，爲郎仔細揀紅丁；如今天上雙星換，別有茶星與酒星。  
不須盤格鬥精良，梨筍能消酒十觴；開盞時時破瓜子，贈郎猶帶口脂香。  
一樽輪遞兩人持，餘瀝分郎得半卮；儂自愛杯卿愛酒，杯唇常有淡臙脂。  
酒邊情態耐人看，柳怯雲鬆欲畫難；倚醉嗔郎太多事，奪人杯罍勸人餐。

憶歌

不是傷心爲小青，好詞貪唱牡丹亭；大家妝閣無愁思，夜雨燈前最可聽。  
悠揚水調換歌頭，閒拍闌干倚畫樓；一片孤城一彎月，伊州唱了又湖州。  
花底聞鶯喚奈何，萬金一曲采菱歌；紅箋八字從郎看，多分金星入命多。  
讀書常恨不冠巾，掃黛羞爲越女嚙；粉墨登場何所願，袍靴願現宰官身。  
楊柳樓心一笛風，歌珠圓轉玉玲瓏；欲教妍唱聞千里，應策留聲鈿匣功。  
慧性全工肉竹絲，晚涼閒唱女彈詞；若逢女學堂中女，不鼓洋琴不入時。

憶書

一紙家書三折波，半從省筆半沿訛；不知今隸何人製，（楷書曰今隸）偏是鴛鴦點畫多。  
花箋述事亦言情，挑盡銀釭寫未成；無限人間通用字，口頭極熟手頭生。  
古文奇字總生疏，心有靈犀手不如；儂自能詩不能寫，詩成口授別人書。  
朱格依稀宋影鈔，聯娟波撇稱心描；莫將秦吉輕相比，學得鸚鵡無限嬌。

弄墨幽窗思悄然，見人纖手掩羅箋。不知紙上書何事，但見春葱已可憐！  
花蕊宮闈百首詞，興來往往寫烏絲。近時檢校紅窗課，鈔徧焚南集裏詩。

憶博

花底搏菹催上場，紅氈銀燭小排當。寧波麻雀知何味？強與周旋故拙行。（撮麻雀之戲二十年前起於寧波今徧天下矣）

番攤都學嶺南風，恃賴聰明注注紅。（博場得采曰紅）四正四隅何足算（打攤橫直曰川四角曰拐）慣持孤注傲萊公。

角彩尋歡豔綺羅，玲瓏色子鬥硃窩。女中自有元龍氣，總較旁人出注多。  
新歲爭籌鷺燕喧，一年旺相視骰盆。玉人含笑梅花下，奪得今年女狀元。  
小時則劇厭粗豪，林下風流致自高。故事獨沿天寶例，一奩雙陸賭櫻桃。  
投壺玉女兩眸星，遊戲時時見性靈。清照多才嫌放誕，懶開打馬舊圖經。

憶翠

月子初三照九州，開簾相視眼波流。彎彎不見山河影，畫出嫦娥一世愁。  
漢殿徘徊奉帚初，擁貂誰寫曉寒圖。直須柳上春風轉，纔得宮眉葉葉舒。  
世上誰當青眼看，英雄傳裏嘆才難。春殘一盞青梅酒，翻使文君蹙遠山。  
尋常學畫遠山春，不解詩家說小翠。（見葉小鸞詩）今日上樓看柳色，愁來始信不由人。  
含情不語語還羞，萬轉千回那自由。諱道相思無可諱，一生心事在眉頭。  
舒黛每於懽會日，斂蛾常在別離中。不宜長聚惟宜散，眉樣心思兩不同。（人情喜聚不喜散眉宜散不宜聚人

散則眉聚人聚則眉散矣。

憶笑

閒泥茶甌對說。蕭郎語妙解人頤。性靈起發何人會。正在詩云巧倩時。把郎書字映窗紗。笑指薔薇說到家。含睇捲簾嬌不語。春風羞落滿庭花。秀鬢嫣然值萬金。有金難買箇人心。瓠犀明淨何由見。酒後歌前領略深。（酒後多笑未歌往往先笑）橫波一顧促魂銷。淡冶風神倩白描。桃李何曾定粗俗。只因難並海棠嬌。垂熟櫻桃斂未開。見人端重費人猜。麴郎自有河清壽。等得投壺玉電回。蟾子飛時繡帶鬆。春痕展盡翠眉峯。晉人風致聊無讓。不櫛居然陸士龍。

憶睡

見來始慚雙棲願。別後難爲獨夜情。安得中山千日酒。別時睡到見時醒。霜濃馬滑已三更。傾耳銅街轉轂聲。秉燭待君君不至。不辭低睡到天明。（坐睡曰低睡見南史）羅幃垂地護春寒。郎至能教反側安。一樣神清如叔寶。醒偏容易睡偏難。長裙未卸寶釵斜。四角垂雲玉隱紗。一半枕檀紅印臉。似從側面看荷花。習禮明詩出舊家。平時行坐戒天斜。枕衾不改幽嫺態。斂約腰身一束花。揀得詞牌睡鶴仙。花冠不整爲誰填。（宋人睡鶴仙詞臉霞紅印枕睡起來冠兒猶是不整）待伊推枕徘徊起。媚眼惺忪愈可憐。

憶妝

面對菱花玉不如。侍兒俗例與妝梳。梳頭不費柔荑手。解散雲鬟尙讀書。

梳髮未了綠雲鬆，鵲語紗窗海日紅。鸞鏡奈嘉書札到手，持香鬢出簾櫳。  
愛潔耽香癖太深，清朝漱刷畫廊陰。治妝未竟晨餐嬾，乳餅松花漫點心。  
銀篦斜插鬢光寒，要選真花髻上安。茉莉玉簪俱不稱，可人終是素心蘭。  
家常裝束總鮮明，淡暈芙蓉薄點櫻。自是風流天付與，隨宜梳洗亦傾城。  
早朝夫婿謁金階，卻出香衾對玉臺。雲髻已光眉未畫，遲遲勻染等朝回。

憶羞

當時相見桂堂東，道罷勝常笑靨紅。對面覷人無避處，轉頭佯看畫屏風。  
廣筵多是燕鶯儔，少小隨娘學勸酬。終是女兒嬌怯態，縱無人看也低頭。  
平時親出總生疏，乍見爭誇玉貌姝。苦恨背人詢小玉，有誰曾中雀屏無。  
穠李天桃正及春，衣裁斂樣逐時新。微聞卜鳳佳期近，十日前頭已避人。  
洞房停燭照文鴛，頭上珠冠絡索長。驀聽纖兒輕薄語，回身側坐鬱金牀。  
歸寧初下七香車，約略娘前說婿家。未肯徑呼郎小字，頰顏低喚一聲他。  
夜話挑燈姊妹同，聯翩謔語鬥機鋒。風流自說他人事，觸忤蘭心而發紅。  
夏月初長自洗頭，紅裳半袒下簾鉤。郎來驚笑佯迴避，欲着裙衫不自由。  
朝來七字費吟安，寫上花箋出手難。吐屬自佳工力淺，倩人改又怕人看。  
窺客寒帷客亦窺，房櫳綽約隱花枝。世間好物惟團扇，看取全遮半露時。

憶倦

茶琴棋酒米鹽薪，雅俗參差備一身。無暇午眠仍夜話，欠呵情態最忼人。

飯白茶青了不思，梳頭無力起常遲；侍娘見慣懨懨態，猜是桃花結子時。  
薔薇花發困人天，花影徐徐度紡車；柳弱似人人似柳，終朝三起復三眠。  
清朝消減玉精神，井臼由來未慣親；儂自羅帷將息好，單方休問女醫人。  
四肢嬌媚減腰圍，自別蕭郎意緒非；若向瑤池乞靈藥，令人輕健是常歸。  
貂簷暖帽窄衣裳，辮髮紅繩拂地長；儂自懶梳新樣髻，肯同妹喜效男裝？  
嬈娜書堂隱几身，昨宵今日懶於雲；分明記得煙卿語，第一風流最損人。（成句）  
金屏已掩更衣後，繡被纔薰未睡時；雲鬢半偏星眼闌，此情無第二人知。  
籠街燈火還家後，別院笙歌送客餘；料得明朝梳洗懶，最令人困是歡娛。  
睡猶未足海棠天，軟夢如雲著意憐；記得早朝臨欲去，香衾添蓋一重絲。

憶嘆

背坐紅窗蘭夜深，熱升難熨玉奴心；世間何物能消散，惟有溫箱韜膝金。  
戲齣會傳伏虎韜，閨房取締太無聊；當年妒律何人定，早向東京學取消。（作詩時適值日本取締留學生致全體退學迫令文部取消因牽合博笑）

村女勃谿非我心，自知煩惱自沈吟；懊儂不失溫柔意，但到無言恨已深。  
淡語寒暄強自持，防人描畫虎臙脂；便逢薄怨猶堪愛，何況嫣然送盼時。  
無端閒事損肝家，總怪蕭郎體會差；恰似玉蓮燈一盞，春宵偶有爆時花。  
恩情何重望何深，專壹難爲瑟與琴；一種聰明尖刻語，得人憐惜刺人心。  
敵災忍事拭啼痕，猶自人前強笑言；偏是檀奴乖覺性，窺人顏色解溫存。

斜倚薰籠影背鏡，怡聲軟語聽何曾？直將宰相看承汝，爲怕妝臺冷語冰。  
狂郎須用頂門針，僞醉伴嬌苦見侵。蒼后作書深不解，何曾怒字是奴心。  
雲母窗前常避面，鴛鴦枕上不通詞。豈知一度生疏後，一度恩憐勝舊時。

憶喜

爲數春宵樂事賒，千金一刻買年華。故知甘雨黃金榜，不抵紅閨燭上花。  
鸞閣舊是平章女，象服還爲相國妻。夫婿青山偕老處，嬌兒金榜挂名時。  
望子眞同望榜時，麟兒消息半然疑。裙裾不浣經三月，除卻檀郎只自知。  
姊妹分攜定幾年，歸寧相見倚庭萱。紅房各抱香嬰坐，語笑歡於未嫁前。  
久別家書抵萬金，郎歸約略熟林檎。歸時笑視桃花面，情比桃花水更深。  
嫁得蕭郎莫遠遊，玉奴知費幾生修。錦裙有帶皆連理，繡枕無花不並頭。  
一朵閨中命婦花，綺羅珠玉極豪華。女兒身作門楣處，揮手千金贈外家。  
問字窗前屢質疑，但聞欣賞少瑕疵。作詩寫字俱成就，此是蛾眉及第時。  
海棠花下作生朝，長黛橫煙著意描。送禮須諳風雅性，霞箋一闋念奴嬌。  
福慧雙修詠絮人，起居八座亦前因。葦砧雅得人心意，親手泥金寫告身。

憶浴

端陽節後澡蘭天，安置槩盆繡榻前。剛似小池青玉甃，一番新雨濯紅蓮。  
午炎芳汗濕衣裳，心怯紅氈百沸湯。準備雙餅與搗兌，稱人心是半溫涼。  
寬褪羅衣玉色鮮，蘭湯莫遣濕雙蓮。那能不稱檀奴意，自撫凝脂亦自憐。

薄晚郎歸綺戶扃，侍兒守戶立玲瓏；瑣窗嚴密無窺處，時聽香羅蘸水聲。  
玉骨生涼粉汗輕，冰綃拂拭雪肌明；回頭卻顧蓮湯笑，還與煎茶水共清。  
解裙量度小腰圍，猶著輕兜一色緋；記得華清池上見，一生心折畫楊妃。  
出水芙蓉臨鏡遲，重勻嬌面點唇脂；蕭郎憚暑還多事，添畫蘭闌早晚眉。  
一朝幾易繡羅襦，時見金盤水瀉珠；郎主何如齊小白，三薰三沐女夷吾。  
玉盆殘水尙餘香，晚髻慵梳出畫堂；珍重輕軀花樣弱，梧桐露下莫貪涼。  
舉體清涼玉水溫，風前涉想卽消魂；若爲盛得朝雲住，祇有端明雪浪盆。

憶食

一從別後減腰肢，早暮雲屏選飯遲；賴有詩筒如竹實，等閒能解鳳皇飢。  
蕊愛秋霜筍愛春，食單著意選芳新；欲添錦繡腸中料，蜀荔江瑤較可人。  
不憶吳蕪與蜀薑，不求津蟹與河魴；祇須長接梁鴻案，縱是家常飯亦香。  
西廊茶竈晚添煤，自作香羹暖綠醅；洗手中庭忍飢坐，飯香魚熟等郎回。  
筍肪魚脯箸爲筐，南物提攜到北方；自入郎家更食性，吳酸楚辣每同嘗。  
茶經食譜聚奇書，春晚親臨竹裏廚；收拾名花歸繡口，熱鑿自炙牡丹酥。  
玳筵空列八珍盤，薄飲梨花下箸難；客散更熬香米粥，甘芳別是女兒餐。  
繡龜禮拜世尊回，小食深憐口福佳；淡啜瓊糜生放雀，爲郎祈福爲郎齋。  
融冰入酪瓠犀寒，冰翠生黃薦玉盤；崖蜜太甜青子澀，可人風味是梅酸。  
一搦宮腰緩帶羅，春風強飯奈卿何；朝饘暮粥都無幾，轉是檳榔上口多。



憶潔

藐姑仙子玉無瑕，每日西溪自浣紗；羅襪凌波何所似？玉池清水白蓮花。  
琉璃地上見雲英，修到梅花是幾生；萼綠不隨桃李嫁，滿懷霜雪照人清。  
人言心似雪聰明，心與肌膚一片冰；謝女平生工捉麈，幾曾紗帳見飛蠅。  
銀燭飄煙蹙翠尖，幽閨恨少夜明簾；自身忘是羊脂玉，生怕羊脂污（上聲）玉纖。  
焚香掃地掩房櫳，身在仙居月殿中；一日中單三浣濯，深閨亦有米南宮。  
等是衫裳別樣鮮，人間脂粉不成妍；若從花裏求同調，不是芙蓉定水仙。  
淨洗鉛華愛淡妝，何須新舊揀衣裳；汗衫裁剪齊紈素，著過三年白似霜。  
日日瑤房采伴來，素盞茶器淨於揩；來賓都識花情性，不飲蕭娘自酌杯。  
每讀文章愛修潔，若登樓閣喜高寒；乾坤清氣能多少，得自斂筭覺更難。  
水晶簾箔麝香裯，我亦人間峻潔人；待得女平章到此，爲儂三日拂埃塵。

憶香

一簾花雨濕茶煙，盡日氤氳玉篆圓；如是我聞開得否？從今參透木樨禪。  
踏青時節麗人天，衫鬢依稀曲水邊；乞取繡鞋尖上土，和花燒作水沈煙。  
墮烏遺髻坐接茵，憑肩私語夜相親；何須更勸蓮花盞，吹氣如蘭已醉人。  
襲人花氣出肌膚，勝傍薔薇挹露珠；愛玩紅妝明燭下，此時還恨海棠無。  
梔子花開月在東，雕欄玉砌納涼同；竹牀並坐休嫌遠，消受斂頭茉莉風。  
羅襟親解紫絲囊，和着連環贈阮郎；經過三年梅子溲，長留芳澤在衣裳。

半折輕紅苴蕊枝，芳年剛及破瓜時；時時含吐丁香核，羞被檀郎索口脂。  
出浴休傾蘇合水，梳髮薄蘸桂花油；好收賸馥歸羅帕，常有餘膏在枕頭。  
蘭室何須作鄭箋，玉釭無意爇龍涎；沈檀雕作神仙女，爭及昭儀出自然。  
竟體芳蘭繡被溫，薰衣長感玉人恩；最能操縱檀奴處，剛使消魂又返魂。

憶學

女中博士美無雙，每到書齋警吠龍；羯末封胡俱不見，偷攜筆硯到紅窗。  
垂髫弄筆學隨園，多讀纔能雅俗分；一誦玉臺新詠序，案頭惟置六朝文。  
百首宮詞王仲初，翻餅瀉水定誰如；香閨最厭頭巾氣，不買坊間女四書。  
絮白椒紅口角香，女師德象誦無忘；閨箴總守蘭臺舊，肯入東京女學堂。  
小詩仙意擬堯賓，密字真珠寫洛神；文采風流兼晉宋，衛夫人與管夫人。  
蕭郎宮體早知名，難得花房對合笙；（見頰阿瑛詩）好把九鸞釵作贊，紅箋親署女門生。  
自寫妍詞自按歌，晚唐南宋費吟哦；吹蘭笑問生疏字，惟有昭明選裏多。  
義山隱僻耐人思，錦瑟龍宮領悟遲；賴是檀奴溫雅性，丹黃音註徧書眉。  
箇人心似玉玲瓏，郎主猶輸強記功；賂說玉環飛燕事，某篇某句某行中。  
綺執脂粉儘消除，賣賦金來只買書；難得閨房兩司馬，渴相如伴女相如。

憶繡

我詩卿繡兩相和，黑蝶琴弦未足多；卻出金箱新活計，比郎窗課定如何？  
繡棚花鳥逐時新，活色生香可奪真；近世寫生無好手，熙茶畫意屬針神。

淡白吳綾四角方，風荷水鳥畫湘江。去年繡得鴛鴦隻，直到今年始作雙。  
枕函繡出紅蓮朵，比並真如臉際霞。猛憶北池同避暑，翠盤高捧兩三花。  
奩贈勞人嫁妹初，腰盤花樣取清疏。（嫁奩繡荷以百數花疏而不密爲省工也）恰於疏處堪人愛，又似雲林小扇圖。

早朝替數五更鐘，百福香薰竹火籠。瞥見朝衣金線折，累伊織手夜深縫。  
妃儷鮮明五色絲，花跗烏翼下針遲。亦如文筆天然巧，盡在挑紗破線時。  
自製鞋弓傍綺疏，低頭著意刺紅蕖。不知背後蕭郎至，愛玩蜻蜓雪不如。  
一線珠穿喜字雙，美人纖指壓蘇杭。裙邊偷拾紅絨唾，組織成詩字字香。  
十景西湖只等閒，裙花枕鳳許多般。金針綫腳從人看，願度鴛鴦滿世間。（鴛鴦繡出從君看不把金針度與人何其吝也金針線腳分明在自繡鴛鴦也不難又何私也如此詩則菩薩心腸瀛環公理矣）

### 百泉

衛多君子淇多竹，最是百泉宜隱居。中有游鯨長尺半，始知人樂不如魚。

### 拜孫夏峯徵君祠

庭下琅玕三丈長，霜筠常護歲寒堂。中年廢學慚湯耿，垂老猶思炳燭光。

### 坐泉上東亭

圓荇尖菱媚檻泉，波光濕灑月初弦。一宵清靜千金價，灑盡塵勞二十年。

### 登孫登嘯臺

入山都道太行深，長嘯荒臺尚可尋。谷路今朝開子午，最憐絕響鳳鸞音。（英義兩國設福公司采澤潞煤鐵下

太行至衛輝鐵路已興工

讀唐書

賈誼多言絳灌傷，舊勛新進敢衡量。最憐輕薄元才子，操縱英雄綠野堂。

百泉

竹竿籊籊水粼粼，綠淨空潭影瀉春。尺許游鱗何足釣，如公纔是斷鼈人。

孫夏峯祠

顏李生徒盛北方，百泉源遠復流長。西還未下名山拜，空展遺縑看草堂。（詳舊有夏峯草堂圖）

泉上東亭

裴令橋莊復見今，洋洋流水孰知音。舊人祇有劉賓客，解道風泉似玉琴。（劉中山和裴晉公聽泉詩水聲來似

玉琴聲）

孫登嘯臺

鸞鳳飄飄落九天，貞風遠在竹林前。才多識寡嵇中散，莫倚疏狂誤後賢。

江上觀漁

綠波風定起微皺，磯畔拋罾待巨鱗。網得固欣空亦喜，喜他江上是問人。

吳氏寂園

在復成倉院人吳學廉所營。厥初一瓜廬，叢爾青溪邊。十年三過門，附益成名園。有水可濯纓，况兼遠與偏。堂後挺高竹，粗如夏屋椽。鍾山翔

且舞，來住几案間。貪夫多媚嫉，履迹如慕羶。會見千朱甍，蔽岸成喧闐。及此衆未奪，日弄清且漣。

薛廬

在烏龍潭上昔爲全椒薛慰農院長所居今爲薛祠潭即顏魯公放生池也今有魯公祠

人愛顏魯公，池古澤不竭，天憐薛夫子，分此地幽絕。閉山離門內，貯水臥榻側，貧士生巧思，一壑遂專得。吟詩構杜堂，問字比楊宅，雖無五松雅，猶勝倉山熱。路荒花竹門，家室藩牆缺，溪亭徒兀兀，無梁不可涉。自炷影前香，悽然懷抱別，常恐嘯詠事，後起遂銷歇。

### 元武湖

滄海日以東，江湖日以遠，城頭紫氣盡，城下白波淺。龍子去荒洲，春深荻芽短，逶迤隨崇墉，縱橫抱疊巘。樂游與青溪，自笑蹄涔褊，勝國一紙堆，今日萬家產。賢侯助業多，豈暇計滌匱，聞鳴樂藪澤，自舫洗心眼。欲使清虛露，先將荒穢剪，汗萊畀農漁，蒲荷兼游衍，利害隨時生，陳迹不相踐，葦間貪延緣，浦口暗西崦。

### 莫愁湖

蕭衍黠老公，豔體託麗人，製爲莫愁曲，歌者頰生津。遂令石城水，曼膩嬌千春，將柳作腰支，以山當眉鬢。六代迄宏光，海枯湖不涸，顛倒滿城客，髻髻遊洛濱。可歎遊觀末，亦罕眞賞存，了無川嶼媚，一勺安足珍。白雨忽飛灑，水草生精神，明鏡頓如拭，一洗金粉塵。

### 雨花臺泉

不見報恩塔，猶見雨花臺，信知象教力，帝王不能摧。灑此一清涼，救彼孽昏霾，一嗽肺肝平，再嚙神識開。此邦苦爨汲，流惡孰決排，安有脂粉膩，時見糞艸偕。疹癘固由此，坐使風俗卑，汲汲安吳翁，陳義通江淮，符調忍獨清，見泥志勿衰。

### 胡氏愚園 有六朝石宋人題字曰劉季高甫徘徊其旁紹興丙申十月乙亥十六字

甲第什伯區，充塞冶城中，云是大將家，一堂役萬工。土木朱紫衣，歌舞玻璃鍾，佳哉整源叟，獨以園池雄。浩渺起鷗鷺，心落滄洲空，撫此徘徊石，頓思相賞松。池東有礪擊，畫意參荆籬，池西多嘉實，霜餘綴青紅。我來值冷落，掃除

樊山詩集 卷下 沉澹

一七二

驚兒童，無人亭黯敞，不翦花蒙茸，獨有賞會處，不與衆人同。

青溪

劉江諸大宅，礎不可尋，遺此衣帶水，穠華變清深。稍稍種桃柳，寡薄無繁陰，聊借三人航，寫我五湖心。燥吻甘止酒，茗椀自酌斟，清曠人語絕，時逢禪叢林。煙際聞相呼，三兩歸暝禽，何必牛渚月，已足慙素襟，得享一舸間，勝擁千鎰金。

羊皮巷某氏園

園主人某太守方自滬江都謀營造川漢鐵路事

逢花輒停車，有竹便叩門，古來達士遊，何用具主賓，倦遊老太守，酣眼看朝暎，楚楚一畝宮，蕩蕩十畝園，訪戴不見戴，所見荷柳繁，繫馬權籬下，移牀苔石根，雖免白依母，斤竹高避孫，市聲屏不至，坊巷同邱樊，似聞遊嶽叟，浮海踏京塵，樹間黃栗留，向我如有言，客何多閒情，主何不憚煩，煩者有至樂，旁人不無聞，閒者有至苦，寫我憂如焚。

謝公墩

謝傅功再造，轉憂爲臣難，桓筭急且哀，一坐皆汎瀾，詠詩效洛生，擁鼻仍儒酸，山澤自本性，亦以免憂患，豈意爰憩地，千載爲公專，後枕鍾阜樹，前流北郭泉，僻有鹿跡雜，靜聞田水喧，景物甚寥寂，自取碩人寬，寄興在象外，一率同東山，來爭無味名，猶是介甫賢，何人惜古意，築室加藩援，善保此部婁，勿使犁爲田。

雞鳴寺

余以金施寺僧闢寺後經堂爲樓遂爲金陵勝地之冠

雨暗覆舟山，泉響雞鳴埭，埭流南朝水，僧住南朝寺，當時造宮城，選此陵阿地，朝市皆下臨，江山充環衛，白門游冶子，各拖無生氣，心醉秦淮南，不踏鍾山背，一朝闢僧樓，雄秀發其秘，城外湖皓白，湖外山蒼翠，南岸山如馬，飲江駐鞍轡，北岸山如屏，縈青與天際，鷺洲沙出沒，浦口塔標識，煙中高樓臺，渺若蟻垤細，亦有杜老憂，今朝豁蒙蔽。

瞻園

本徐中山園今在布政司署

去年入瞻園，水澗不盈尺，殘梅如病疴，步步生草棘。山林有重遊，相隔幾何日，攢蹙寸楮畫，展作尋丈壁。充悅盡百卉，苔潤新陰碧，邱壑涌奇詭，尋路忘曾歷。虛堂久局蹙，一旦波照席，佳處添茅茨，愛之坐忘夕。屋烏與儲胥，非關好惡群，物態由扶發，兼遇興會集。傳舍何足云，滄桑亦過隙，不爲大功哀，豈代青君惜。達哉張全義，不理平泉石，主人觀靜妙，（開縣李雨亭官布政使時題曰靜妙堂）俯仰掃陳迹。

■翠微亭 卽南唐暑風亭

明光曳地來，長如一匹練，不登石頭城，幾疑天塹誕。邱垤齊斂避，形勢頓涌現，是日積雨晴，千里無陰闇。夕陽生金采，青綠染郊甸，尺樹藏百村，片嵐連數縣。南北交映發，不爲洲渚間，姑孰及朱方，左右一顧盼。保大雖孱王，此亭江表冠，涼風掃盛暑，夜夜金輿玩。霸圖偶起滅，山川長絢爛，窮蛙食井泥，安有超世見。欲攬大瀛環，凌虛思羽翰，江神傲河伯，醜雞兩足歎。遠略我所乏，老朽頗自厭，登高或能賦，含毫窮汗漫。

■燕子磯

洶洶黃天蕩，空曠如巨池，舟行無幟志，遠指江干磯。鐵骨蒙苔蘚，舒翼昂領頤，翩然來下浴，斗入青琉璃。南北此要津，日有千帆飛，喜其無障礙，登者輒賦詩。豈知白鷺洲，駸駸能東移，古渡多改變，迴異梁陳隋。伐荻如伐木，取充州軍資，青青雖可悅，大觀爲蔽虧。蕃舶運尻輪，外水晝夜馳，內水頓淺狹，竹塢連秧畦。陽侯逞靈怪，沙禽眠不知，昔傳裴司空，水神此地尸。（裴文達爲燕子磯水神今祠內木主尙存）巖巖臨溝澮，威福將安施。旣失搏水險，遂滅翔風奇。利害每相因，世事皆如斯，危然來好事，路壞亭孤危。仰讀設險句，感歎南巡碑。（磯上乾隆御題詩有設險語）俯瞰鹽舸商，誰解題好辭。（此草鞵夾內夾江惟鹽船行之行旅皆乘輪矣）暝雲送客散，滿山啼畫眉。（磯下多畫眉皆巢石罅內）

■吳氏寂園

古人羞寂寂，今獨畏繁麗。不見黃浦灘，填爲九夷市。茲園面青谿，俯拾鍾山翠。心遠地復偏，宜若衆所棄。豈知鮫鱈涎，久蓄蠶鯨意。反客爲主人，不留臥榻地。賢哉謝大夫，守邑不假器。倘得長寂寥，庶幾挈瓶智。所以桃花源，不干外人事。願言推此心，永保路鑿利。

薛廬

伊昔歲在巳（辛巳）言登薛燭門，門臨烏龍潭。花竹明秋暎，升堂次客座。不見琴硯陳，壁詩刻高弟。楹帖羅貴人，斯須主人出。尺面多癩痕，及門上元令。青轅來過存，危坐說官績。不茶口生津，令言恪靖伯。行督三江民，吾屬螻蟻耳。敢與神龍親。薛君曰不然，吾感知己恩。疇昔守杭州，節樓數夕晨。外示巖巖象，中含天地仁。與吾計兵事，布按不得聞。爰作優孟語，爲傳楚相真。（爾時薛述湘陰語並狀其笑貌累數百言）我面寢以熱，急避元規塵。池臺自言好，曾未窺其藩。今餘二十年，園柳摧爲薪。及門條貴達，致身在青雲。獨念花與竹，狼藉委荆榛。老人今何之，蟲囓桑樹根。

元武湖

曾侯復金陵，首招秦淮妓。幕府多老儒，罕測相公意。十年蜂蟻屯，一日燕鴛萃。冠蓋來如雲，珍奇箠而至。臺城火未熄，已有昇平瑞。一水極妍華，一湖獨幽邃。蓮波偶然紅，葦海無窮翠。舴艋浮其間，掃空脂粉膩。惜哉千頃陂，坐等石田棄。白蘇關西湖，匪直風景事。何當翦汙萊，大興畋漁利。言征蒲藕稻，兼啓魚蟹市。方今課實業，早作陶朱計。勿徒營女閭，催納河房稅。

莫愁湖

莫愁在何處，不見鬱金堂。但見白畝湖，不能容舟航。南朝盛女謁，煙水借輝光。連雲起飛閣，列肆緣修廊。廣庭鬻茶果，隔座調絲簧。扶梯弓履聲，塵上瓜子香。脂粉與巾袷，終日相諠煩。藉令湖有神，能無牛溲傷。何哉英雄人，亦瀕



兒女行，前有中山徐，後有會湘鄉。

### □ 雨花臺泉

古來都會地，往往乏水泉。韓厥論晉都，金陵亦復然。去江且十里，民苦汲爨艱。茗粥人泥滓，食飲生疾患。步出城東門，高臺遠市廛。昔爲雨花地，玉水流涓涓。茶寮白頭嫗，稚齒妃金田。酌我蟹眼湯，一杯煩渴蠲。安得溝此水，逶迤入重關。萬家富饜盎，出戶卽清漣。水火如菽粟，閭井皆平安。火柴與水輶，吾羨西人賢。

### □ 胡氏愚園

名相無樓臺，大賈多園池。池居園之半，紅亭俯漣漪。肅客水晶城，八窗瑩玻璃。奈何竹樹陰，當暑驕炎曦。乃製鴨鶩船，張帆與簷齊。日出障其東，日入蔽其西。或隨飄風轉，當用人力持。咄嗟富家翁，經濟止於斯。昔以十月游，柳黃荷亦衰。心憎主人俗，粉壁無題詞。前塵忽根觸，廿餘年於茲。想見錦帆幅，破如蝴蝶衣。

### □ 青溪

沿流入青溪，磴磴俯白石。鴉散蔣王祠，草深江令宅。六朝媚妖嬈，荒怪久成習。蔣妹第三人，云是神君匹。導源始宋玉，神女極瑤飾。張孔卽朝雲，叔寶陽臺客。酣嬉三閣中，坐召穎與弼。玉樹朝朝花，能無外患集。江山如龍虎，王霸由此得。不聞獮兒嘆，全爲桓王策。舉國悅妍華，沓拖遂無力。願持此溪水，一洗金粉跡。

### □ 羊皮巷某氏園

有花不自賞，銳意驤天衢。不待宛其死，已爲他人娛。園花如有言，專迓尙書車。入門玩修竹，敷席蔭高梧。春深荷始錢，未有紅芙蓉。雜花生樹間，羣鴛與之俱。花言主人俗，流汗希簡書。得不得有命，胡不歸舊廬。鴛曰君誤矣，錢虜非吾徒。葛侯真名士，興寄迺蕭疏。生機盈天地，獨慙志與蜎。彼去汝何傷，彼歸轉慳子。憶彼花鳥語，拊掌一軒渠。周公代鳥言，豈非吾師乎。

謝公墩

進則爭新法，退則爭一墩。荆公視謝公，通介實非倫。江左風流相，翛然林豎身。一邱易百辟，晚節難爲臣。至竟社稷功，能回明主轡。半山盛名譽，一拳安足云。晚誤福建子，桓箠不可聞。詎惟名字合，身世同艱辛。古來受朝寄，常與譏讒鄰。千載謝與王，異形而同神。然則非爭也，居近情益親。祇今邀笛步，亦有捋須人。

雞鳴寺

金輿貪夜發，到此雞始鳴。六朝崇象教，因地築香城。雉場盛游騎，雀桁喧市聲。茲寺蔭山麓，蕭然林壑清。雖云據幽勝，未得居高明。忽焉金布地，起樓連五楹。杯湖檻外擲，針塔煙際生。江南江北山，一一几案呈。見聞不踰閩，何足稱豪英。環游不超海，何自達夷情。師意在啓蒙，一樓實初枕。豈徒窮千里，庶以清八紘。

瞻園

中山百畝園，今屬紫薇省。二年兩易官，園有幸不幸。東閣爲馬廐，視孰爲管領。儉者悵掃除，豪者飾綈錦。公述去年遊，官梅意悽哽。今年春風至，花竹何明靚。園林細事耳，轉移在俄頃。試登冶城望，神州雜鼃隄。誰爲王夷甫，誰爲謝文靖。江山易氣象，日月殊光景。天寶誤李楊，開元仗崇璟。治亂皆人爲，臺池其小影。用舍失其宜，咎由國成秉。媿皇能煉石，天地自完整。

翠微亭 卽南唐暑風亭

易吳爲南唐，一蟹遜一蟹。二主皆詞人，江山之主宰。差能選幽勝，超然具識解。斗起臨江亭，眼光東注海。想見凌歊游，金輿從鉉錯。宮嬪鳥爪人，衛士水犀鎧。夢回吹玉笙，細雨念雞寒。盛夏來清風，黃羅宸翰洒。豈知夾馬營，大有真龍在。再傳遂不競，百口付彬美。歸命憶江南，淚滴春江水。此亭獨千秋，名已翠微改。登眺撫斜陽，層城絢金綵。月出屢徘徊，煙銷一襖誨。外人貪避暑，久欲盧龍買。保此臥榻旁，勿貽重光悔。

燕子磯

上流慎門戶，層疊相蔽虧。峨峨兩梁山，天柱峙東西。采石及燕子，陡起江之湄。是皆號天險，古人戰守資。上爲武昌蔽，下捍金陵危。箕張復翼舒，靈石勢若飛。內爲草鞋夾，其外洶天池。輪舶日往來，怒雷江心馳。上起百尺臺，巨礮發以機。長橋鐵鹿子，當爲燕背泥。望攻而登守，智士各有思。尙書縱遐眺，豈爲窮幽奇。內水如內蛇，河身寢以微。外隨黃天蕩，俯仰思韓斲。拊背與搃吭，此亦人共知。禦人於門外，在入圖山時。畀人揚子江，邀擊當何施。新亭忽在眼，尺涕紛連瀉。憶昔王新城，夜遊來賦詩。秉炬入深險，題名壓屢屨。繼者洪北江，翠壁存其辭。承平名士習，今無所用之。

王樓營見杏花新柳是日濟河微雨

行盡幽州一千里，稍見冰谷通流水。太行隨我向南行，漸有煙霏含青紫。王樓營外三家村，潑眼春光百鳥喜。柳葉作態杏花驕，人馬風沙一時洗。我載沈疴逐鋒車，頓覺融暢入筋髓。枝裊鵝黃已蔽腰，蒂融絳蠟齊破蕊。乃知草木亦如人，寐者方酣覺者起。自由天氣有通閼，不緣土膏獨肥美。麥溝四徹如引繩，披拂蠕蠕將盈咫。濟河正逢好雨作，餅香飯熟都準擬。三輔疲忙何時蘇，北望攢眉輟筋匕。（直隸比年亢旱去冬無雪）

樊山詩集 卷下 沈澐





(全二冊實價二角四分)